

TNÚHU NÍ CHÍDÓ TNÙNÍ TÉ MĂCÚ

*Té Juàá téè dàcuandute ñaha xii ñáyiù càháⁿ-dé
tnúhu Yá Ndiǒxí xití yucu*

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá càháⁿ nàcuáa naníhí
tàhú-ó tnúhu Xítohó Jesucrístú Déhe Yá Ndiǒxí.

² Te ndíi Chàíá téè ní xóo càháⁿ tnúhu Yá Ndiǒxí
ndéé sanaha ní chídó tnùní ndíi nàcuáa ní xáhaⁿ Yá
Ndiǒxí xii Déhe-gá, te duha ní xáhaⁿ-gá:

Tendaha-í ìⁿ téè codonùu-dé núú-n,
te dàtúha-dé ñáyiù cuèndá tñí-yu tnúhu-n.

³ Te téè-áⁿ quihi-dé xití yucu te níhi càháⁿ-dé
cúñaha-dě xii ñáyiù:

“Chí dáńá nchàa ichi cuehé ichi duha ndècu-ndo,
te tñí-ndo ìchi váha, te ducaⁿ càda-ndo
cuèndá cundecu túha-ndo, chi véxi Yaá ío
cùnùu”, duha cúñaha-dě xii-yu.

Duha ndùu tnúhu ní chídó tnùní ndíi Chàíá nàcuáa
ní xáhaⁿ Yá Ndiǒxí xii Déhe-gá.

⁴ Te téè dii cuèndá-xi ní ngódó tnùní-áⁿ nání-dě
Juàá, te téè-áⁿ ní xíhi-dé xití yucu ní càháⁿ-dé tnúhu
Yá Ndiǒxí, te ní xóo dacuandute-dé ñáyiù, te duha ní
xáhaⁿ-dě xii-yu:

—Chí dándixi túu iní sá ñà túú quide váha-ndo
ndècu-ndo, te dañà-ndo nchàa ichi cuehé ichi duha
te cuandute-ndo, te ducaⁿ te Yá Ndiǒxí cada càhnu
iní-gá nchaa yíca cuěchi-ndo —duha ní xáhaⁿ-dě
xii-yu.

⁵ Te nchaa ñáyiú distritú Jùdeá, ndihi ñáyiú ñuú Jerusàlén ní sáháⁿ-yu ndéé yúte Jòrdán núú ndécú tē Juàá ní xíndedóho-yu nchaa tnúhu ní cáháⁿ-dé. Te cue ñáyiú ní náhmá nchaa yíca cuēchi-xi te ní dáciuándute ñaha-dé xií-yu.

⁶ Te té Juàá-áⁿ ñí xíhnu-dé dóó idi càméyu, te ìⁿ ñìⁿ ní cuu pànú xití-dé, te ní xóo caxi-dé tíca làngóstá ndihi ndudí ñúñú cuéchi.

⁷ Te ní xáhaⁿ tùcu-dé xii ñáyiú:

—Nchìcúⁿ ìⁿ tée véxi, te tée-áⁿ ìo-gá cúnùu-dé dàcúúxí yùhú, chi yùhú cúu-í ìⁿ tée duuⁿ duuⁿ ñá túú tàú-í ngúnundeyi-í nandaxi cuèdìcò ñìⁿ nihnu chàú-dé dico quìde-í chùⁿ-dé.

⁸ Te yùhú dáciuándute ñaha-í xii-ndo, dico mee-dě taxi-dé Espiritú Yă Ndiõxí cundecu ndihi-ndo — càchí-dé xăhaⁿ-dě xií-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ñí quee Jèsús ñuú Nazàrét ìⁿ ñuú yíndèhu distritú Galileá cuáháⁿ-gá yúte Jòrdán. Te yàcáⁿ ní dáciuándute ñaha té Juàá xii-gá.

¹⁰ Te òré ní nene-gá xití ndute, te ní xiní-gá nchì andiú, te ní quee Espiritú Yă Ndiõxí véxi cuuⁿ-xi ngúndecu ndihi ñaha-xi xii-gá, te dàtná cáá ìⁿ lómá cáá Espiritú-áⁿ vēxi cuuⁿ-xi.

¹¹ Te òré-áⁿ ñí tecú ní cáháⁿ Yă Ndiõxí ndéé andiú, te xăhaⁿ-gá xii Jèsús:

—Yòhó cúu-n Dēhe-í tée ío cùu iní-í te ío cùdíⁿ iní ñáhà-í xii-n —càchí-gá xăhaⁿ-gă.

*Sácuíhná quidé yìca-xi cada Jesús sá ñà túú tàú-gá
cada-gá dico ñá túú ní quide-gá*

(Mt. 4:1-11; Lc. 4:1-13)

¹² Te Espiritú Yá Ndiõxí ndécá-xí Jèsús cuáháⁿ ìⁿ xití yucu.

¹³ Te xití yucu-áⁿ ió víhí quiti dééⁿ, te xíaⁿ ndécú Jèsús ní ngúíta sácuíhná quidé yìca-xi cada-gá ìⁿ sá ñà túú tàú-gá cada-gá dico ñá túú ní sàndáá iní-gá. Te cue espíritu xínú cuèchi núú Yá Ndiõxí ní xinu cuechi-xi núú-gã. Te ní xíndecu-gá údico nduu xití yucu-áⁿ.

*Distritú Galileá ní chisaha Jèsús chiùⁿ ní táhú
Tátá-gã Dútú Ndiõxí cada-gá*

(Mt. 4:12-17; Lc. 4:14-15)

¹⁴ Te sátá ñí ngava té Juàá vecaá, te Jèsús cuáháⁿ-gá distritú Galileá dānehé-gá ñáyiú tnúhu váha, tnúhu sá càháⁿ nācuāa ndíhu ndaha ñàha Yá Ndiõxí xií-yu.

¹⁵ Te xāhaⁿ-gã xií-yu:

—Vitna sa ní cuyatni nduu ndíhu ndaha ñàha Yá Ndiõxí xii-ndo, te chí dáñá nchāa ichi cuehé ichi duha ndècu-ndo, te quindáá iní-ndó tnúhu váha, tnúhu sá càháⁿ nācuāa naníhí tàhú-ndó —cāchí-gá xāhaⁿ-gã xií-yu.

Jèsús càháⁿ-gá cúmí tnàhá cue téé tnì chácá

(Mt. 4:18-22; Lc. 5:1-11)

¹⁶ Te Jèsús ñúhú-gã ichi cuáháⁿ-gá tá yāha-gá yuhu làgúná Galileá, te ní xiní-gá té Xímú ndíhi ñaní-dé té Ndríxí xídáquēe-güedé ñunu-güedé xití ndute tnì-güedé chácá, chí quiti tnàhí-áⁿ cúú chiùⁿ-güedé tnì-güedē-di.

17 Te Jèsús ní xáhaⁿ-gã xii-güedé:

—Chí dáñá chùⁿ quide-ndo-áⁿ, te quixi-ndo chìtnahá ñáhá-ndó xì-í te taxi-í ingá núú chùⁿ cada-ndo chi quíhíⁿ-ndó cǎháⁿ-ndó ñǎyiu cuendá dacuàhá-yu tnúhu-í —càchí-gá xǎhaⁿ-gã xii-güedé.

18 Te òré-ni-áⁿ ñí dáñá cuè téé-áⁿ ñunu-güedé te ní tuha ñaha-güedě xii-gá.

19 Te cuáháⁿ-gá luha-gá, te ní xiní-gá té Jàcobó ndihì ñaní-dé té Juàá ñúhú-güedě xití bàrcú-güedé náticu-güedé ñunu-güedé, te ndi ndúú-güedé cúú-güedé déhe té Zebèdeú.

20 Te ní cana ñaha-gã xii-güedé, te ní dándõ-güedé tǎtá-güedě ndihì cue téé xìnu cuechi núú-güedě xití bàrcú, te ní tuha ñaha-güedě xii-gá.

*Íⁿ téé yìhì ñaha espíritú cúndìhì yucu ñávǎha
(Lc. 4:31-37)*

21 Te ní quexìo Jesús ndihì cue téé-áⁿ ìⁿ ñúú nání Cǎpernaúm, te yàcáⁿ ndécú-gã ní tnahá nduu ndètatú ñáyiu, te cuánguihu-gá veñúhu ñáyiu isràél dànehé ñáhá-gã xií-yu.

22 Te xǐcuñúhu vǐhí-yu nchaa tnúhu càháⁿ-gá, chi quide-gá sá cúú-gã ìⁿ Yaá táxí tnùnì vǐhí, te ñá túú dàcuaha ñaha-gá xií-yu dàtná dǎcuàha ñaha cue téé dàcuaha ñaha xií-yu nchaa tnúhu ní chídó tnùnì ndíi Moisés.

23 Te xití veñúhu-áⁿ ndécú tnàhá ìⁿ téé yìhì ñaha ìⁿ espíritú cúndìhì yucu ñávǎha, te espíritú-áⁿ ñí quide-xi níhi ní cáháⁿ téé-áⁿ, te xǎhaⁿ-dě xii Jèsús:

24 —¿Te ná cuínì yòhó Jèsús téé ñúú Nazàrét cada ñaha-n xì-ndí nùu véxi-n nùú ndécú-ndí-i? ¿Áⁿ véxi-n dànaa ñaha-n xii-ndí? Chi yúhú xìní ñáhà-í

xii-n sǎ cúú-n ìíⁿ téé ñá túú tnàhí cuéchi-xi, chi núú Yǎ Ndiǒxí ní quee-n vǎxi-n ñùyíú-a —càchí-dé xǎhaⁿ-dě xii-gá.

²⁵ Dico Jèsús ní tenàá-gá espíritú cúndìhì yucu ñávǎha-áⁿ, te xǎhaⁿ-gǎ:

—¿Cadí yuhu-n, te taquèe yìquì cuñú téé-áⁿ! —
càchí-gá xǎhaⁿ-gǎ xii espíritú-áⁿ.

²⁶ Te espíritú cúndìhì yucu ñávǎha-áⁿ nǐ dácǔyìhì ñáhá-xí xii téé-áⁿ, te ní dácáná sàa ñaha-xi, te ní quee-xi yìquì cùñú-dé cuáháⁿ-xi.

²⁷ Te nchaa ñáyíu xǐndecu-áⁿ ïo ní cuñúhu-yu, te ní xítnàhá-yu:

—¿Te nása ndùu-tu sá quidé tǎe-a? ¿Ndudú sáa càháⁿ-tu-dé sánùu? Te quíde-dé dàtná quidé ìíⁿ téé cùnùu vihi, chi càháⁿ-ni-dé te sàndáá iní ñáhá nchàa espíritú cúndìhì yucu ñávǎha —càchí-yu xítnàhá-yu.

²⁸ Te ío ndìhì ní níhí nchaa ñáyíu dava-gá ñuú yíndèhu distritú Galileá tnúhu nchaa nàcuáa càháⁿ Jèsús ndìhì nchaa sá quidé-gǎ.

*Jèsús quidé tǎtna-gá nǎná ñadìhì té Xǐmú
(Mt. 8:14-15; Lc. 4:38-39)*

²⁹ Te òré ní ndee Jèsús veñúhu cue ñáyíu isràél, te cuáháⁿ-gá ndìhì té Jàcobó ndìhì té Juàá vehe té Xǐmú ndìhì té Ndrìxí.

³⁰ Te nǎná ñadìhì té Xǐmú cùhú-aⁿ ñùhu vihi-aⁿ cahni, te ndìhì-ni ní xáhaⁿ-güedě xii Jèsús sá cùhú-aⁿ.

³¹ Te ní sáháⁿ-gá núú cáá ñàha cuhú-áⁿ te ní tñi-gá ndaha-aⁿ ní ndocani ñaha-gǎ xii-aⁿ. Te

òré-ni-án nǐ nchíco-aⁿ cahni, te ní ngúíta-aⁿ xìnu cuechi-aⁿ núú-güedě ndìhi-gá.

Jèsús quidé tǎtna-gá vǎi ñáyiu cùhú

(Mt. 8:16-17; Lc. 4:40-41)

³² Te òré sa cùnì-xi cundi^{qu}iⁿ te ní quexìo ñáyiu núú ndécú Jèsús, te nchaa ñáyiu cùhú ní dátacá-yu ndècá-yu ní sáá núú-gǎ, te tnàhá cue ñáyiu yìhi ñaha espíritú cùndìhi yucu ñávǎha ndècá-yu ní sáá núú-gǎ.

³³ Te nchaa ñáyiu ñuú-áⁿ nǐ chítú níhnǔ-yu yuyèhe vehe núú nǐ quexìo Jesús.

³⁴ Te Jèsús ní quide tǎtna-gá nchaa ñáyiu cùhú cuèi ndì dǐíⁿ ndì dǐíⁿ núú cuèhé tnàhá-yu ìⁿ ìⁿ-yu, te ní queñuhu-gá nchaa espíritú cùndìhi yucu ñávǎha yìhi ñaha xii ñáyiu, te ñá túú ní dàña-gá cáháⁿ cue espíritú cùndìhi yucu ñávǎha-áⁿ ni ìⁿ tnúhu, te ducaⁿ nǐ quide-gá chi cue espíritú-áⁿ sa xìnì-xi yoo cùu-gá.

Jèsús càháⁿ-gá tnúhu Yá Ndiǒxí distritú Galiléa

(Lc. 4:42-44)

³⁵ Te òré vátá tǔndaá váha-gá ní ndacóo Jèsús cuáháⁿ-gá ìⁿ xio yuhu ñuú núú ñà túú ñáyiu ndècu cuendá yàcáⁿ cáháⁿ ndìhi-gá Yá Ndiǒxí.

³⁶ Te té Xímú ndìhi cue té cùndìhi-dé nándùcu ñaha-güedé xii-gá.

³⁷ Te òré ní naníhí ñáhá-güedě xii-gá, te ní xáhaⁿ-güedě:

—Nchaa ñáyiu nánducu ñahá-yu xii-n —
càchí-güedé xáhaⁿ-güedé xii-gá.

³⁸ Te ní xáhaⁿ-gǎ xii-güedé:

—Chí ná quíhíⁿ-ó nchàa ñúú xĩndáa yatni-a, chi danèhé-í ñáyíu tnúhu Yá Ndiöxí chi ñíu chiúⁿ-án vëxi-í —càchí-gá xǎhaⁿ-gǎ xii-güedé.

³⁹ Te Jèsús tá xìca ndodo-gá cuáháⁿ nchaa ñúú yíndèhu distritú Galileá dánèhé-gá ñáyíu, te ndi tnahá ìⁿ ìⁿ ñúú sàá-gá te ducaⁿ cuànguihu-gá veñúhu-yu dānehé ñáhá-gǎ xií-yu tnúhu Yá Ndiöxí, te cue ñáyíu yìhi ñaha espíritú cúndìhi yucu ñávǎha ta quèñuhu-gá nchaa espíritú-áⁿ yiqui cùñú-yu cuáháⁿ.

Jèsús quidé tǎtna-gá ìⁿ té tnahá cuéhé sǎ dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexìo ìⁿ té tnahá cuéhé sǎ dátèhyú nihnu-xi yiqui cùñú-ó núú Jèsús, te ní ngüñí xítí-dě núú-gǎ càháⁿ ndàhú-dé, te xǎhaⁿ-dě xii-gá:

—Véxi-í càháⁿ ndàhú-í núú-n ñúu vá cúndèe iní-n càda tǎtna ñaha-n xii-í chi cùtnuní iní-í sá ndácú-n —càchí-dé xǎhaⁿ-dě xii-gá.

⁴¹ Te Jèsús ní cundàhú iní ñáhá-gǎ xii-dé te ní dácàá-gá ndaha-gá ní tendaha ñàha-gá xii-dé, te xǎhaⁿ-gǎ:

—Cuu cada tǎtna ñaha-í xii-n, te vitna ndúha-n —càchí-gá xǎhaⁿ-gǎ xii-dé.

⁴² Te òré-ni-áⁿ ñí xócuñí cuéhé tnahá-dé.

⁴³⁻⁴⁴ Te Jèsús ní cáháⁿ víhí-gǎ dóho-dé, te xǎhaⁿ-gǎ xii-dé:

—Vitna cuanùhú-na, dico vá yõo ìⁿ cúñaha-n sá ní quide tǎtna ñaha-í xii-n, te núú dütú-ni cuáháⁿ cuendá sá ná quini ñáhá-dě xii-n sá ní ndúha-n te cuáha-n-dě sá ndúú tǎhú Yǎ Ndiöxí dàtná ní cachí ndí Moisés cuendá ná quini ñáyíu sá ndáá ní ndúha-n —càchí-gá xǎhaⁿ-gǎ xii-dé.

45 Te téé ní cuhú-áⁿ nǐ xica-dé cuáháⁿ-dé, te ní ngúíta-dé xǎhaⁿ-dě xii nchaa ñáyiú ta nàníhí-dě nàcuáa ní quide Jèsús ní quide tátna ñaha-gǎ xii-dé. Te sá dúcáⁿ nǐ xíté nuu téé-áⁿ cuèndú nàcuáa ní quide ñaha Jèsús xii-dé ní quide tátna ñaha-gǎ ní ndúha-dé, te xǎⁿ nǔu dayuhu nǐ xóo quíhu-gǎ dava ñúú núú ïo vǎi ñáyiú ndèhe ñaha xii-gǎ, te ní xóo cundecu-gǎ xítí yucu núú ñà túú ñǎyiú ndècu. Te nchaa ñúú ní quee ñáyiú ní sáháⁿ-yu núú ndécú-gǎ ní cáháⁿ ndihí ñàhá-yu xii-gǎ.

2

Jèsús quidé tátna-gǎ ìⁿ téé cùhú ñá cúú-gǎ candá nihnu

(Mt. 9:1-8; Lc. 5:17-26)

1 Te sátá nǐ cuu ìⁿ ùú nduu sá nǐ quee Jèsús ñúú Capèrnaúm te ní nasáa tucu-gǎ, te cue ñáyiú ní níhí-yu tnúhu sá nǐ ndexìo-gǎ núú quidé vèhe-gǎ.

2 Te ndǐhí-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnàhá-gǎ-yu. Te ní ngúíta-gǎ ní dánèhé ñàhá-gǎ xií-yu tnúhu Yá Ndiǒxí.

3 Te òré-áⁿ nǐ quexìo cúmí tnàhá cue téé núú ndécú-gǎ nchídó-güedé ìⁿ téé cùhú ñá cúú-gǎ candá nihnu-dé.

4 Dico ñá túú ní ndàcu-güedé sáa-güedé ndéé núú-gǎ chí ío cuéhé ñǎyiú ndècu. Te xǎⁿ nǔu ní sáa-güedé díquí véhé nǔú yíhí-gǎ-áⁿ nǐ caáⁿ-güedé, te ichi ndàa díquí véhé-ǎⁿ nǐ dáquèe-güedé téé cùhú-áⁿ, te ñùhu-dé ìⁿ xító ní dáquèe ñaha-güedé ndéé núú-gǎ.

5 Te Jèsús sa ní cutnùní iní-gá sá sàndáá iní ñháá-güedě xii-gá nũu ní xáhaⁿ-gã xii tée cùhú-áⁿ:

—Yòhó tée cùhú, sa ní quide càhnu iní-í nchaa cuéchi-n —càchí-gá xãhaⁿ-gã xii-dé.

6 Te xíáⁿ xĩnucóo ìⁿ ũú cue tée dàcuaha ñaha xii ñáyiu nchaa tnúhu ní chídó tnùní ndíi Moisés, te sá dúcáⁿ nĩ cáháⁿ Jèsús núú cue tée-áⁿ nĩ sani iní-güedé:

7 “Tée-a càháⁿ cuèhé-dé cuèndá Yã Ndiõxí duha càháⁿ-dé, chi vá yõo ìⁿ ndàcu cada cahnu iní nchaa yíca cuèchi ñáyiu chi ìⁿdìi díi-ni Yã Ndiõxí quidé càhnu iní-gá”, duha ní sani iní-güedé.

8 Dico òré-ni-áⁿ nĩ cutnùní iní Jèsús nàcuáa sàni iní-güedé, núu ní xáhaⁿ-gã xii-güedé:

—¿Te ná cuèndá ducaⁿ sàni iní-ndó-í?

9 Te sá dúhá nĩ xáhaⁿ-í xii tée cùhú-a sá nĩ quide càhnu iní-í nchaa yíca cuèchi-dé, te xíáⁿ nchòhó ñá túú cùtnuní iní-ndó nũu ndáá càháⁿ-í àdi ñá ndáá. Dico núu cúu-í-dé sá ndácõo-dé, te ndocani-dé xító ñũhu-dé véxi, te caca-dé, te cutnùní ndáá iní-ndó nũu ndáá càháⁿ-í àdi ñá ndáá chi cundehe nũú-ndó nàcuáa cada-í.

10 Te vitna na càda-í nàcuáa cutnùní iní-ndó nchàa-ndo sá yũhú Tée cùu ñaní tnáhá-ndó nchàa-ndo ndecu ndìhi-í tnúhu ndee ìní sá cádá càhnu iní-í nchaa cuéchi ñáyiu ñuyíú-a —càchí-gá xãhaⁿ-gã xii-güedé.

Te sátá dúcáⁿ te ní xáhaⁿ-gã xii tée cùhú-áⁿ:

11 —Ndacóo te ndocani-n xító ñũhu-n véxi-áⁿ, te nùhú-n vèhe-n —cachí-gá xãhaⁿ-gã xii-dé.

12 Te òré-ni-áⁿ nĩ ndacóo-dé, te ní ndocani-dé xító ñũhu-dé ní quexìo-áⁿ, te ndèhe nchaa ñáyiu xĩndecu-áⁿ nĩ ndee-dé tnuú-yu cuáháⁿ-dé. Te sá

dúcaⁿ nǐ quide Jèsús ní quide tátna-gá téé-áⁿ, xǎⁿ ío ní cuñúhu nchaa ñáyiu, te ní xítñàhá-yu:

—Càhnu vihi cuu Yá Ndiǒxí, chi ñá ñⁿ ndùu quini-ó dùha cuu datná ní cuu vitna —càchí-yu xítñàhá-yu.

*Jèsús càháⁿ-gá ñⁿ téé nàni Leví
(Mt. 9:9-13; Lc. 5:27-32)*

¹³ Te Jèsús cuáháⁿ tucu-gá yuhu làgúná, te ío cuéhé ñáyiu ní sátnàhá ñáhá xii-gá, te ní dánèhé ñáhá-gǎ xii-yu tnúhu Yá Ndiǒxí.

¹⁴ Te òré ní yáha ní dánèhé ñáhá-gǎ xii-yu, te ní naqueheⁿ-gá ichi, te ní yáha yatni-gá ñⁿ xichí núú núcòo ñⁿ téé nàni Leví déhe ñⁿ téé nàni Alfeú quidé còbrá-dé ñáyiu cuèndá impuèstú chi còbrádór cúú-dě. Te òré ní xiní ñáhá-gǎ xii-dé, te ní xáhaⁿ-gǎ:

—Néhé chitnahá ñáhá-n xii-í —càchí-gá xáhaⁿ-gǎ xii-dé.

Te té Lèví-áⁿ nǐ ndacuíñí-dé, te ní tuha ñaha-dě xii-gá.

¹⁵ Te té Lèví-áⁿ cuáháⁿ-dé ndihi Jèsús vehe-dé. Te yìhi Jesús mèsá xéxí-gǎ ndihi cue téé xica cuu ndihi-gá, te tnàhá vài cue téé cuihna ìní-xi quide còbrá ñáhá xii ñáyiu cuèndá impuèstú, ndihi dava-gá cue téé ndècu ichi cuehé ichi duha núcòo ndihi ñaha-güedě xii-gá xéxí ndihi ñaha-güedé, te ducaⁿ chí ío vài ñáyiu nchícúⁿ ñáhá xii-gá.

¹⁶ Te sá nǐ xiní cue téé dàcuáha ñaha xii-yu nchaa tnúhu ní chídó tnùní ndíi Moisés, ndihi cue téé cùu fariséú xéxí Jèsús ndihi nchaa cue téé-áⁿ núu ní xicáⁿ tnúhú-güedě núu cuè téé xica cuu ndihi-gá, te xáhaⁿ-güedě:

—¿Ná cuendá ducaⁿ quide tée cùu mestru-ndó xèxi-dé ndihi cue tée cuihna ìní-xi quide cobrá ñáhá xii ñáyiú cuendá impuèstú, ndihi nchaa dava-gá cue tée ndècu ichi cuehé ichi duha-i? — cächí-güedé xǎhaⁿ-güedě.

¹⁷ Te Jèsús ní tecú dóho-gá nàcuáa ndùu tnúhu ní xáhaⁿ-güedě xii cue tée xica cuu ndihi-gá, núu ní xáhaⁿ-gǎ xii-güedé:

—Nchaa ñáyiú ñá túú cùhú chi ñá túú xìni ñuhú-yu ñátátná, dico nchaa ñáyiú cùhú chi xìni ñuhú-yu ñátátná. Te yúhú véxi-í cǎháⁿ-í ñáyiú cùtnuní ìní-xi sá ndécú cuèchi-xi te ñá túú vèxi-í cǎháⁿ-í ñáyiú cächí sá ñà túú ndècu cuèchi-xi — cächí-gá xǎhaⁿ-gǎ xii-güedé.

Cuendá cue ñáyiú ñá túú tnàhí ná xéxí áma cǎháⁿ ndihí-yu Yá Ndiǒxí

(Mt. 9:14-17; Lc. 5:33-39)

¹⁸ Te cue tée xica cuu ndihi té Juàá, ndihi cue tée xica cuu ndihi cue tée cùu fariséú ñá túú tnàhí ná xéxí-güedé áma cǎháⁿ ndihi-güedé Yá Ndiǒxí. Te ìⁿ nduu ducaⁿ xǐquide-güedé, te ní sáháⁿ ñáyiú ní xicáⁿ tnúhǔ-yu núu Jèsús, te xǎhǎⁿ-yu xii-gá:

—Cuìní-ndí cachí tnúhu-n ñá cuendá cue tée xica cuu ndihi té Juàá, ndihi cue tée xica cuu ndihi cue tée cùu fariséú ñá túú tnàhí ná xéxí-güedé áma cǎháⁿ ndihi-güedé Yá Ndiǒxí, te cue tée xica cuu ndihi-n ñá túú dùcaⁿ quide-güedé —cächí-yu xǎhǎⁿ-yu xii-gá.

¹⁹ Te Jèsús ní xáhaⁿ-gǎ xíi-yu:

—Nchòhó xìní-ndó sǎ vǎ cúú cǔñaha-o xii ñáyiú ñùhu vico tnándaha sá vǎ cúú cǎxí-yu ñini ndècu ndihi ñaha tée tnándaha xíi-yu.

20 Dico sáá nduu te vá cündècu ndihì ñaha-gá téé tnãndaha-án xii-yu, te dàvá-án te cahni iní-yu vá cáxí-yu cuëndá sá ndihú iní-yu.

21 Te vá yõo ìn dándée luha dóó sáá ìn dóó sa ní cuu tühú víhí, chi dóó sáá-án nãndiyi-xi te uuⁿ-gá ndata-xi dóó sà ní cuu tühú-án.

22 Te ni vã yõo ìn chihì ndidí sáá xití ìn lamba sa ní cuu tühú víhí, chi núu yoo ducaⁿ na càda te ndava lamba sa ní cuu tühú-án, chi ío níhi yóco ndidí-án, te cuíta-ni ndidí-án te cuíta-ni lamba-án te núu ducaⁿ na càdá-yu. Núu xíáⁿ xíní ñùhu-xi quée ndidí sáá-án xití ìn lamba saa —càchí-gá xãhaⁿ-gã xii-yu.

Cue téé xìca cuu ndihì Jesús sãhnú-güedé yoco triú nduu ndètatú ñáyiu

(Mt. 12:1-8; Lc. 6:1-5)

23 Te ìn nduu cùu-xi nduu ndetatú ñáyiu ñùhu Jesús ichi ndihì cue téé xìca cuu ndihì-gá, te ta yãha-gá ndihì-güedé ìn xichi núú cáá triú, te ní ngüíta-güedé sãhnú-güedé yoco triú-án.

24 Te cue téé cùu fariséú ní xáhaⁿ-güedě xii-gá:

—¿Ná cuëndá ducaⁿ quide cue téé xìca cuu ndihì-n sãhnú-güedé yoco triú vitna cùu-xi nduu ndetatú-i? Te ñá túú tàú-güedé ducaⁿ càda-güedé —càchí-güedé xãhaⁿ-güedě xii-gá.

25 Te ní xáhaⁿ-gã xii-güedé:

—¿Te náa vátá dácuaha tnahi-gá-ndó núú tütú Yã Ndiõxí núú càháⁿ-xi nãcuáa ní quide ndíi Dãvií cútnàhá ní xíhí ndíi docó ndihì cue téé ní xica cuu ndihì ndíi-án?

26 Te dàvá-án nĩ xíndecu ìn téé ní xínani Abiàtár ní cuu-dé dútú cúnùu, te ndíi Dãvií ní quíhu ndíi xití vehe Yá Ndiõxí ní queheⁿ ndíi pàá ní cuu

íí ndécú-ǎⁿ nǐ dácǎhñu ndíi cue téé ní xica cuu ndíhi ndíi ní xexi ndíi ndíhi-güedé, te mee-ni cuè dútú tàú-güedé caxi-güedé pàá-áⁿ ní cùu –cachí-gá xǎhaⁿ-gǎ xii-güedé.

²⁷ Te ní xáhaⁿ tucu Jesús xii-güedé:

–Mee Yǎ Ndiǒxí ní taxi ndecu-gá nduu ndètátú ñáyiu, te ñá túú ní càchí-gá sá mée-yu nándi cani iní-yu cadá-yu canehe íí-yu nduu ndètátú-yu-áⁿ.

²⁸ Te yúhú Téé cùu ñaní tnáhá-ndó nchàa-ndo, tnàhá-í ndécú ndíhi-í tnúhu ndee iní sá cùu-í nchaa ñáyiu nàcuáa cadá-yu nduu ndètátú-ó-áⁿ –cachí-gá xǎhaⁿ-gǎ xii-güedé.

3

*Íⁿ téé ní yíchí ìⁿ xio ndaha-xi
(Mt. 12:9-14; Lc. 6:6-11)*

¹ Te Jèsús cuánguìhu tucu-gá xití veñúhu, te xití veñúhu-áⁿ ndécú ìⁿ téé ní yíchí ìⁿ xio ndaha-dé.

² Te xíaⁿ ndécú cuè téé xìto dayuhu ñaha xii-gá, te núu cada tátna-gá téé cùhú-áⁿ nduu cùu-xi nduu ndetátú-güedé ndíhi ñáyiu, cuèndá ducaⁿ te níhí-güedé nàcuáa cada-güedé cacáⁿ cuéchi-güedé cuèndá-gá.

³ Te ní xáhaⁿ-gǎ xii téé cùhú ndaha-xi-áⁿ:

–Ndacuíñí te ngúnutnì-n cuǎdava iha –cachí-gá xǎhaⁿ-gǎ xii-dé.

⁴ Te ní xícáⁿ tnúhú-gǎ núu-güedé, te xǎhaⁿ-gǎ:

–Chí càchí tnúhu ná cúú sǎ cúú càda-o nduu ndetátú-ó. ¿Sá vǎha ñǎ sá cuèhé? ¿Sá cadá tátna-o ñáyiu cùhú ñǎ sá cáhni-ó-yu? –cachí-gá xǎhaⁿ-gǎ xii-güedé.

Dico ni ìⁿ-güedé ñá túú tnàhí ni cǎháⁿ-güedé.

⁵ Te Jèsús ní xíndéhé vǎha-gá núú nchàa-güedé te ní cudééⁿ-gǎ, te ní ndíhú iní-gá chi ío sàá iní-güedé, te ní xáhaⁿ-gǎ xii tée cùhú ndaha-xi-áⁿ:

—Ndocani ndaha-n —càchí-gá xáhaⁿ-gǎ xii-dé.

Te ní ndocani-dé ndaha-dé, te òré-ni-áⁿ nǐ ndúha.

⁶ Te cue tée cùu fariséú ní xica-güedé cuáháⁿ-güedé ìⁿ xichi núú nǐ naníhí tnáhá-güedé ndíhi cue tée cùndíhi té Hèrodés cuendá ndatnúhu-güedé nása cada-güedé cahni-güedé Jèsús.

Cuéhé víhí ñǎyiu ní quexìo yuhu lagúná

⁷ Te Jèsús ní xica-gá cuáháⁿ-gá ndíhi cue tée xica cuu ndíhi-gá yuhu làgúná distritú Galileá, te ío cuéhé ñǎyiu distritú-áⁿ nchìcúⁿ ñáhǎ-yu xii-gá cuáháⁿ.

⁸ Te núú nǐ quexìo-gá-áⁿ nǐ sáháⁿ ñáyiu distritú Jùdeá, ñáyiu ñúú Jerusàlén, ñáyiu distritú Idùmeá, ñáyiu xíndecu ndàa ingá xio yúte Jòrdán, ndíhi ñáyiu xíndecu yatni ñúú Tìrú ndíhi ñúú Sídón, te ducaⁿ ío vǎi-yu ní sáháⁿ núú ndécú-gǎ chi ní níhǐ-yu tnúhu nchaa nàcuáa quìde-gá.

⁹ Te Jèsús ní xáhaⁿ-gǎ xii cue tée xica cuu ndíhi-gá sá cádá tǔha-güedé ìⁿ bàrcú cuendá caa-gá núú-xi cuendá sá vǎ dádèhnde ñáhǎ-yu xii-gá chi ío cuéhě-yu.

¹⁰ Te sá dúcáⁿ nǐ níhǐ-yu tnúhu sá quidé tǎtna-gá ñáyiu cùhú, núú xǎⁿ nchaa dava-gá ñáyiu cùhú súúní dícó ngõnchihi tnáhǎ-yu cuáháⁿ-yu núú ndécú-gǎ cuìní-yu tnándeé ñáhǎ-yu xii-gá cuendá sá cuìní-yu ndúha-yu.

11 Te cue ñáyiú yìhi ñaha espíritú cúndìhi yucu ñávãha ní sanu xiti ñàha-xi xií-yu núú Jèsús òré ní xiní ñáhá-xí xì-gá, te xíãⁿ ní quide níhi ní cáháⁿ-yu, te xáhãⁿ-yu xii Jèsús:

—jYòhó cúú-n Dèhe Yá Ndiõxí! —càchí-yu xáhãⁿ-yu xii-gá.

12 Te Jèsús ní tenàá-gá nchaa espíritú cúndìhi yucu ñávãha-áⁿ, te ní xáhaⁿ-gã xii nchaa ñáyiú ní xíhi-xi-áⁿ sã vã càháⁿ-yu núú ñáyiú yoo cùu-gá.

Jèsús cãxi-gá úxúú tnàhá cue téé dacuàha ñaha xii ñáyiú tnúhu-gá

(Mt. 10:1-4; Lc. 6:12-16)

13 Te sátá dúcáⁿ ñi cuu te Jèsús ní sáá-gá ñⁿ yucu, te xíãⁿ ndécú-gã ní cana-gá nchaa cue téé càchí iní-gá. Te òré ní quexìo nchaa cue téé-áⁿ núú-gã,

14 te ní cáxi-gá úxúú tnàhá cue téé caca cuu ndihí-gá, te diu-ni cue téé-áⁿ tendaha-gã quíhíⁿ-güedé cáháⁿ-güedé tnúhu-gá núú ñáyiú.

15 Te ní sáñaha-gã xii-güedé tnúhu ndee ìní cun-decu ndihí-güedé cuendá cada tátna-güedé ñáyiú cùhú, ndihí cuendá queñuhu-güedé nchaa espíritú cúndìhi yucu ñávãha yìhi ñaha xii ñáyiú.

16 Te duha xñani ndi úxúú cue téé-áⁿ: ñⁿ-dé nání-dě Xímú, te mee-gã ní taudìu ñaha-gá xii-dé sá cúnàni-dé Pèlú.

17 Te ñngá-dé nání-dě Jàcobó, te ñngá-dé nání-dě Juàá, te ñnání té Jàcobó-áⁿ cúú tẽ Juàá te ndi ndùú-güedé cúú-güedé déhe té Zebèdeú, te ndi ndùú cue téé-áⁿ ñi dánání ñàha Jesús xii-güedé Boànergés, te tnúhu-áⁿ quée-xí: Cue téé ío yáchí cúdééⁿ, duha quèe-xi tnúhu-áⁿ.

18 Te duha xĩnani dàva-gá-güedé: Té Ndrĩxí, té Lìpé, té Bartolòmé, té Màteú, té Mǎxí, té Jàcobó déhe té Àlfeú, té Tàdeú, té Xĩmú tée ní cundihi cue tée canànistá ní cùu,

19 ndihi té Jùdás Iscàrioté tée ní sáá nduu ñí sáha cuendá ñáhá xii Jesús núú cuè tée cùu úhú iní ñáhá xii-gá, duha xĩnani cuè tée ní cáxi Jèsús ní xica cuu ndihi-gá.

Càchí-güedé sá ndécú ndihi Jesús yucu ñávãha dico ñá ndàá

(Mt. 12:22-32; Lc. 11:14-23; 12:10)

Te sátá dúcáⁿ te cuáháⁿ-gá ndihi-güedé núú quidé vèhe-gá.

20 Te ío vai ñáyiú ní tacá-ni tucú-yu xíaⁿ, te ni ñá ní ñhí-gǎ nása cada-gá caxi-gá ndihi cue tée xica cuu ndihi-gá cuendá sá ío vai-yu.

21 Te cue ñáyiú cùu ndi mee Jesús ní níhĩ-yu tnúhu nchaa nàcuáa cùu, te nchaa ñáyiú ñá cùtnuní váha iní-xi ní cachí-yu sá ñí nduu lùcú-gá ñúu xíaⁿ cuáháⁿ ñáyiú cùu ndi mee Jesús núú ndécú-gǎ cuendá candeca ñàhá-yu xii-gá núhú ní cùu.

22 Te cue tée dàcuaha ñaha xii ñáyiú nchaa tnúhu ní chídó tnùní ndíi Moisés véxi ndéé ñuú Jerusàlén ní cáháⁿ cuèhé-güedé cuendá Jèsús, chi ní xitnàha-güedé:

—Tée-a ndècu ndihi-dé sácuihná, te diu xíaⁿ chíndèe ñaha-xi xii-dé quèñùhu-dé nchaa espíritú cùndihi-xi yihí ñaha xii ñáyiú, te diu-ni-xi tàxi tnuní-xi nchaa espíritú-áⁿ —duha ní xitnàha-güedé.

23 Te Jèsús ní cana ñaha-gǎ xii-güedé, te ní cani-gá ñⁿ cuèndú núú-güedé nàcuáa tecú tnùní-güedé tnúhu-gá, te xáhaⁿ-gǎ xii-güedé:

—¿Te nása cada sácuíhná queñuhu-xi cue espíritú cúndìhi-xi yìhi ñaha xii ñáyiu-í?

24 Te nchòhó xìní-ndó sã nõu ìⁿ tée yìndaha ìⁿ nacióⁿ vá cúú ìⁿnuu-dé ndìhi cue tée cùndìhi-dé, te vá cúđi-dé cunuu-dě.

25 Te ðiu-ni ðucaⁿ sãtnahá-xi cùu tucu ñáyiu xĩndecu ìⁿ-ni vèhe, chi núu vá cúú ìⁿnuú-yu, te vá cúđi-yu cundecu càhnú-yu.

26 Te núu sácuíhná ñà túú cùu ìⁿnuu-xi ndìhi cue espíritú cúndìhi-xi, te vá cúđi-xi cundecu-xi taxi tnùnì-xi te núu ðucaⁿ quìde-xi.

27 Te nchòhó xìní-ndó sã cuè ñadúhú chi vá ndácú-güedě cuendá-ni quíhu-güedé duhu-güedě vehe ìⁿ tée ío ndee, chi díhna-gá xìní ñùhu-xi tñi-güedé tée-áⁿ dacùtu ñaha-güedé xii-dé dãtnùnì ðucaⁿ te ndacu-güedé duhu-güedě nchaa sá ndécú ndìhi-dé.

28 Te na càchí tnúhu ndáá-í xii-ndo sã ncháá sã cuèhé sá dúhá quide ñáyiu, ndìhi nchaa tnúhu cuèhé tnúhu duha càháⁿ-yu cuendá Yã Ndiõxí cuu cada càhnu iní-gá.

29 Dico cue ñáyiu na càháⁿ cuèhé cuendá Espíritú Yã Ndiõxí, ñáyiu-áⁿ vã cádá càhnu iní ñáhá tñhí-gá xií-yu, chi cundecu-ni cuéchi-yu núú-gã ni caa ni quíhíⁿ —càchí-gá xãhaⁿ-gã xii-güedé.

30 Te ðucaⁿ ñí cáháⁿ-gá chi càchí-güedé sá ndécú ndìhi-gá espíritú cúndìhi yucu ñávãha.

*Nãná Jèsús ndìhi cue ñanì-gá
(Mt. 12:46-50; Lc. 8:19-21)*

31 Te ní quexio náná Jèsús ndìhi cue ñanì-gá núú ndécú-gã xĩnutnìi-yu quehé, te ní xáhãⁿ-yu xii ìⁿ

ñáyiú xĩndecu-áⁿ sǎ dáyǎha-yu tnúhu núú-gǎ cuendá quee-gá ndatnúhu ndihí ñaha-gǎ xií-yu.

³² Te cue ñáyiú xĩnucóo ní càndéé dìñi-gá ní xáhǎⁿ-yu xii-gá:

—Nǎná-n ndihí cue ñaní-n ndécú-yu quehé nándùcu ñahá-yu xii-n —càchí-yu xǎhǎⁿ-yu xii-gá.

³³ Te Jèsús ní xáhaⁿ-gǎ xií-yu:

—Te cachí tnúhu-ndo yǒndi-gá ñáyiú cùu datná nǎnà-í ndihí dàtná cue ñaní-í —càchí-gá xáhaⁿ-gǎ xií-yu.

³⁴ Te dǎtnùní ní xíndéhé vǎha-gá núú nchàa ñáyiú xĩnucóo ní càndéé dìñi-gá-áⁿ, te ní xáhaⁿ-gǎ xií-yu:

—Nchaa ñáyiú-a cùú-yu dàtná nǎnà-í ndihí dàtná cue ñaní-í.

³⁵ Chi nchaa ñáyiú quìde nacuáa càháⁿ Yǎ Ndiǒxí, ñáyiú-áⁿ cùú-yu dàtná cue ñaní-í, ndihí dàtná cue cúha-í, ndihí dàtná nǎnà-í —càchí-gá xáhaⁿ-gǎ xií-yu.

4

Nàcuáa quìde tée cuángacáⁿ triú

(Mt. 13:1-9; Lc. 8:4-8)

¹ Te Jèsús ní ngüíta-gá dáciuaha tucu-gá ñáyiú yuhu làgúná. Te cuéhé víhí-yu ní tacá xiáⁿ nũu cuásaá-gá núú ïⁿ bàrcú nútnĩ xití ndute làgúná-áⁿ, te núú xǎⁿ ní ngóo-gá te ní ngüíta-gá dánéhé ñáhá-gǎ xií-yu, te ncháa-yu xixúcu-yu yuhu làgúná-áⁿ.

² Te ní ngüíta-gá ní cani-gá titní cuèndú núü-yu nàcuáa tecú tnùní-yu tnúhu-gá, te xáhaⁿ-gǎ xií-yu:

³ —Chí cúndèdóho váha ïⁿ cuèndú ná càni-í-a. ïⁿ tée cuángacáⁿ-dé triú.

⁴ Te òré ní ngüíta-dé dǎngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatàcá-güedi.

⁵ Te dava ní ngava ñuhu yadi nǔú yíhí vèhi yúú, te ndǐhi-ni ní xínu-xi cuèndá sá ñà túú cavihi ñuhu.

⁶ Dico òré ní nayehé ñá túú ní cùndee iní-xi chi ní yíhí-xi, chi ñá túú ní ñhí quǐhíⁿ cùnú yóho-xi.

⁷ Te dava ní ngava núú yúcu ndǐquíⁿ tnu ññu, te ñⁿnuu-ni ñ xínu-xi ndihí tnu ññu, te tnu ññu-áⁿ ñ sahnú-xi te ní dánáá-xí nchàa triú sá ñ xínu-áⁿ.

⁸ Dico dava triú-áⁿ ñ ngava-xi núú ndécú ññuhu cocóⁿ, te xíáⁿ ní xínu-xi te ní sahnú-xi te ío váha ní cuu, chi núú ñⁿ-ní triú-áⁿ te dava yoco-xi ní nguíhi ócó úxí triú-xi, te dava yoco-xi ní nguíhi únídico triú-xi, te dava yoco-xi ní nguíhi ñⁿ cièndú triú-xi —càchí-gá xǎhaⁿ-gǎ xií-yu.

⁹ Te xǎhaⁿ tùcu-gá xií-yu:

—Nchaa nchòhó ñáyiú ní xíndedóho nchaa tnúhu ní cáháⁿ-í-a, te ío váha chí cuǎha cuèndá —càchí-gá xǎhaⁿ-gǎ xií-yu.

*Jèsús càháⁿ-gá ná cuèndá ducaⁿ cani-gá cuèndú
(Mt. 13:10-17; Lc. 8:9-10)*

¹⁰ Te sátá ñ ndaca ñáyiú-áⁿ te ní quendóo mee-ñǎ Jèsús ndihí cue téé xíca cuu ndihí-gá, ndihí ñⁿ ùú-ñǎ ñáyiú. Te ñáyiú-áⁿ ndihí cue téé-áⁿ ñ xícaⁿ tnúhǔ-yu ndihí-güedé núú-gǎ, núú nása quèe-xi cuèndú ní cani-gá núú-yu ndihí-güedé.

¹¹ Te ní xáhaⁿ-gǎ:

—Nchòhó chi sa càchí tnúhu Yá Ndiöxí xii-ndo ñⁿ sá vǎtá quíní-gá-ndó, chi càchí tnúhu-gá nàcuáa

cada-gá ndíhu ndaha-gă ñáyiu, dico dava-gá ñáyiu cànì-í mee-ni cuèndú núú-yu.

¹² Chi cuèi na quínì-yu nchaa nàcuáa cuu dico ni vă cútnùní iní-yu ná cuèndá ducaⁿ cùu, àdi cuéi na cùndedóho-yu dico ni vă tècú tnùnì-yu. Te ducaⁿ ndòhó-yu cuèndá sá vă quìndáá iní-yu Yá Ndiöxí, ndíhi cuèndá sá vă cádá càhnu iní-gá nchaa yíca cuèchi-yu –càchí-gá xăhaⁿ-gă xií-yu ndíhi-güedé.

Jèsús càháⁿ-gá nàcuáa quèe-xi cuendá téé cuángacáⁿ triú

(Mt. 13:18-23; Lc. 8:11-15)

¹³ Te ní xăhaⁿ tùcu Jèsús xii cue téé xica cuu ndíhi-gá, ndíhi cue ñáyiu-áⁿ:

–Nchòhó, ñá túú ní tècú tnùnì-ndó cuèndú ní canì-í núú-ndó, te núu ducaⁿ, ¿te nása tecú tnùnì-ndó dàva-gá cuèndú canì-í núú-ndó-í? Te na càchí tnúhu-í xii-ndo nàcuáa quèe-xi cuèndú ní canì-í núú-ndó.

¹⁴ Te téé cuángacáⁿ triú-áⁿ cúú-dě dàtná ìⁿ téé cuáháⁿ càháⁿ tnúhu Yá Ndiöxí núú ñáyiu.

¹⁵ Te triú-áⁿ cúú-xí dàtná tnúhu Yá Ndiöxí, te triú sá ñí quene ndava ní ngava ndéé ichi, xíáⁿ cúú-xí dàtná ñáyiu ní tnahá iní-xi tnúhu Yá Ndiöxí, dico sácuíhná cuáháⁿ-xi xòcani-xi tnúhu-gá iní-yu cuèndá sá vă cànchícúⁿ nihnú-yu nàcuáa càháⁿ tnúhu-áⁿ.

¹⁶ Te triú sá ñí ngava ñuhu yadi núú yíhí vèhi yúú, xíáⁿ cúú-xí dàtná ñáyiu ní xíndedóho tnúhu Yá Ndiöxí te díí ìní ní tnií-yu tnúhu-gá.

¹⁷ Dico òré ná ngüíta ñáyiu cúcuèhé ñáhă-yu xií-yu àdi nándi-gá sá yăha-yu sá cuèndá tnúhu-gá,

te ñá cùndèe iní-yu chi dàñá-yu tnúhu-gá cuendá sá ñá túú ñihí ndéé-yu.

18 Te triú sá ñi ngava núú yúcú ndíquíⁿ tnu ññu xíáⁿ cúú-xí dàtná ñáyiú ní tecú dóho-xi tnúhu Yá Ndiöxí,

19 dico cuèé cuèé ní nacuanaá-yu tnúhu-gá, chi cuendá mee-ni sá cúú-xí mée-yu ññu iní-yu, ndihí cuendá sá ño sàni iní-yu cuu cuicá-yu, ndihí cuendá sá ño cùdí ñni-yu nchaa sá ío ñuyíú-a, te ñá túú ññu iní-yu tnúhu sá ñi xíndedóho-yu-áⁿ nàcuáa cada váha-yu cundecú-yu.

20 Dico triú sá ñi ngava núú ndécú ññu cocoⁿ, xíáⁿ cúú-xí dàtná ñáyiú ní xíndedóho tnúhu Yá Ndiöxí te quidé-yu nchaa nàcuáa càháⁿ tnúhu-áⁿ. Te cada iní-ndó sá ñáyiú-áⁿ cúú-yu dàtná triú sá ñi nguíhi yoco-xi ócó úxí triú-xi, ndihí triú sá ñi nguíhi yoco-xi únídico triú-xi, ndihí triú sá ñi nguíhi yoco-xi ññ ciendú triú-xi. Te ducaⁿ sátnhá-xi cùú-yu chi ío váha quidé-yu —càhí-gá xáhaⁿ-gá xii cue téé xica cuu ndihí-gá ndihí cue ñáyiú-áⁿ.

Cuendá iti
(Lc. 8:16-18)

21 Te xáhaⁿ-gá xii nchaa ñáyiú:

—Ñá túú ñi ññ ñáyiú tèñuhú iti te chiváha-yu ññ xítí quídi, àdi chiváha-yu ññ caha càamá, chi tàxi ndecú-yu ññ núú dùcúⁿ cuendá cutnùní núú nchaa ñáyiú.

22 Te ñi ññ tnúhu sá ñá tècú tnùní ñáyiú vitna cachí-ó sá vă tècú tnùní-yu chi dacuítí sá tècú

tnùní-yu, te ni ìⁿ tnúhu sá cächí-ó cùu yuhu vitna vá cúu yùhu chi dacuítíí sã quéé tũu-xi núú ñáyi.

²³ Te nchòhó cue ñáyi ní xíndedóho nchaa tnúhu ní cáháⁿ-í-a, te ío váha chí ná cuãha cuèndá — cächí-gá xãhaⁿ-gã xií-yu.

²⁴ Te ní xáhaⁿ tùcu-gá:

—Ío váha chí cúndedóho tnúhu na càháⁿ-í-a. Te nàcuáa-ni quide-ndo danehé-ndó ñáyi tnúhu Yá Ndiõxí, te ñiu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúú-xí-ndó.

²⁵ Te nchaa nchòhó ñáyi tècú tnùní tnúhu Yá Ndiõxí, uuⁿ-gá cuita tecú tnùní-ndó tnũhu-gá quíhíⁿ. Te nchaa nchòhó ñáyi ñã túú tècú tnùní tnúhu-gá, te uuⁿ-gá vá tècú tnùní-ndó —cächí-gá xãhaⁿ-gã xií-yu.

Nàcuáa sàhnu triú

²⁶ Te Jèsús xãhaⁿ tùcu-gá:

—Na càni-í ìⁿ cuèndú núú-ndó cuèndá tecú tnùní-ndó nàcuáa cada-xi òré ndíhu ndaha ñàha Yá Ndiõxí xii ñáyi. Ìⁿ tée cuángacáⁿ-dé triú.

²⁷⁻²⁸ Te sátá ñí yáha ní sacáⁿ-dé triú-áⁿ, te cuánuhú-dé vehe-dé ndétátú-dé. Te ducaⁿ-ni ta xìca nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu ñí quene yoco-xi te ní nguíhí triú-xi, dico tée ní sacáⁿ triú-áⁿ ñà túú xìní-dé nása ní sahnu-xi, chi mee ñùhu ní quide-xi ní sahnu triú-áⁿ.

²⁹ Te òré sa ní ndíhí ní cuaaⁿ te ní nguíta tée ní sacáⁿ-áⁿ náquèhndé-dé nátàxi tnahá-dé —cächí-gá xãhaⁿ-gã xií-yu.

*Cuendá ndíquíⁿ yutnu nàni mostázá
(Mt. 13:31-32; Lc. 13:18-19)*

³⁰ Te xãhaⁿ tucu Jesús xií-yu:

—Na càni tucu-í ingá cuendú núú-ndó cuendá tecú tnùní-ndó nàcuáa cada-xi òré ndíhu ndaha ñaha Yá Ndiõxí xii ñáyiu.

³¹ Iⁿ yutnu nàni mostázá cúú-xí iⁿ yutnu sá lĩhli vìhi-gá ndíquíⁿ-xi dàcúúxí ndíquíⁿ nchaa cúhú,

³² dico òré ná càcáⁿ-güedé núú ñhúhú-güedě, te na xĩnu-xi te sàhnu-gá-xi dàcúúxí nchàa cúhú, te nchaa dité-xi ío cùu cahnu-xi, te ndéé cue quiti ndàva núú tàchí sácõo-güedi nchaa núú dité-xi xĩnu ndeti-güedi —cachí-gá xãhaⁿ-gã xii-yu.

*Ío titní cuendú ní cani Jèsús núú ñáyiu
(Mt. 13:34-35)*

³³ Te ío-gá vãi cuendú ní cani Jèsús núú ñáyiu cuendá tecú tnùní-yu tnúhu Yá Ndiõxí, dico dava cuendú ñá túú ní càni-gá núú-yu, chi ní cutnùní iní-gá sá vã tècú tnùní-yu nchaa.

³⁴ Te mee-ni cuendú ní cani Jèsús núú ñáyiu ndi tnahá òré ní dánèhé ñáhá-gã xií-yu tnúhu-gá. Te òré ndécú mèe Jesús ndihí cue tée xìca cuu ndihí-gá, te ní xáhaⁿ-gã xii-güedé nàcuáa quèe-xi iⁿ iⁿ cuendú ní cani-gá núú ñáyiu.

*Jèsús ngání-gã táchí ndihí ndute làgúná
(Mt. 8:23-27; Lc. 8:22-25)*

³⁵ Te diu-ni nduu-ãⁿ òré sa ta cùndiquiⁿ cuáháⁿ ní xáhaⁿ Jèsús xii cue tée xìca cuu ndihí-gá:

—Chí ná quihíⁿ-ó ndàa ingá xio yuhu làgúná —càchí-gá xãhaⁿ-gã xii-güedé.

36 Te ní quide ndee ìní-gá nchaa ñáyiú xǐxúcu-án, te ðiu-ni bàrcú sá ñúhú-gǎ òré ní dánèhé-gá ñáyiú tnúhu-gá ðiu-ni xǐǎⁿ ní dácácá cuè téé xica cuu ndihí-gá ndécá ñàha-güedé xii-gá cuáháⁿ, te tnàhá ìⁿ úú-gá bàrcú ní xica-xi nchìcúⁿ-xi bàrcú ñúhú-gǎ-áⁿ cuáháⁿ.

37 Te ñùhu barcú ñúhú-gǎ-áⁿ ichi cuáháⁿ-xi núú ndute, te ní quexìo ìⁿ táchí ñihí, te ta nàdachitú-xi ndute xití bàrcú-áⁿ cuáháⁿ, te sa cuìní-nǎ-xi quée naa bàrcú-áⁿ xití ndute ni cùu.

38 Te Jèsús cáá-gǎ xídí-gá ìⁿ xichi ndàa sátá bàrcú-áⁿ, te yìnchihi ìⁿ dóó ðǐquí-gǎ. Te sá dúcáⁿ cuìní-xi quée naa bàrcú-áⁿ nǔu ní sáháⁿ-güedé ní ndocani ñàha-güedé xii-gá, te xǎhaⁿ-güedé:

—ìMèstrú, ndìquíú ìní! ¿Náa ñá túú ndìhú ìní-n sǎ tá quée naa-o cuáháⁿ-ǎⁿ? —càchí-güedé xǎhaⁿ-güedé xii-gá.

39 Te Jèsús ní ndìquíú ìní-gá te ní ndacóo-gá, te ní tenàá-gá táchí-ǎⁿ, te ní xáhaⁿ-gǎ xii ndute làgúná:

—ìTnavíí-nǎ cuhuⁿ, chi ío dusaⁿ! —càchí-gá xǎhaⁿ-gǎ xii ndute-áⁿ.

Te òré-ni ní ngüíñí táchí-ǎⁿ te ní nucúndecu nahi-nǎ ndute làgúná-áⁿ.

40 Te Jèsús ní xáhaⁿ-gǎ xii-güedé:

—¿Ná cuendá ndéé dúcáⁿ yùhú-ndó-í? ¿Náa ñá túú sàndáá ìní ñáhá ndìsa-ndo xii-í-ǎⁿ? —càchí-gá xǎhaⁿ-gǎ xii-güedé.

41 Dico mee-güedé chi ío ní yùhú-güedé sá ducaⁿ ñí quide-gá ní xiní-güedé, te ní xítñàha-güedé:

—¿Te ná téé cùu téé-a núu ní cáháⁿ-ni-dé, te ní ngüíñí táchí te ní nucúndecu nahi ndùte làgúná-a-í? —càchí-güedé xítñàha-güedé.

5

Ɔⁿ tée yìhi ñaha espíritú cúndìhi yucu ñávãha
(Mt. 8:28-34; Lc. 8:26-39)

¹ Te ní sáá Jèsús ndihi cue tée xìca cuu ndihi-gá ndàa ingá xio yuhu làgúná yucu cue tée ñúú Gàdará.

² Te òré ní quene-gá xítí bàrcú te ɛⁿ tée yìhi ñaha espíritú cúndìhi yucu ñávãha ní quee-dé núú yíndũxi ndíyì cuáháⁿ-dé núú-gã.

³ Te mee-ni núú yíndũxi ndíyì-áⁿ quidé vèhe-dé, te cuèi dàcutu ñaha-güedé cadèná xii-dé dico ñá túú tnhí ndàcu-güedé núú-dě.

⁴ Te ío titní xito ní dácútú-güedě cadèná sáhá-dě ndihi ndaha-dé dico ní dándává-ni-dě, te ní xóo dacàchi-gá-dé nchaa cadèná-áⁿ, te ñá túú tnhí ni ndàcu-güedé núú-dě.

⁵ Te cuèi nduu cuèi niú ní xóo cana saa-dé, te váha-ni núú xítí yucu ndècu-dé àdi núú yíndũxi ndíyì dico càna saa nahi-ni-dé, te ío ní xóo dānīcuèhé-dé mée-dě ndihi yúú.

⁶ Te òré ní xiní-dé Jèsús te xìnu-dé ní sáháⁿ núú-gã, te ní ngüíñí xítí-dě,

⁷ te espíritú yíhí ñaha xii-dé-áⁿ nǐ quide-xi níhi ní cáháⁿ-dé, te xãháⁿ-dě xii-gá:

—ǎ Ná cuendá véxi yòhó Jèsús Déhe Dútú Ndiõxí sàdí-n ìchi-í? Te càháⁿ ndàhú-í núú Ndiõxí yuhu nǔú-n sǎ vǎ dándòho ñaha-n xii-í —càchí-dé xãháⁿ-dě xii-gá.

⁸ Te ducaⁿ nǐ cáháⁿ-dé cuendá sá Jèsús ní xãháⁿ-gã xii espíritú cúndìhi yucu ñávãha yìhi ñaha xii-dé-áⁿ sǎ quéé ñaha-xi xii-dé.

9 Te Jèsús ní xicáⁿ tnúhú-gă núú-dě, te xăhaⁿ-gă:
—¿Nása nàni-n-i? —cachí-gă xăhaⁿ-gă xii-dé.

Te ní xáhaⁿ-dě:

—Vài Sandadú, duha nàni-í chi ío cuéhé-ndĩ —
càchí-dé xăhaⁿ-dě xii-gá.

10 Te cue espíritú cúndìhi yucu ñávăha-áⁿ nĩ cáháⁿ
ndàhú-xi núú Jèsús sá vă téndàha ñaha-gá xii-xi
quíhíⁿ-xi íngá xichi.

11 Te ñu-ni yatni yucu núú ndécú Jèsús-án yíhí
vài cuchí xixexi-güedi.

12 Te nchaa cue espíritú-áⁿ nĩ cáháⁿ ndàhú-xi
núú-gă, te xăhaⁿ-xi xii-gá:

—Cáháⁿ ndàhú-ndí núú-n să dáñá-n quíhu-ndí
yiqui cùnú nchaa cùchí-ăⁿ —càchí-xi xăhaⁿ-xi xii-gá.

13 Te Jèsús ní xáhaⁿ-gă sá cúú quíhu-xi yiqui
cùñú-güedi, te xínu dàtná úú mĩl-güedi yíhi yucu-áⁿ.
Te nchaa espíritú cúndìhi yucu ñávăha yíhi ñaha
xii téé-áⁿ nĩ quee ñaha-xi xii-dé, te cuánguihu-xi
yiqui cùñú nchaa cùchí-áⁿ, te nchaa-güedi ní
xínu-güedi duha ní quée-güedi ndàa núú dèhvá
yuhu làgúná-áⁿ, te ní ngaunihnu-güedi xití ndute
te ní ndìhi-güedi ní cáhá.

14 Te òré ní xiní cue téé xito cuchí-áⁿ nàcuáa
ní cuu te ní xínu-güedé, te ní sáháⁿ-güedé ní
cani-güedé cuèndú núú cuè ñáyiu ndècu xití ñuú,
ndìhi núú cuè ñáyiu ndècu xití yucu. Te nchaa
ñáyiu ní níhí tnúhu ní xicá-yu cuáháⁿ ndéhě-yu
nàcuáa ní cuu.

15 Te òré ní quexió-yu núú ndécú Jèsús te ní
xiní-yu téé ní xíhi ñaha cuè espíritú cúndìhi yucu
ñávăha-áⁿ núcõo-dé núú sàhá Jèsús, te nihnu-ná-dé

dóo-dě te nùcòo-ná-dé dàtná ìⁿ ñáyiu váha, te ní yùhú-yu òré ní xiní ñáhă-yu xii-dé.

¹⁶ Te nchaa ñáyiu ní xiní nàcuáa ní cuu ní ndúha téé yìhi ñaha cue espíritú cùndìhi yucu ñávăha-áⁿ ní cùu ní caní-yu cuèndú núú nchàa ñáyiu ní quexìo-áⁿ nàcuáa ní cuu ní ndúha téé-áⁿ ndìhi nàcuáa ní cuu cuèndá nchaa cùchí-áⁿ.

¹⁷ Te sá dúcáⁿ ní níhi ñáyiu-áⁿ tnúhu nàcuáa ní cuu núú nchaá-yu ní ngúíta-yu càháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáháⁿ-gá núú ndécú bàrcú, te òré ndée-gá bàrcú-áⁿ nùhú-gá ní ngúíta téé ní xíhi ñaha cue espíritú cùndìhi yucu ñávăha-áⁿ càháⁿ ndàhú-dé núú-gă nùu vá cùndèe iní-gá quíhíⁿ ndìhi ñaha-gă xii-dé.

¹⁹ Dico ñá túú ní săha-gá tnúhu quíhíⁿ ndìhi ñaha-gă xii-dé, te ní xáhaⁿ-gă xii-dé:

—Cuanùhú vehe-n, te cani-n cuèndú núú cue ñáyiu sá Yă Ndióxi ní cundàhú iní ñáhă-gă xii-n, te ío càhnu cuu nchaa sá văha ní quide-gá sá cúú-xí-n —càchí-gá xăhaⁿ-gă xii-dé.

²⁰ Te téé-áⁿ nǐ xica-dé cuánuhú-dé, te ní sáháⁿ-dé ndì ùxí ñuú nání Dècápolís, te ní cani-dé cuèndú núú nchàa ñáyiu sá ío càhnu cuu nchaa sá văha ní quide ñaha Jèsús xii-dé, te nchaá-yu ío ní cuñúhu-yu.

Cuèndá déhe yoco té Jàirú ndìhi cuèndá ìⁿ ñadìhí ní tnándeé dóó Jèsús

(Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehndé-gá ndàa ìngá xio yuhu làgúná, te ío vâi ñáyiu ní tacá núú nǐ quexìo-gá-áⁿ, te xíaⁿ ndécú-gă

22 ní quexìò ìᵛn téé tàxi tᵛnúní veñúhu núú-gǎ, te téé-áⁿ nání-dě Jàirú, te ní ngüíñí xítí-dě núú-gǎ.

23 Te ní ngüíta-dé càháⁿ ndàhú-dé núú-gǎ, te xǎhaⁿ-dě xii-gá:

—Ío càhú tᵛnàhá déhe yoco-í cùhú-xi, te ndècu-ná-xi sá cùú-xi, te véxi-í càháⁿ ndàhú-í núú-n nūu vá cùndèe iní-n quǎhíⁿ-ó vèhe-í tendaha-n-xi cuèndá ndúha-xi, te cundecu-xi — càchí-dé xǎhaⁿ-dě xii-gá.

24 Te Jèsús ní xica-gá cuáháⁿ-gá ndìhi téé-áⁿ, te ío vài ñáyiu nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ni cùu.

25 Te tnuú nchaa ñáyiu-áⁿ ñútnàhá ìᵛn ñaha cùhú, te ñaha-áⁿ sa ní cuu úxúú cuíá sǎ cùhú-aⁿ ngòyo ñaha níñí xii-aⁿ.

26 Te ío ta ndòho-aⁿ véxi, te ío cuéhé ñátátná nǐ cuu ta quide tátna ñaha xii-aⁿ, te sa ní ndìhi nchaa sá ndécú ndìhi-aⁿ ní nadico-aⁿ cuèndá ní níhí-aⁿ díhúⁿ nǐ queheⁿ nchaa ñáyiu ní quide tátna ñaha xii-aⁿ dico ni ìᵛn-yu ñá túú ní ndàcú-yu ndúha-aⁿ, chi da uuⁿ-gá tá cùu cahú-aⁿ cuáháⁿ.

27 Te òré ní níhí-aⁿ tᵛnúhu cuèndá Jèsús, te ní xica-aⁿ cuáháⁿ-aⁿ núú ndécú-gǎ. Te òré ní quexìò-aⁿ núú ndécú-gǎ te ní sáháⁿ ndehe yatni-aⁿ ndàa sátá-gǎ ní tnándeé-aⁿ dóó-gǎ.

28 Te ducaⁿ nǐ quide-aⁿ chi ní sani iní-aⁿ sá nūu ndacu-aⁿ tnándeé-aⁿ cuèdìcò luha yuhu dǒó Jèsús te ndúha-aⁿ ní sani iní-aⁿ.

29 Te òré ducaⁿ nǐ quide-aⁿ te ñá túú-gǎ ní ngòyo ñaha-gá níñí xii-aⁿ, te òré-áⁿ nǐ cutnùnì iní-aⁿ sá nǐ ndúha-aⁿ cuéhé tᵛnàhá-aⁿ.

30 Te Jèsús ní cutnùní iní-gá sá ìíⁿ ñáyiú ní ndúha sá cuendá-gá, núu ní nchócótó-gă ndàa sátá-gă te ní xícáⁿ tnúhú-gă núú nchàa ñáyiú nchìcúⁿ ñáhá xii-gá, te xăhaⁿ-gă xii-yu:

—¿Ndëdacàa-ndo ní tnándeé ñáhá xii-í? —càchí-gá xăhaⁿ-gă xii-yu.

31 Te cue tée xica cuu ndihi-gá ní xáhaⁿ-güedě xii-gá:

—Mèstrú, ndèhe-n sá váí ñáyiú nchìcúⁿ ñáhá xii-n, te texio texio dàdehnde ñahá-yu xii-n te xicáⁿ tnúhú-gă-n yòo ní tnándeé ñáhá xii-n —cachí-güedé xăhaⁿ-güedě xii-gá.

32 Te Jèsús ní xíndéhé văha-gá xio xio diñi-gá núu ndëdacàa ñáyiú ní tnándeé ñáhá xii-gá.

33 Te sá dúcáⁿ ñí cutnùní iní ñadhí-áⁿ nàcuáa ní cuu, núu yùhú yùhú-aⁿ ní sáháⁿ-aⁿ ní ngüíñí xití-áⁿ núú Jèsús, te ní xáhaⁿ ndăá-aⁿ xii-gá nàcuáa ndùu cuendá-aⁿ.

34 Te Jèsús ní xáhaⁿ-gă xii-aⁿ:

—Yòhó ñaha cùhú ní cùu, ní sándáá iní ñáhá-n xii-í, núu ní ndúha-n, te vitna cuanùhú te vá ndìhú-gá iní-n, chi vá dúcáⁿ-gă ndoho-n —càchí-gá xăhaⁿ-gă xii-aⁿ.

35 Te càháⁿ dúcáⁿ-ní Jèsús ní sáá cue tée xinu cuechi vehe té Jàirú té tãxi tnuní veñúhu-áⁿ, te xăhaⁿ-güedě xii-dé:

—Sa ní xihí déhe-n, vá chíchìuⁿ-gá-n Mèstrú —càchí-güedé xăhaⁿ-güedě xii-dé.

36 Dico Jèsús ñá túú ní quide cuendá-gá nàcuáa ndùu tnúhu ní cáháⁿ cue tée-áⁿ, te ní xáhaⁿ-gă xii té tãxi tnuní veñúhu-áⁿ:

—Ñá túú nă cani iní-n, quindáá iní ñáhá-ní-n xii-í —càchí-gá xăhaⁿ-gă xii-dé.

37 Te Jèsús vá yõo-gá ní cuíní-gá canchicúⁿ ñáhá xii-gá quíhíⁿ, chí té Pèlú-ni, ndihí té Jàcobó-ni, ndihí ñaní-ní-dé té Juàá cuáháⁿ ndihí ñaha-gă xii-güedé.

38 Te òré ní quexio-gá ndihí-güedé vehe téé tàxi tnuní veñúhu-áⁿ, te ní xiní-gá sá ïo vâi ñáyiu xĩndecu, te súúní dùsaⁿ quidé-yu te níhi xĩcáháⁿ-yu te xĩndáhí-yu.

39 Te òré cuánguihu-gá xití vehe, te ní xáhaⁿ-gă xii-yu:

—¿Ná cuendá ndéé dúcáⁿ ïo dusaⁿ quide-ndo, te ndàhyú-ndó? Te xíchí-a ñá túú ní xíhí-xi chí dícó xidí-xi —càchí-gá xăhaⁿ-gă xii-yu.

40 Te ní sácú ndeé ñáhă-yu xii-gá sá dúcáⁿ nĩ cáháⁿ-gá, chí sá cúú-xí mèe-yu chí ní xíhí ndisa xíchí-ăⁿ. Te òré-áⁿ nĩ queñuhu-gá nchaá-yu quehé, te cuánguihu-gá núú cándòdo yiqui cuñú xíchí nĩ xíhí-áⁿ. Te ndèca-gá tătá xíchí nĩ xíhí-áⁿ ndihí năná-xi cuánguihu, te tnàhá cue téé úní ndihí-gá-áⁿ cuánguihu ndihí-gá.

41 Te ní tni-gá ndaha xíchí nĩ xíhí-áⁿ, te ní xáhaⁿ-gă:

—Tálíta, cúmí —càchí-gá xăhaⁿ-gă.

Te tnúhu-áⁿ quée-xí: Yòhó xíchí cuéchí yúhú càchí-í sá ndácõo-n, duha quèe-xi tnúhu-áⁿ.

42 Te òré-ni-áⁿ nĩ ndoto xíchí cuéchí-ăⁿ nĩ ndacóo-xi ní nacaca cuu-xi, te ndècu-xi úxúú cuíá-xi. Te ío ní cuñúhu nchaa ñáyiu sá dúcáⁿ nĩ dándótó ñaha Jesús xii-xi.

43 Te Jèsús ní cáháⁿ víhí-gă dóho tătá-xi ndihí năná-xi sá vă yõo ñⁿ cúñàhá-yu sá nĩ dándótó

ñàha-gá xii-xi. Te sátá dúcáⁿ te ní xáhaⁿ-gă xii-yu sá cuãñàhá-yu xii-xi sá cáxí-xí.

6

*Jèsús ndécú-gă ñuú Nazàrét
(Mt. 13:53-58; Lc. 4:16-30)*

¹ Te Jèsús ní ndee-gá ñuú núú nǐ dándótó-gă xíhí nǐ xíhí-áⁿ, te cuánuhú-gá núú cúú ñùú-gá, te tnahá cue téé xíca cuu ndihí-gá cuánuhú ndihí-gá.

² Te ndècu Jesús ñuú-gá ní tnahá nduu ndètatú ñáyíu. Te nduu-ǎⁿ cuãnguìhu-gá xití veñúhu dàcuaha ñaha-gá xii-yu. Te vai ñáyíu ndèdóho nchaa tnúhu càháⁿ-gá, te xícuñúhu vǐhí-yu, te xǐtnàhá-yu:

—¿Ndèé ní sáháⁿ dácúáhá tǐe-a núu ndéé duha váha càháⁿ-dé, nása ní quide-dé núu ndéé duha ío váha cùtnuní iní-dé, te ndàcu-dé quidé-dě nchaa sá vǎ yǒo tnahí ndàcu cada-i?

³ Te dìcò carpintèrú cúú-dě, dìcò déhe tá Màriá cúú-dě, te ñaní-dé cúú tǐ Jàcobó, ndihí té Chèé, ndihí té Jùdás, ndihí té Xímú, te ñíu-ni cue cúha-dé cúú ñáyíu ndècu ndihí-o ñuú-a —càchí-yu xǐtnàhá-yu.

Te ñá túú ní cuìní-gá-yu cáháⁿ ndihí váha ñàhá-yu xii-gá.

⁴ Te Jèsús ní xáhaⁿ-gă xii-yu:

—Te núu ìⁿ téé càháⁿ tnúhu Yá Ndiǒxí ná nàsáá-dé ñuú-dé dacuàha-dé ñáyíu tnúhu-gá, te nchaa ñáyíu ñuú-dé-áⁿ, ndihí nchaa ñáyíu ndècu ndihí-dé vehe-dé, ndihí nchaa ñáyíu cùu ndi mee-dé ñá túú nèhé-yu sá yíñùhu núú-dě, dico cue ñáyíu nchaa dava-gá ñuú chi nèhé-yu sá yíñùhu núú-dě —càchí-gá xǎhaⁿ-gă xii-yu.

⁵ Te ñá túú ní quèide tátna Jèsús vài ñáyiu cuendá sá ñà túú ní sándáá iní ñáhă-yu xii-gá, dico ní quide tátna-gá ìⁿ úú ñáyiu cùhú ní sándáá iní ñáhá xii-gá. Te ní tendaha ñàha-ni-gá xií-yu te ní ndúha-yu.

⁶ Te ío ní cuñúhu-gá sá dúcáⁿ ñà túú ní cuíní-yu quindáá iní ñáhă-yu xii-gá. Te sátá dúcáⁿ te ní xica-gá cuáháⁿ-gá nchaa dava-gá ñúú lìhli càa yatni xíaⁿ cuendá dacuàha-gá ñáyiu tnúhu-gá.

*Jèsús táuchìuⁿ-gá quíhíⁿ cue téé xica cuu ndìhi-gá cáháⁿ-güedé tnúhu Yá Ndiǒxí núú ñáyiu
(Mt. 10:5-15; Lc. 9:1-6)*

⁷ Te Jèsús ní cana-gá ndì ùxúú cue téé xica cuu ndìhi-gá, te ní sáñaha-gă xii-güedé tnúhu ndee iní cundecu ndìhi-güedé cuendá queñuhu-güedé nchaa espíritú cündìhi yucu ñávăha yìhi ñaha xii ñáyiu. Te ní xáhaⁿ-gă xii-güedé sá ndì ndúú ndì ndúú-güedé quíhíⁿ-güedé cáháⁿ-güedé tnúhu Yá Ndiǒxí núú ñáyiu.

⁸⁻⁹ Te cùmání-gă caca-güedé quíhíⁿ-güedé, te ni xáhaⁿ-gă xii-güedé:

—Vá cánèhe-ndo ñunu cuhuⁿ ndachiuⁿ-ndo, te ni vă cánèhe-ndo sá cáxí-ndó, te ni vă cánèhe-ndo díhúⁿ, chi ìⁿ caa-ni tátnu canehe-ndo, te chàú yíhí-ní-ndó-ăⁿ xíaⁿ-ni quíhi-ndo, te vă cánèhe-gá-ndó ìngá ichi dóó-ndó chi ðiu-ni dóó níhnú-ndó-ăⁿ xíaⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xăhaⁿ-gă xii-güedé.

¹⁰ Te xăhaⁿ tùcu-gá:

—Te òré ná sàá-ndó ìⁿ ñuú, te ió ñáyiú cáháⁿ ñáhă-yu xii-ndo vèhé-yu, te xiáⁿ-ni cundecu-ndo ndèè ná sàá nduu ndèe-ndo ñuú-áⁿ.

¹¹ Te núu ió dava ñuú ñá túú cuìní-yu cáháⁿ ndìhì ñaha văha-yu xii-ndo, te ni ñà túú cuìní-yu cundedóho-yu tnúhu càháⁿ-ndó, te ndee-ni-ndo ñùú-áⁿ te naquidi-ndo tìcáchúhmá ñi tnì sáhá-ndó cuendá ná cùtnuní iní-yu sá ñà túú quide váha-yu. Te na cächí tnúhu ndáá-í xii-ndo sá ná sàá nduu càda ndáá Yă Ndióxi cuéchi nchaa ñáyiú, te cue ñáyiú ducaⁿ na càda ñaha xii-ndo-áⁿ ïo-gá ndohó-yu dàvá-áⁿ dâcúxí dàtná ndoho cue ñáyiú ñuú Sòdomá ndìhì cue ñáyiú ñuú Gòmorrá —cächí-gá xăhaⁿ-gă xii-güedé.

¹² Te cue téé-áⁿ ñi xica-güedé cuáháⁿ-güedé te ní ngüíta-güedé dâcuàha-güedé cue ñáyiú tnúhu Yă Ndióxi, te xăhaⁿ-güedé xii-yu:

—Chí dândixi túu iní sá ñà túú quide váha-ndo ndècu-ndo, te dañà-ndo nchàa ichi cuehé ichi duha ndècu-ndo. —cächí-güedé xăhaⁿ-güedé xii-yu.

¹³ Te vâi espíritú cündìhì yucu ñávăha yìhì ñaha xii ñáyiú ta quèñuhu-güedé yiqui cùñú-yu cuáháⁿ, te vâi tucu ñáyiú cùhú tá quide tátna-güedé cuáháⁿ chíhì ñaha-güedé acítì xii-yu te ndùha-yu.

Nàcuáa ní cuu ní xihí té Juáá téé dâcuandute ñaha xii ñáyiú

(Mt. 14:1-12; Lc. 9:7-9)

¹⁴ Te nchaa xichi ní níhì ñáyiú tnúhu nchaa nâcuáa quide Jesús, te tnàhá té Hèrodés téé yîndaha ñaha xii ñáyiú ní níhì-dě tnúhu nchaa nâcuáa quide-gá, te ní cachí-dé:

—Té Juàá tée ní xóo dacuàndute ñaha xii ñáyiú ní ndoto núu dàcáⁿ ndácú-dě quidé-dě nchaa sá vǎ yǎo tñàhí ndàcu cada —duha ní cachí-dé.

15 Te dava ñáyiú cǎchí-yu sá tǎ Èliás tée ní xóo cáháⁿ tñúhu Yá Ndiǒxí ndéé sanaha ní nasáá-dé.

Te davá-yu cǎchí-yu sá cúú-gǎ dàtná ñⁿ tée ní xóo cáháⁿ tñúhu Yá Ndiǒxí ndéé sanaha.

16 Te té Hèrodés ní níhí-dě tñúhu nchaa nàcuáa cǎháⁿ-yu, te ní cachí-dé:

—Dìu té Juàá tée ní táúchíúⁿ-í ní xehndé-güedé díquí-xi ní ndoto —cǎchí-dé.

17-18 Te duha ní cuu cǔtnàhá ní sahní té Hèrodés té Juàá, chí dàvǎ-áⁿ ñí naqueheⁿ té Hèrodés-áⁿ ñⁿ ñaha nàni Herodiás ndécá-dě, te ñaha-áⁿ sà ní cǎndeca ñaha ñàní-dé té Lìpé. Te té Juàá ní xáhaⁿ-dě xii té Hèrodés sá ñà túú ní quide váha-dé sá dúcáⁿ ñí naqueheⁿ-dé ñaha ní cǎndeca ñàní-dé, núu sá cuendá ñaha-áⁿ ñí táúchíúⁿ tǎ Hèrodés ní tñí-güedé té Juàá ní chíhí ñaha-güedé vecaá, te ní dácútú ñàha-güedé xii-dé, te ducaⁿ ñí quide-dé cuendá sá ndécá ñàha-dé xii-aⁿ.

19 Te ñaha nàni Herodiás ndécá tǎ Hèrodés-áⁿ ño ní cuu úhú iní-aⁿ té Juàá, te ní cuiní-aⁿ cahni-aⁿ-dé, dico ñá túú ní ñíhí-aⁿ nàcuáa cada-aⁿ.

20 Te mee tǎ Hèrodés chí ní cutnùnì ndáá iní-dé sá tǎ Juàá cúú-dě ñⁿ tée quide mee-ní sá vǎha, te quide ndáá-dé núú Yá Ndiǒxí, te ní xóo yùhú ñáhá-dě nùu xǎⁿ ñá túú ní dàña-dé ná cada ñaha ñàha ndeca-dé-áⁿ xii té Juàá. Te té Hèrodés-áⁿ ño ní cudíí iní-dé ní xíndedóho-dé nchaa tñúhu ní xáhaⁿ tǎ Juàá xii-dé, dico ñá túú ní sàni iní-dé duuⁿ duuⁿ tñí-dé tñúhu-áⁿ.

21 Te ñⁿ nduu ní xóo vico vehe té Hèrodés ní quide cǎhnu-dé nduu ñí cacu-dé. Te nduu-ǎⁿ ñí

níhí ñaha nàni Herodiás-áⁿ nàcuáa cada-aⁿ cuendá cuú té Juáá. Te nduu-ǎⁿ ní cáháⁿ té Hèrodés nchaa cue tée cùchiuⁿ, ndìhì nchaa cue tée tàxi tñuní ñáhá xìi cue sandadú, ndìhì nchaa cue tée cuica ndècu distritú Galileá cuendá cudìni ndìhì ñaha-dé xii-güedé nduu-ǎⁿ.

²² Te ndècu ìⁿ déhe yoco ñàha nani Herodiás-áⁿ, te xíchí-ǎⁿ nǐ quíhu-xi vehe núú cúú vico-áⁿ nǐ xita saha-xi mèi oré yíhí tǎ Hèrodés mèsá ndìhì nchaa cue tée ní cáháⁿ-dé, te ío ní cudíí ìní-dé ndìhì nchaa cue tée-áⁿ nàcuáa ní xita xíchí-ǎⁿ. Te té Hèrodés ní xáhaⁿ-dǎ xii-xi:

—Cácaⁿ núú-í núu ná cuíní-n te taxi-í —càchí-dé xǎhaⁿ-dǎ xii-xi.

²³ Te ní cacunehe-dé ndéé Yǎ Ndiǒxí nàcuáa cutnùnì ìní xíchí-ǎⁿ sǎ ndàá cuañaha-dǎ núu ná cúú sǎ ná càcáⁿ-xi núú-dǎ cuéi ndéé cuádava nchaa sǎ ndécú ndìhì-dé, te núu na càcáⁿ-xi.

²⁴ Te sǎ dúcáⁿ nǐ xáhaⁿ-dǎ xii-xi núu ní quee-xi quehé ní xáhaⁿ-xi xii náná-xi:

—Nǎá, ¿ná cúú sǎ càcáⁿ-í núú tǎ Hèrodés? —càchí-xi xǎhaⁿ-xi xii-aⁿ.

Te náná-xi-áⁿ nǐ xáhaⁿ-aⁿ xii-xi:

—Cuáháⁿ cácaⁿ-n dǐquí tǎ Juáá tée dàcuandute ñaha xii ñáyiu —càchí-aⁿ xǎhaⁿ-aⁿ.

²⁵ Te ndìhì-ni cuándihu xíchí-ǎⁿ xití vehe núú yíhí tǎ Hèrodés-áⁿ, te xǎhaⁿ-xi xii-dé:

—Cuíní-í sǎ mèi nduu vitna quehdé-n dǐquí tǎ Juáá tée dàcuandute ñaha xii ñáyiu te taxi-n, dico na cùhuⁿ ìⁿ xití cóhó taxi-n —càchí-xi xǎhaⁿ-xi xii-dé.

²⁶ Te té Hèrodés ní ngüíta-dé ndìhú víhí ìní-dé sǎ dúcáⁿ nǐ xáhaⁿ-xi xii-dé, dico ñá túú ní cùyii-dé cúñaha-dǎ xii-xi sǎ vǎ cúú cuañaha-dǎ sǎ xìcáⁿ-xi, chí cuendá sǎ núú nchaa ñáyiu ní xáhaⁿ-dǎ sǎ

cúú cuãñaha-dě nõu ná cúú sã ná càcáⁿ-xi, te ní cacunehe-dé ndéé Yã Ndiõxí nàcuáa cutnùnì iní-xi sá ndàá cuãñaha-dě sá ná càcáⁿ-xi núú-dě.

27 Te té Hèrodés-áⁿ ndìhi-ni ní xáhaⁿ-dě xii ìⁿ sandàdú sá quìhíⁿ-dé quehndé-dé díquí tẽ Juàá.

28 Te sandàdú-áⁿ nĩ xica-dé cuáháⁿ-dé vecaá núú yíhí tẽ Juàá-áⁿ, te ní quexìo-dé te ní xehndé-ni-dé díquí tẽ Juàá, te ní chihi-dé ìⁿ xití cóhó te nèhe-dé cuánuhú ní sáha-dé xíchí xìcáⁿ-áⁿ, te xíchí-ãⁿ nĩ nacuáha-xi nãná-xi.

29 Te òré ní nĩhí nchaa cue téé ní xica cuu ndìhi ndíi Juàá-áⁿ tnũhu sá dúcáⁿ nĩ sahni ñaha-güedě xii ndíi, te ní sáháⁿ-güedé ní ndocani-güedé yiqui cùñú ndíi te ní chindúxi-güedé.

Jèsús dácàxi-gá úhúⁿ mĩ cue téé te d̃ⁿ ñáyiu d̃hí ndìhi landú

(Mt. 14:13-21; Lc. 9:10-17; Jn. 6:1-14)

30 Te nchaa cue téé ní táúchíúⁿ Jèsús cuáháⁿ cáháⁿ tnúhu Yá Ndiõxí núú ñáyiu ní ndexìo-güedé núú-gã te ní ngüíta-güedé nácàni tnúhu-güedé nchaa nàcuáa ní quide-güedé ndìhi nchaa nàcuáa ní dánèhé ñáhá-güedě xii-yu.

31 Te Jèsús ní xáhaⁿ-gã xii-güedé:

—Chí nèhé ná quìhíⁿ-ó ìⁿ xichi núú ñà túú ñáyiu ndetatú-ó —càchí-gá xãhaⁿ-gã xii-güedé.

Te ducaⁿ nĩ xáhaⁿ-gã xii-güedé, chí ío cuéhé ñáyiu cuáháⁿ véxi-yu cùú-yu núú ndécú-gã. Te ni ñã nìhí-gá nása cada-gá caxi-gá ndìhi cue téé xica cuu ndìhi-gá.

32 Te Jèsús cuánguee-gá bàrcú ndìhi mee-ni cuè téé ní táúchíúⁿ-gã cáháⁿ tnúhu-gá, te cuáháⁿ-gá ndìhi-güedé ìⁿ xichi núú ñà túú ñáyiu ndècu.

33 Dico vâi ñâyiu ní cutnùní iní-yu sá díú-gă ñúhú bàrcú-án cuáhán ndihí cue téé xica cuu ndihí-gá, te nchaa ñúú cáá yàtni xíaⁿ ñí quee ñâyiu xixinú-yu cuáhán núú ñí quidé-yu cuendá quexìo Jesús, te sa ndècú-yu xíaⁿ ñí quexìo-gá.

34 Te òré ní quene Jèsús xití bàrcú, te ní xiní-gá cuéhé víhí ñâyiu xixúcu núú ñí quexìo-gá-án, te ní cundàhú iní ñáhá-gă xií-yu chí ndècú-yu dàtná xĩndecu cue mbéé cue quití ñá túú tòli-xi, te ío vâi núú sã ñí ngúita-gá ní dácuáhá ñàha-gá xií-yu.

35 Te sátá tá cuaa cuáhán te ní sáhán cue téé xica cuu ndihí Jesús núú-gă, te xăhaⁿ-güedě xii-gá:

—Sa ní cuaa te ñá túú ñâyiu ndècu yatni iha.

36 Váha-gá dandàca nchaa ñâyiu-a chí na quihíⁿ-yu nchaa vehe càa xití yucu-a, ndihí nchaa ñúú cáá nchaa yatni iha cuaáⁿ-yu sá cáxí-yu —càchí-güedé xăhaⁿ-güedě xii-gá.

37 Te Jèsús ní xáhaⁿ-gă:

—Mee-ndo chí cuăñaha sã ná càxí-yu —càchí-gá xăhaⁿ-gă xii-güedé.

Te xăhaⁿ-güedě xii-gá:

—¿Te nása cada-ndí, chí xìni ñuhu-xi datná úú cièndú díhúⁿ denàriú cuendá cuaaⁿ-ndí sá cáxí-yu?

—càchí-güedé xăhaⁿ-güedě xii-gá.

38 Te Jèsús ní xáhaⁿ-gă xii-güedé:

—Chí cuáhán cundehe-ndo nũu ná daha pàà ndècú ndihí-ndo te cachí tnúhu-ndo —càchí-gá xăhaⁿ-gă xii-güedé.

Te ní sáhán ndéhé-güedě nũu ná daha pàà ndècú, te ní xáhaⁿ-güedě xii-gá:

—Úhúⁿ duha-ná pàà ndihí úú-nă chácá ndècú —càchí-güedé xăhaⁿ-güedě xii-gá.

39 Te Jèsús ní xáhaⁿ-gǎ xii nchaa ñáyiú sá ná ñíhí tñáhǎ-yu cuu títí xichí-yu, te ngóo-yu nchaa núú cǔhú cuí cǎa xíáⁿ.

40 Te ncháá-yu ní ngóo-yu, te dava xichí-yu ní ngóo ìⁿ ciendú-yu, te dava xichí-yu ní ngóo údico úxí-yu.

41 Te sátá ñí ndíhí-yu ní ngóo, te ní queheⁿ Jèsús ndí ùhúⁿ pàá ndí úú chácá-ǎⁿ, te ní ndacoto-gá andíu te ní ndacáⁿ táhú-gǎ núú Yǎ Ndiǒxí, te dǎtnùní ní táhú cuèchi-gá pàá-áⁿ te ní sǎñaha-gǎ xii cue téé xíca cuu ndíhí-gá ní dácǎhñu-güedé nchaa ñáyiú-áⁿ ñí xexí-yu. Te díu-ni ducaⁿ ñí quide tucu-gá úú chácá-ǎⁿ.

42 Te ncháá-yu ní xexí-yu ní ndahá xití-yu.

43 Te sátá ñí túhú cóhǒ-yu te ní nadatácá-güedé nchaa sá ñí quendóo, te ní chítú ùxúú tñáhá tídihi mee-ni sǎ ñí quendóo núú ùhúⁿ-ni pàá, ndíhí núú úú-ni chácá.

44 Te nchaa ñáyiú ní xexi-áⁿ chí xǐnu úhúⁿ mǐ mee-ni cuè téé chí díu-ni cue téé-áⁿ ñí quíúndehu, te díìⁿ ñáyiú díhí ndíhí cue landú.

*Jèsús xíca-gǎ núú ndute
(Mt. 14:22-27; Jn. 6:16-21)*

45 Te òré-ni-áⁿ ñí xáhaⁿ Jèsús xii cue téé xíca cuu ndíhí-gá sá quèe-güedé bàrcú codonù-güedé quíhíⁿ-güedé ìⁿ ñuú nání Bètsaidá cáá ndàa ingá xio yuhu làgúná núú ndécú-güedé-áⁿ, te mee-gǎ quendóo-gá cada ndee ìní tñáhá-gǎ ndíhí cue ñáyiú.

46 Te sátá nǐ yáha ní quide ndee ìní tnáhá-gǎ ndihí-yu, te ní xica-gá cuáháⁿ-gá ìⁿ tìndúú cáá yàtni xiáⁿ cuendá cáháⁿ ndihí-gá Yǎ Ndiǒxí.

47 Te òré sa ní cundiⁿqui te bàrcú sá ñúhú cuè téé xìca cuu ndihí-gá sa cuáháⁿ-xi ndéé cuádava xití làgúná-áⁿ, te mee-gǎ ndécú-gǎ ìⁿ núú tìndúú.

48 Te túu ndèhe-gá sá sǔúní ndòho-güedé tá dàcaca-güedé bàrcú-áⁿ cuǎháⁿ, chi cuendá ndàa nacuáa cuáháⁿ-xi-áⁿ duha véxi táchí te nàtúndaha-xi. Te ìngá nduu-ǎⁿ tàcuíhndá-gá sa ní cuyatni vií-nǎ Jèsús bàrcú ñúhú-güedě-áⁿ, dico núú ndute tá xìca-gá cuáháⁿ te luha-ná te yáha ñaha-gǎ xii-güedé ní cùu.

49-50 Te òré ní xiní ñáhá cuè téé ñùhu bàrcú-áⁿ xii-gá te ní yùhú-güedé ní cana saa-güedé, chi ní sani iní-güedé sá ìⁿ almá cúú-gǎ. Te ní xáhaⁿ-gǎ xii-güedé:

—ǐÑí cunduu-ndo, vá yùhú-ndó, chi yùhú cúù-í!
—càchí-gá xǎhaⁿ-gǎ xii-güedé.

51 Te Jèsús cuánguee-gá xití bàrcú ñúhú-güedě-áⁿ, te sátá cuánguee-gá te òré-ni ní ngüíñí táchí, te ní cuñúhu vùhi-güedé.

52 Te ducaⁿ chi cue téé-áⁿ ñà túú ní cùtnuní iní-güedé nása quide-gá, chi ñà túú ní cùtnuní váha iní-güedé nàcuáa ndùu sá nǐ quide-gá òré ní nadacàyá-gá pàá, chi ío ñi dǐquí-güedě.

*Jèsús quidé tǎtna-gá ñáyiu cùhú ñúú Genesàrét
(Mt. 14:34-36)*

53 Te ní yáha-güedé ndihí-gá ndàa ìngá xio yuhu làgúná, te ní sáa-güedé ndihí-gá yucu cue téé

ñúú Genesàrét. Te yàcáⁿ ní dácútú ndèé-güedé bàrcú-güedé yuhu làgúná.

⁵⁴ Te òré ní quene Jèsús ndihì cue téé xìca cuu ndihì-gá xití bàrcú, te nchaa ñáyiu xĩndecu-áⁿ nĩ cutnùnì iní-yu sá díú-gă.

⁵⁵ Te ñáyiu-áⁿ ndĩhì-ni ní sáháⁿ-yu nchaa núú xĩndecu cue ñáyiu cùhú, te cue ñáyiu cùhú-áⁿ nĩ quée-yu xító nchìdo ñahá-yu cuáháⁿ ndi tnahá ìⁿ ìⁿ xichi núú nihí-yu tnúhu quèxio Jesús.

⁵⁶ Te nchaa ñúú náhnú ndihì nchaa ñúú lĩhli núú cuáháⁿ Jèsús, ducaⁿ xĩndecá-yu nchaa ñáyiu cùhú cuáháⁿ xití ñúú sàcáⁿ ñáhă-yu núú-gă cuèndá cada tátna ñaha-gă xii-yu. Te ñu-ni ducaⁿ xĩquidé-yu nchaa dava-gá xichi núú cuáháⁿ-gá núú xĩndecu cue ñáyiu, te càháⁿ ndàhú-yu núú-gă sá ná dáñá-gă tnándeé cue ñáyiu cùhú-áⁿ cuèdicó luha yuhu dđó-gă cuèndá ndúha-yu. Te nchaa ñáyiu cùhú ní tnándeé yuhu dđó-gă ní ndúha-yu.

7

Cuèndá nchaa sá quidé-xi ngũndecu cuèchi ñáyiu (Mt. 15:1-20)

¹ Te ñúú Jerusalén ní quee cue téé dàcuaha ñaha xii ñáyiu nchaa tnúhu ní chídó tnùnì ndii Moisés, te ní quexìo-güedé núú ndécú Jèsús, te tnàhá cue téé cùu fariséú ní quexìo ndihì-güedé.

² Te cue téé-áⁿ nĩ xiní-güedé sá dàva cue téé xìca cuu ndihì Jesús ñá túú ndàha-güedé dàtná ndáhá mèe cue téé cùu fariséú-áⁿ òré caxi-güedé. Te xíãⁿ nũu cue téé ní quexìo-áⁿ nĩ cáháⁿ cuèhé-güedé cuèndá cue téé xìca cuu ndihì-gá.

³ Te ducaⁿ chi nchaa cue tée cùu fariséú-áⁿ ndihì nchaa ñáyiú isrâél nchìcúⁿ nihnú-yu quidé-yu dàtná ní xóo cada nchaa cue ñaní tnáhă-yu ní xindecu ndéé sanaha, chi nchaa ñáyiú-áⁿ và cáxĩ-yu te núu vá ndáhă-yu dàtná ní xóo ndaha nchaa cue ñaní tnáhă-yu ní xindecu ndéé sanaha-ăⁿ.

⁴ Te ñáyiú-áⁿ ndi tnahá òré cuáháⁿ-yu núú yăhu te nàsáá-yu, te ndáhá-yu nàcuáa sàni iní-yu ndùvétú iní Yă Ndiôxí, te núu vá dúcáⁿ càdá-yu te vá cáxĩ-yu. Te tnáhá náquèté-yu vàsú sá sácúhuⁿ sá xihĩ-yu, ndihì lĩtu, ndihì cóhó càá, ndihì càamá. Te nchaa xéhé náquèté-yu nàcuáa sàni iní-yu ndùvétú iní Yă Ndiôxí. Te ío-gá tĩtní sá nĩ xóo cada nchaa ñáyiú ní xindecu ndéé sanaha-ăⁿ nchìcúⁿ nihnú-yu quidé-yu.

⁵ Te cue tée cùu fariséú-áⁿ, ndihì cue tée dàcuaha ñaha xii ñáyiú nchaa tnúhu ní chídó tnùnì ndíi Moisés-áⁿ nĩ xáhaⁿ-güedě xii Jèsús:

—¿Ná cuendá cue tée xica cuu ndihì-n ñá túú nàquete-güedé ndaha-güedé òré caxi-güedé dàtná ní cachí nchaa cue tée ní xindecu ndéé sanaha-i? —càchí-güedé xáhaⁿ-güedě xii-gá.

⁶ Te Jèsús ní xáhaⁿ-gă xii-güedé:

—Nchòhó cúú-ndó cuè tée ío dândahú mée-xí chi càchí-ndó sá ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùnì ndíi Chàíá tée ní xóo cáháⁿ tnúhu Yá Ndiôxí ndéé sanaha núú tütú-gá núú càháⁿ-xi nàcuáa ní cáháⁿ-gá cuendá-ndó, te duha ní cachí-gá:

Ñáyiú-a càchí-yu sá ío càhnu cuu-í, dico dìcò-ni yuhu càháⁿ-yu,

chi ñá túú ñùhu iní ñáhă-yu xii-í.

7 Te àúⁿ nă cuu chĩñuhu ñahá-yu xii-í, chi ñá túú vėdana ndéé nándĩhi-xi,

chi cue ñáyiú-a dàcuahá-yu cue tnaha ñáyiú-yu nàcuáa cundecú-yu, dico mee-ni tnũhu sá ñĩ cahu iní cue ñáyiú ñuyíú-a càháⁿ-yu.

Duha ní chídó tnùnĩ ndĩ Chàjá núú tütú Yă Ndiõxí nàcuáa ní càháⁿ-gá cuendá-ndó.

8 Te nchòhó ní dǎñá-ndó nàcuáa ní cachí Yă Ndiõxí cada-ndo, te nchìcúⁿ nihnu-ndo quide-ndo nacuáa ní cahu iní cue ñáyiú ñuyíú-a, chi nàquete-ni-ndo lítu, te nàquete-ni-ndo vasú sácũhuⁿ sá xihí-ndó nàtava-ndo nacuáa ní xóo cada ñáyiú-áⁿ ñĩ xóo naqueté-yu nchaa xǎⁿ, te nándi-gá nchaa núú sǎ quidé-ndó —càchí Jèsús xǎhaⁿ-gǎ xii-güedé.

9 Te ní xáhaⁿ tùcu-gá xii-güedé:

—Te nchòhó, ñá túú cuiní-ndó càda-ndo nacuáa cuiní Yă Ndiõxí, chi mee-ni nàcuáa ní cachí cue téé ní xĩndecu ndéé sanaha nchìcúⁿ nihnu-ndo quide-ndo.

10 Te ndĩ Moisés ní cachí ndĩ sá ncháá ñǎyiú canehé-yu sá yĩñuhu núú tǎtǎ-yu ndĩhi núú nǎñá-yu. Te nchaa ñáyiú na càháⁿ úhú cuendá tǎtǎ-yu àdi cuendá nǎñá-yu te cahni ñaha-güedé xii-yu ní cachí ndĩ.

11 Te nchòhó càchí-ndó sǎ nõu ñⁿ téé na cũñaha-dě xii tǎtǎ-dě ndĩhi nǎñá-dě sá sǎ ñĩ sani iní-dé cuañaha-dě xii-yu cùu-xi Corbán, te ñá túú-gǎ xini ñũhu-xi sá cuañaha-dě xii-yu, te tnũhu Còrbán-áⁿ quée-xi: Sá cúú cuendá Yă Ndiõxí.

12 Te sá dúcáⁿ ná càháⁿ ñⁿ téé-áⁿ te nchòhó chĩndèe tnũhu-ndo-dě cuendá sá vǎ chĩndèe-gá-dé tǎtǎ-dě ndĩhi nǎñá-dě.

13 Te ducaⁿ quide-ndo chi ní dáquée tǐhú-ndó nàcuáa ní cachí Yă Ndiǒxí cada-ndo, te mee-ni nàcuáa ta quide cue tée ñuyíú-a véxi nchícúⁿ ni-hnu-ndo quide-ndo, te ñiu-ni ducaⁿ ta sànu ichi tnaha-ndo véxi, te nándi-gá nchaa sá cáhú ìní-ndó quide-ndo –cachí-gá xăhaⁿ-gă xii-güedé.

14 Te Jèsús ní xáhaⁿ tùcu-gá xii cue ñáyiu xĩndecu-áⁿ:

–Chí táquixi ndehe iha, te cundedóho váha-ndo tnǐhu na càháⁿ-í-a te ío váha cuáha-ndo cuendá.

15 Nchaa sá xéxí-ndó chi ñá túú nă quidé-xí ìní-ndó, dico nchaa sá cuéhé sá dúhá sàni ìní-ndó quide-ndo, nchaa xíăⁿ quidé-xí ndècu cuéchi-ndo.

16 Te nchaa nchòhó ñáyiu ndèdóho nchaa tnúhu càháⁿ-í-a ío váha chí cuăha cuendá –càchí-gá xăhaⁿ-gă xií-yu.

17 Te Jèsús ní dándõ-gá nchaa ñáyiu núú xǐxúcu-yu-áⁿ te cuándihu-gá xití vehe. Te cue tée xica cuu ndihi-gá ní xícáⁿ tnúhú-güedě núú-gă nǔu nása quèe-xi cuendú ní cani-gá núú ñáyiu-áⁿ.

18 Te ní xáhaⁿ-gă xii-güedé:

–¿Te náa tnàhá nchòhó ñá túú ní tècú tnùnı-ndó cuendú ní cani-ı núú ñáyiu-ăⁿ? Nchaa sá xéxı-yu cuánguee xitı-yu ñá túú quide-xi ìní-yu nàcuáa ngúndecu cuéchi-yu.

19 Chi ñá díú ìní-yu cuánguee-xi chi cuánguee ndáá-xi xitı-yu, te náyáha ñaha-xi xiı-yu –càchí-gá xăhaⁿ-gă xii-güedé.

Te sá dúcáⁿ nǐ cáháⁿ-gá te ní dátũu-gá sá cúú càxi-o nchaa núú să cúú càxi-o.

20 Te ní xáhaⁿ tùcu-gá xii-güedé:

—Nchaa sá cuèhé sá dúhá quide ñáyiú xíáⁿ cácu ñihnu-xi iní-yu, te nchaa xíáⁿ quidé-xí ndècu cuéchi-yu.

²¹ Te iní-yu-áⁿ cácu ñihnu nchaa sá cuèhé sá dúhá, chi sàni cuehé sání dùha iní-yu. Te cue téé càháⁿ ndihí-güedé ñadìhí te ñá díú ñadìhí-güedé cúŭ-yu, te diu-ni ducaⁿ quide cue ñáyiú dìhí càháⁿ ndihí-yu téé te ñá díú yíŭ-yu cùu-güedé. Te sàhní-yu cue tnàha ñáyiú-yu, te mee-ni ìchi díí iní cúdǎ iní-yu cundecú-yu.

²² Te dùhu ndachiuⁿ tnahá-yu, te xihó-yu cundecu ndihí-yu sá ndécú ndìhi tnaha ñáyiú-yu, te ío quide úhú iní-yu sá cúú-xí tnàha ñáyiú-yu, te ío dándahú tnáhă-yu, te mee-ni nchàa sá cuèhé sá dúhá cùdí iní-yu quidé-yu, te ío cuédú iní-yu, te ío yiti yùhú-yu, te ío quide cahnú-yu mée-yu, te quidé-yu nándi-gá sá ñà túú tàú-yu cadá-yu.

²³ Te nchaa sá cuèhé sá dúhá-ăⁿ cácu ñihnu-xi iní-yu, te nchaa xíáⁿ quidé-xí ndècu cuéchi-yu, te ñá túú cùu-xi sá vâha sá cúú-xí iní-yu.

*Îⁿ ñadìhí véxi ñuú xícá ñǎ sándáá iní-aⁿ Jèsús
(Mt. 15:21-28)*

²⁴ Te ní xica Jèsús cuáháⁿ-gá ndée yucu cue téé ñuú Tirú, ndihí yucu cue téé ñuú Sidón. Te òré ní quexìo-gá xíáⁿ te cuánguihu-gá ìⁿ vehe te xíáⁿ cundecu-gá, te cuíní-gá sá vǎ quíní ñáyiú sá xíáⁿ ndécú-gǎ ní cùu, dico dai ní níhí-yu tnúhu.

²⁵ Te ìⁿ ñadìhí ndécú ìⁿ déhe yoco-aⁿ, te yìhi ñaha espíritú cündìhi yucu ñávâha xii-xi, te ñaha-áⁿ ïo ndìhi ní níhí-aⁿ tnúhu sá ñǎ quexìo Jèsús xíáⁿ ñuú ní sáháⁿ-aⁿ núú ndécú-gǎ, te ní ngüíñí xítí-áⁿ núú-gǎ.

26 Te ní ngüíta-aⁿ càháⁿ ndàhú-aⁿ núú-gă, te xăhaⁿ-aⁿ sã nõu vá cündèe iní-gá queñuhu-gá espíritú cündìhì yucu ñávăha yìhì ñaha xii déhe-aⁿ. Dico ñá díú ñàha israél cúú-áⁿ chi ñaha ñuú Sirofèniciá cúú-áⁿ te tnúhu grìégú cúú tnúhu-aⁿ.

27 Te xǎⁿ nõu ní xáhaⁿ Jèsús xii-aⁿ:

—Daña na càxi tnaa nchaa landú chítú xìtí-güexi, te dătnùní caxi cue iná, chi ñá túú ndùu váha-xi queheⁿ-o sã xéxí làndú te cuáha-o ìná —càchí-gá xăhaⁿ-gă xii-aⁿ.

28 Te ní xáhaⁿ-aⁿ xìi-gá:

—Mèstrú, ndáá-nì càháⁿ-n, dico iná chi nàdatacá-güedi sá ngóyó yùhu cóhó làndú —càchí-aⁿ xăhaⁿ-aⁿ xìi-gá.

29 Te Jèsús ní xáhaⁿ-gă xii-aⁿ:

—Ío váha ní cáháⁿ-n, te cuanùhú te ñá túú-gă ná cani iní-n, chi sa ní quee espíritú cündìhì yucu ñávăha yìhì ñaha xii déhe-n —càchí-gá xăhaⁿ-gă xii-aⁿ.

30 Te ñaha-áⁿ ñĩ nasáá-aⁿ vehe-aⁿ te càa déhe-aⁿ núú càamá, dico ñá túú-gă espíritú cündìhì yucu ñávăha yìhì ñaha xii-xi chi sa ní quee ñaha-xi.

Jèsús quidé tătna-gá ìⁿ téé ñá cúú càháⁿ váha te doho-dě

31 Te Jèsús ní ndee-gá yucu cue téé ñuú Tìrú te ní yáha-gá yucu cue téé ñuú Sidón, ndìhì yucu ndì ùxì ñuú nání Dècápolís, te ní sáá-gá ndéé yuhu làgúná distritú Galileá.

32 Te xǎⁿ ndécú-gă ní quexìo ñáyiu ndéé núú-gă ndécă-yu ìⁿ téé ñá cúú cǎháⁿ váha-dé te doho-dě. Te càháⁿ ndàhú-yu núú-gă sá ná tëndaha ñaha-gá xii-dé cuèndá ndúha-dé.

33 Te Jèsús ní queñuhu ñaha-gă xii-dé tnuú-yu, te ndèca ñaha-gá cuáháⁿ ìⁿ xio, te ní dáquìhu-gá díquí ndáhá-gă yaú lóho-dé, te ní dácánù-gá díí-gá díquí ndáhá-gă, te ní tendaha-gă yàa-dé.

34 Te ní ndacoto-gá andiù te ní sánuu iní-gá, te ní cáháⁿ-gá tnúhu mee-gă, te xăhaⁿ-gă:

—ĭĕfatá! —càchí-gá xăhaⁿ-gă xii-dé.

Te tnúhu-áⁿ quée-xí: Nacaáⁿ yòhó lóho.

35 Te òré-ni-áⁿ ñ nacaáⁿ lóho-dé, te ní nduu váha yàa-dé, te ní cuu cáháⁿ váha-dé.

36 Te Jèsús ní cáháⁿ víhí-gă dóho ñáyiu ndihì ñaha xii téé ní quide tátna-gá-áⁿ să vă yòo ìⁿ cúñàhá-yu sá ñ quide tátna ñaha-gă xii-dé, dico uuⁿ-gá ní quidé-yu ní cáháⁿ-yu núú ñáyiu sá ñ quide tátna-gá téé-áⁿ.

37 Te nchaá-yu ío ní cuñúhu-yu, te ní xítnàhá-yu:

—Váha vîhi quide-dé, chi ncha-ni ndàcu-dé quidé-dě, chi quide tátna-ni-dé ñáyiu doho, te quide tátna-ni-dé ñáyiu ñìhí —càchí-yu xítnàhá-yu.

8

Jèsús dácàxi-gá cúmí mìl ñáyiu (Mt. 15:32-39)

1 Te ìⁿ nduu tucu ío cuéhé ñáyiu ní tacá núú ndécú Jèsús, te ñá túú tnàhí sá cáxì-yu. Te ní cana-gá cue téé xìca cuu ndihì-gá, te ní xăhaⁿ-gă xii-güedé:

2 —Yúhú, cùndahú iní-í ncha ñáyiu-a chi sa ní cuu úní nduu ndècu ndihì ñahá-yu xii-o ìha, te ñá túú tnàhí ná sá cáxì-yu.

³ Te núu na nàtendaha-í-yu núhú tnámă-yu vehé-yu, te cuneé-yu docó ichi, chi davá-yu ío xica ndécú-yu —càchí-gá xăhaⁿ-gă xii-güedé.

⁴ Te ní xáhaⁿ-güedě xii-gá:

—¿Te ndèé níhí-ó să cuăñaha-o càxi nchaa ñáyi-u-a, te iha ñá túú nă ío chi cùu-xi xití yucu-i? —càchí-güedé xăhaⁿ-güedě xii-gá.

⁵ Te Jèsús ní xícáⁿ tnúhú-gă núú-güedě, te xăhaⁿ-gă:

—¿Ná daha-gá pàá ndécú ndìhi-ndo-i? —cachí-gá xăhaⁿ-gă xii-güedé.

Te ní xáhaⁿ-güedě xii-gá:

—Ndècu ndìhi-ndí úsá-gá tnàhá —càchí-güedé xăhaⁿ-güedě xii-gá.

⁶ Te Jèsús ní xáhaⁿ-gă xii nchaa ñáyi-u sá ngõo-yu nchaá-yu, te ní ngóo-yu, te ní queheⁿ-gá ndi úsá pàá-áⁿ, te ní ndacáⁿ táhú-gă núú Yă Ndiõxí. Te dătnùní ní táhú cuèchi-gá te ní sãñaha-gă xii cue téé xica cuu ndìhi-gá ní dácăhñu-güedé nchaa ñáyi-u-áⁿ.

⁷ Te ndècu ndìhi-güedé ìⁿ úú chácá líhli, te diu-ni ducaⁿ ní quide-gá ní ndacáⁿ táhú-gă núú Yă Ndiõxí. Te dătnùní ní táuchíúⁿ-gă ní dácăhñu ñaha-güedě xií-yu.

⁸ Te nchaá-yu ní xexí-yu ní ndahá xití-yu. Te sátá ñí túhú cóhõ-yu te ní nadatácá-güedé nchaa sá ñí quendóo, te ní chítú úsá tnàhá tídihi mee-ni să ñí quendóo-áⁿ.

⁹ Te núú ncháá ñáyi-u ní xexi-áⁿ xñu dătná cúmí mĩl-yu. Te sátá ñí yáha ní dácáxí ñàha Jesús xií-yu te ní dándácá ñàha-gá.

10 Te dàtnùnì cuánguee-gá bàrcú ndìhi cue tée xìca cuu ndìhi-gá cuáháⁿ-gá ndìhi-güedé yucu cue tée ñuú Dalmànutá.

Cue tée cùu fariséu xǎhaⁿ-güedě xii Jèsús cada-gá ñⁿ sá vǎ yõo tnàhí ndàcu cada (Mt. 16:1-4; Lc. 12:54-56)

11 Te núú ñí quexìo Jèsús xíaⁿ ñí sáá cue tée cùu fariséu, te ní ngüíta-güedé nándi tnúhu xáhaⁿ-güedě xii-gá xító ndèé ñáhá-güedě. Te xǎhaⁿ-güedě sá ná cádá-gǎ ñⁿ sá vǎ yõo tnàhí ndàcu cada cundehe-güedé nàcuáa cutnùnì iní-güedé ñuu ndáá sá Yǎ Ndiõxí ní tendaha ñàha-gá xii-gá véxi-gá ñuyíú-a.

12 Te ní sánuu iní-gá te ní xáhaⁿ-gǎ xii-güedé:

—Nchaa nchòhó ñáyiú ndècu ñuyíú-a cuíní-ndó càda-í ñⁿ sá vǎ yõo tnàhí ndàcu cada nacuáa cutnùnì iní-ndó ñuu ndáá sá Yǎ Ndiõxí chíndèe ñaha-gá xii-í. Dico na càchí tnúhu ndáá-í xii-ndo sǎ vǎ càda-í sá cuíní-ndó —càchí-gá xǎhaⁿ-gǎ xii-güedé.

13 Te ní dándõo-gá ñáyiú xíndecu-áⁿ, te cuándeegá bàrcú ndìhi cue tée xìca cuu ndìhi-gá te cuáháⁿ-gá ndìhi-güedé ndàa ingá xio yuhu làgúná.

Nàcuáa quìde cue tée cùu fariséu (Mt. 16:5-12)

14 Te ní cunaa-güedé canehe-güedé sá cáxí-güedě quíhíⁿ, te ñⁿdii-ni paá ndécú xítí bàrcú-áⁿ ñí naníhí-güedě.

15 Te Jèsús ní cáháⁿ-gá dóho-güedé, te xǎhaⁿ-gǎ xii-güedé:

—Na càchí tnúhu-í xii-ndo sǎ ño quíhi iní-ndó cùndecu-ndo te vá cádá cuendá tnàhí-ndo lèvadurá

cue tée cùu fariséú, ndihì levadùrá cue tée cùndihì té Hèrodés —càchí-gá xǎhaⁿ-gǎ xii-güedé.

16 Te ní ngüíta-güedé xǐtnàha-güedé:

—Cuendá sá ñà túú ní cǎnehe-o pàá quixi núu xǐǎⁿ duha càháⁿ-gá —càchí-güedé xǐtnàha-güedé.

17 Te Jèsús ní cutnùnì iní-gá nàcuáa ndùu tnúhu xǐtnàha-güedé, núu ní xáhaⁿ-gǎ xii-güedé:

—¿Ná cuendá da sá ñà túú ní cǎnehe-ndo pàá quixi càháⁿ-ndó? Te ñá díú cuendá pàá-áⁿ ní cǎháⁿ-í, te dicó-ni sá mée-ndó ñà túú quide cuendá váha-ndo nàcuáa ndùu tnúhu càháⁿ-í, te ni ñǎ tècú tnùnì-ndó chi ío ni ñǎ díquí-ndó.

18 Te cuèi ndèhe-ndo dico ñǎ túú cùtnunì iní-ndó ñǎ cúú nchàa sá quidè-í, te cuèi ndèdóho-ndo nchàa tnúhu càháⁿ-í dico ñǎ cùtnùnì iní-ndó ñǎsa ndùu-xi, te ni ñǎ ndácú iní-ndó nchàa sá tá quide-í véxi.

19 Te chí dándàcu iní cùtnàhá ní táhú cuèchi-í úhúⁿ-ni pàá te ní xexi úhúⁿ mǐl mee-ni cuè tée chí diu-ni cue tée-áⁿ ñǎ quíúndehu. Te chí càchí tnúhu ná daha tídihi ní chítú mee-ni sǎ ñǎ quendóo òré ní nadatàcá-ndó —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ni sǎ ñǎ quendóo —càchí-güedé xǎhaⁿ-güedé xii-gá.

Te xǎhaⁿ tucu-gá:

20 —Te cùtnàhá ní táhú cuèchi tucu-í úsá tnàhá pàá ní xexi cùmí mǐl ñáyiu, te chí càchí tnúhu ná daha tucu tídihi ní chítú mee-ni sǎ ñǎ quendóo —càchí-gá xǎhaⁿ-gǎ xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sǎ ñǎ quendóo —càchí-güedé xǎhaⁿ-güedé xii-gá.

21 Te Jèsús ní xáhaⁿ tùcu-gá xii-güedé:
 —Vitna, ¿te sa ní tecú tnùní-ndó tnùhu ní cáháⁿ-í
 ǎn ñǎhá? —càchí-gá xǎhaⁿ-gǎ xii-güedé.

Jèsús quidé tǎtna-gá ìⁿ tée cuàá ñuú Bètsaidá

22 Te Jèsús ní sáá-gá ndihì cue tée xìca cuu
 ndihì-gá ñuú Bètsaidá. Te ñuú-áⁿ ndécú-gǎ ní
 quexìo ñáyiú núú-gǎ tánèhé-yu ìⁿ tée cuàá, te càháⁿ
 ndàhú-yu núú-gǎ ñuú vá cùndèe iní-gá tendaha
 ñàha-gá xii-dé cuèndá ndúha núú-dě.

23 Te Jèsús ní tnì-gá ndaha tée cuàá-áⁿ, te ní
 queñuhu ñaha-gǎ tnuú-yu, te ndèca ñaha-gá cuáháⁿ
 ìⁿ xio yuhu ñuú. Te yàcáⁿ ní dácánù-gá díí-gá
 núú-dě te ní tendaha ñàha-gá xii-dé, te dàtnùní ní
 xícáⁿ tnúhú-gǎ núú-dě, te xǎhaⁿ-gǎ:

—¿Cùtnuní núú-n-ǎⁿ? —càchí-gá xǎhaⁿ-gǎ xii-dé.

24 Te tée cuàá-áⁿ ñí ndonehe núú-dě, te xǎhaⁿ-dě
 xii-gá:

—Cùtnuní núú-í ndéhè-í nchaa cue tée-ǎⁿ, dico
 dà ndáa yutnu cuì ndáa-güedé te xìca-güedé —
 càchí-dé xǎhaⁿ-dě xii-gá.

25 Te Jèsús ní tendaha tùcu-gá núú-dě te ní cuu ní
 ndacoto váha-gá-dé, te òré-áⁿ ñí ndúha núú-dě. Te
 nchaandi túhú sá ndéhé-dě ní cutnùní váha núú-dě
 nándi cùu nchaa xíǎⁿ.

26 Te ní xáhaⁿ Jèsús xii-dé:

—Vitna te núhú-n, dico ndáá ichi vehe-n ñhú-n
 te ñá díú dà xítí ñuú quíhíⁿ-n, te vá yõo ìⁿ cúñaha-n
 sǎ yùhú ní quide tátna-í núú-n ñí ndúha —càchí-gá
 xǎhaⁿ-gǎ xii-dé.

*Té Pèlú xǎhaⁿ-dě xii Jèsús sá díú-gǎ cúú-gǎ Crístú
 (Mt. 16:13-20; Lc. 9:18-21)*

27 Te Jèsús ní xica-gá cuáháⁿ-gá ndihí cue téé xìca cuu ndihí-gá nchaa ñuú líhli càa ñuú Cèsareá Filipú, te òré ñúhú-gă ndihí-güedé ichi te ní xícáⁿ tnúhú-gă núú-güedě, te xăhaⁿ-gă xii-güedé:

—Chí cächí tnúhu nása cáháⁿ ñáyiu cuendá-í. ¿Yoo cùu-í cächí-yu-va? —cächí-gá xăhaⁿ-gă xii-güedé.

28 Te ní xăhaⁿ-güedě xii-gá:

—Davá-yu cächí-yu sá cúú-n ndĩ Juáá téé ní xóo dacuàndute ñaha xii ñáyiu, te davá-yu cächí-yu sá cúú-n tĕ Èliás, te dava tucú-yu cächí-yu sá cúú-n ìⁿ téé ní xóo cáháⁿ tnúhu Yá Ndiöxí ndéé sanaha, duha cächí-yu —cächí-güedé xăhaⁿ-güedě xii-gá.

29 Te ní xícáⁿ tnúhú tùcu-gá núú-güedě, te xăhaⁿ-gă xii-güedé:

—Te nchòhó, ¿yoo sàni iní-ndó cùu-í-i? —cächí-gá xăhaⁿ-gă xii-güedé.

Te tĕ Pèlú ní xăhaⁿ-dĕ xii-gá:

—Yòhó cúú-n Crìstú Yaá ní tendaha Yă Ndiöxí véxi ñuyíú-a —cächí-dé xăhaⁿ-dĕ xii-gá.

30 Te Jèsús ní cáháⁿ-gá dóho-güedé, te xăhaⁿ-gă:

—Vá yòo ìⁿ cúñaha-ndo yòo cuu-í —cächí-gá xăhaⁿ-gă xii-güedé.

Jèsús cáháⁿ-gá sá cáhni ñaha-güedé xii-gá

(Mt. 16:21-28; Lc. 9:22-27)

31 Te Jèsús ní ngüíta-gá xĭtnúhu-gá cue téé xìca cuu ndihí-gá nàcuáa yáha-gá, te xăhaⁿ-gă xii-güedé:

—Yúhú Téé cùu ñaní tnáhá-ndó nchàa-ndo chí ío ndoho-í, chí daquèe tíhú ñáhá nchàa cue téé cùu sacuéhé núú ñáyiu isràél, ndihí cue dútú cúnùu, ndihí cue téé dàcuaha ñaha xii ñáyiu nchaa tnúhu ní chídó tnùní ní chídó tnùní ndíi Moisés, nchaa cue téé-áⁿ dàquèe tíhú ñáhá-güedě xii-í. Te sáá nduu

te cahni ñaha-güedě xii-í, dico nduu úní sá cuù-í te ndoto-í —càchí-gá xăhaⁿ-gă xii-güedé.

32 Te ducaⁿ ñí cáháⁿ Jèsús núú cuè téé xica cuu ndîhi-gá nàcuáa tecú tnùní váha-güedé tnúhu cáháⁿ-gá. Te té Pèlú ní cana ñaha-dě xii-gá ìⁿ xio, te ní ngüíta-dé ténàá ñáhá-dě xii-gá ní cùu.

33 Dico Jèsús ndîhi-ni ní nchócuĩhnu-gá ní ndàcoto-gá núú nchàa-güedé chi ndàa sátá-gă xĩndecu-güedé, te ní ngüíta-gá ténàá-gá té Pèlú, te xăhaⁿ-gă xii-dé:

—jXocuĩñí yòhó núu-í-a, chi dàtná cáháⁿ yucu ñăvăha cáháⁿ-n! Chi ñă túú sàni iní-ò dàtná sání iní Yă Ndiõxí, chi ìⁿ-ni sàni iní-ò ndîhi dava-gá cue ñáyiu ndècu ñuyíú-a —càchí-gá xăhaⁿ-gă xii-dé.

34 Te Jèsús ní cana-gá nchaa cue téé xica cuu ndîhi-gá, ndîhi nchaa ñáyiu xĩndecu-áⁿ, te ní xáhaⁿ-gă:

—Nchaa ñáyiu cuìní chitnahá ñáhá xii-í, te xìni ñuhu-xi vá cádá-gă-yu sá sání iní méè-yu, te ío cada ndee iní-yu cundecu túha-yu ndohó-yu cuèndá-í, te cuèi na ndòhó-yu dàtná ndoho-í.

35 Te nchaa ñáyiu cuìní sá ñà túú tnàhí ná yáha cundecu ñuyíú-a cuíta nihnú-yu, dico nchaa ñáyiu ñă túú tnàhí yùhú cuèi nándi sá ná yăha-yu cundecú-yu ñuyíú-a sá cuèndá-í, ndîhi sá cuèndá tnúhu-í, te ñáyiu-áⁿ naníhí tàhú-yu.

36 Te cuèi nchaandi túhú sá ío ñuyíú-a na nihí ñáyiu cundecu ndîhí-yu, dico núú dîu nchaa xíăⁿ ná càda cuíta nihnú-yu te ñă túú vèdana nàndîhi-xi sá dúcáⁿ ndècu ndîhí-yu nchaa xíăⁿ.

37 Te ni ìⁿ sá ío ñuyíú-a vá chíndèè-xi ñáyiu cuèndá naníhí tàhú-yu.

38 Te nchaa ñáyiú na cùcahaⁿ núú-xi cáháⁿ váha cuendá-í, ndihi cuendá tnúhu-í núú nchaa ñáyiú dàquee tihú ñáhá xii Yá Ndiǒxí, ñáyiú xĩndecu ichi cuèhé ichi duha, te tnàhá yúhú Tée cùu ñaní tnáhã-yu nchaá-yu cucahaⁿ núù-í núũ-yu òré ná quìxi tucu-í ndihi cue espíritú xínú cuèchi núú Tătà-í Dútú Ndiǒxí. Te mee-gã cada cutnùnì iní nchaa ñáyiú sá yúhú ío càhnu cuu-í.

9

1 Te na càchí tnúhu ndáá-í xii-ndo sã ìó dava nchòhó ñáyiú xĩndecu iha vitna vá cùú-ni-ndo, chi cundecu-ni-ndo ndèé quiní-ndó sáa nduu ndíhu ndaha ñàha Yá Ndiǒxí xii ñáyiú, te dàvá-áⁿ quiní-ndó sã ndácú-gã quidé-gã nchaandi túhú sá váha —càchí-gá xãhaⁿ-gã xii cue téé xica cuu ndihi-gã ndihi cue ñáyiú-áⁿ.

*Jèsús ní nadama dóó-gã ndihi núú-gã
(Mt. 17:1-13; Lc. 9:28-36)*

2 Te núú ìñú nduu sá dúcáⁿ ñí cáháⁿ Jèsús te ní xica-gá cuásaá-gá ìⁿ yucu dùcúⁿ, te ndèca-gá té Pèlú, ndihi té Jàcobó, ndihi té Juàá cuásaá, te únì tnàhí-ni cue téé-áⁿ ndécá-gã cuásaá. Te yucu-áⁿ ndécú-gã ní nadama núú-gã,

3 te ní nadama dóó-gã. Te dóó-gã-áⁿ sũúni ñí nduu cuixíⁿ quiyí te tãsaⁿ, te ni ìⁿ ñáyiú ñuyíú-a ñá túú ndácú-yu naqueté-yu ìⁿ dóó nduu cuixíⁿ dàtná ní nduu dóó-gã.

4 Te ní xiní-güedé té Moisés ndihi té Èliás nútní-güedé ndihi-gá ndátnúhu ndihi ñaha-güedé xii-gá.

5 Te té Pèlú ní xáhaⁿ-dë xii Jèsús:

—Mèstrú, jváha ní cuu sá ndécú-ó ìha vitna! Te na dàcaa-ndí úní tnàhá vehe tnuvixiⁿ, te ìⁿ cuu cuèndá-n te ìⁿ cuu cuèndá té Moisés te ìⁿ cuu cuèndá té Èliás —càchí-dé xáhaⁿ-dě xii-gá.

⁶ Te ducaⁿ nǐ cáháⁿ-dé chi ío ní yùhú-güedé, te cuèndá-ni ní cuu yáchí-dé ní cáháⁿ-dé, te ní mèe-dé ñá túú ní cùtnuní iní-dé nása ndùu tnúhu ní cáháⁿ-dé.

⁷ Te òré-án nǐ quexìo ìⁿ vícò nǔú ndécú-güedě ndìhi Jèsús ní dádáhu ñaha-xi xii-güedé ndìhi-gá, te xití vícò-ǎⁿ nǐ cáháⁿ Yá Ndiǒxí ní tecú dóho-güedé, te xáhaⁿ-gǎ xii-güedé:

—Tée-a cùu-dé Déhe-í téé ío cùu iní-í, te cundedóho-ndo nchàa tnúhu càháⁿ-dé —càchí-gá xáhaⁿ-gǎ xii-güedé.

⁸ Te òré ní quide cuèndá-güedé, te ñá túú-gǎ ní xiní-güedé cue téé úú-án chi mee-nǎ Jèsús ndécú.

⁹ Te òré cuánuu ndìhi ñaha-gǎ xii-güedé yucu-án, te ní cáháⁿ-gá dóho-güedé, te xáhaⁿ-gǎ:

—Vá yǒo ìⁿ cúñaha-ndo nchàa sá nǐ xiní-ndó nǔú nǐ sáá-ó-á, te cuu cáháⁿ-ndó dico ndéé ná yáha ndoto yúhú Tée cùu ñaní tnáhá-ndó nchàa-ndo sá cùú-í —càchí-gá xáhaⁿ-gǎ xii-güedé.

¹⁰ Núu xíǎⁿ cue téé-án nǐ xúhuⁿ nahi-ni iní-güedé nchaa sá nǐ xiní-güedé núú nǐ sáhán-güedé ndìhi Jèsús te ñá túú tnàhí ni cǎháⁿ-güedé, dico ní ndúcú tnúhu núú tnáhá-güedě ná cuèndá ducaⁿ nǐ cáháⁿ-gá sá ndéé ná yáha ndoto-gá sá cùú-gá te dǎtnùní cáháⁿ-güedé nàcuáa ndùu nchaa sá ní xiní-güedé.

¹¹ Te ní xícáⁿ tnúhú-güedě núú Jèsús, te xáhaⁿ-güedě xii-gá:

—¿Cuìní-ndí cachí tnúhu-n nă cuèndá càchí cue tée dàcuaha ñaha xii ñáyiú nchaa tnúhu ní chídó tnùní ndí Moisés sá dǐhna-gá té Èliás ndixi-dé te dàtnùní quixi Yaá tendaha Yă Ndiöxí quixi ñuyíú-a? —càchí-güedé xăhaⁿ-güedě xii-gá.

¹² Te Jèsús ní xáhaⁿ-gă:

—Ndáá sá códó nùu ìⁿ tée quixi-dé te cada-dé dàtná ní quide té Èliás, te tée-áⁿ cada ndáá-dé nchaa nàcuáa cùu. Dico núú tùtú Yă Ndiöxí cáháⁿ-xi cuèndá yúhú Tée cùu ñaní tnáhá-ndó nchàa-ndo sá ïo ndoho-í, te daquèe tihú ñáhá ñáyiú xii-í.

¹³ Te na càchí tnúhu-í xii-ndo vìtna sá sà ní quixi ìⁿ tée ní quide dàtná ní xóo cada té Èliás, te cue ñáyiú ñá túú ní cǎnehé-yu sá yǐñùhu núú-dě, te ní quide ñáhá-yu xii-dé nchaa nàcuáa ní quixi iní méé-yu. Te núú tùtú Yă Ndiöxí sa ndéé tnuní nchaa nàcuáa yáha-dé, te nchaa xǐăⁿ sa ní quide ñaha ñáyiú xii-dé —càchí-gá xăhaⁿ-gă xii-güedě.

Jèsús quidé tătna-gá ìⁿ tée cuechi yǐhi ñaha espíritú cùndǐhi yucu ñávăha

(Mt. 17:14-21; Lc. 9:37-43)

¹⁴ Te Jèsús ní ndexìo-gá ndǐhi cue tée úní-áⁿ nǔú xǐndecu dava-gá cue tée xìca cuu ndǐhi-gá, te vǎi vihi ñáyiú ndècu núú ndécú-güedě-áⁿ, te tnáhá cue tée dàcuaha ñaha xií-yu nchaa tnúhu ní chídó tnùní ndí Moisés xǐndecu, te cue tée-áⁿ nǎndí tnúhu xăhaⁿ-güedě xii cue tée xìca cuu ndǐhi Jèsús.

¹⁵ Te òré ní xiní-yu ní ndexìo-gá, te ncháá-yu ío ní cuñúhu-yu, te xìnú-yu ní sáháⁿ ní cáháⁿ ndǐhi ñáhá-yu xii-gá.

16 Te ní xícaⁿ tnúhú-gă núú cuè téé xìca cuu ndìhì-gá nùu ná tnúhu ndàtnúhu-güedé ndìhì cue téé-áⁿ.

17 Te ìⁿ ñáyiú xǐndecu xíáⁿ ñí xáhăⁿ-yu xii-gá:

—Mèstrú, ndèca-í déhe-í véxi nànducu ñaha-í xii-n, chi yìhì ñaha espíritú cúndìhì yucu ñávăha xii-dé, te ḍiú xíăⁿ ní quide ní cuu ñìhì-dé.

18 Te ío ndòho-dé chi súúní nděni ní cuu ngötn̄i ñaha-xi xii-dé, te òré ducaⁿ quide ñaha-xi xii-dé te ḍànduá ñáhá-xí, te quène tíñú yuhu-dé, te cùrúhñú ñuhu-dé, te ndàda ruúⁿ ñáhá-xí xii-dé. Te sa ní xáhaⁿ-í xii cue téé xìca cuu ndìhì-n sá quèñùhu-güedé espíritú cúndìhì yucu ñávăha yìhì ñaha xii-dé dico ñá túú ní ndàcu-güedé queñuhu-güedé-xi —càchí ñáyiú-áⁿ xăhăⁿ-yu xii-gá.

19 Te Jèsús ní xáhaⁿ-gă:

—ìNchaa nchòhó ñáyiú ndècu ñuyíú-a ío sàá iní-ndó, chi ñá túú cuíní-ndó quìndáá iní-ndó Yă Ndiǒxí, te ní cuu v̄ai nduu quide ndee iní-í nchaa sá quidé-ndó! ¿Te ná ndéé ama vá dúcáⁿ-gă cada-ndo-ì? Te chí cándèca téé cùhú-áⁿ táquìxi iha —cachí-gá xăhaⁿ-gă xií-yu.

20 Te ñáyiú ndìhì ñaha xii téé yìhì ñaha espíritú cúndìhì yucu ñávăha-áⁿ ndécá ñáhá-yu xii-dé cuáháⁿ ndéé núú Jèsús, te òré ní xiní ñáhá espíritú cúndìhì yucu ñávăha-áⁿ xii-gá, te ní ngüíta-ni-xi sàhni yìhì ñáhá tùcu-xi xii-dé, te ní ḍànduá ñáhá-xí xii-dé, te ní ngüíta-dé xíchí ñuhu-dé, te quène tíñú yuhu-dé.

21 Te Jèsús ní xícaⁿ tnúhú-gă núú tătá-dě, te xăhaⁿ-gă xii-dé:

—¿Ná ndéé ama ní ngúíta-xi duha ndòho déhe-n?
—càchí-gá xǎhaⁿ-gǎ xii-dé.

Te téé-áⁿ nǐ xáhaⁿ-dě xii-gá:

—Ndéé cútnàhá cúú líhli-dé ní ngúíta espíritú cúndìhì yucu ñávǎha duha quìde ñaha-xi xii-dé.

²² Te ní cùtítí xito dǎngaunihnu ñaha-xi xii-dé núú ñùhú, te ní cutítí tucu xito dǎngaunihnu ñaha-xi xii-dé ndute cuíní-xi cahni ñaha-xi xii-dé. Te ndéca-í-dé véxi núú-n te núu ndacu-n càda tátna-n-dě, te cundàhú iní ñáhá-n xii-dé chindee ñaha-n —cachí-dé xǎhaⁿ-dě xii-gá.

²³ Te Jèsús ní xáhaⁿ-gǎ:

—Te ná cuendá càchí-n nǔu ndacu-í cada tátna-í déhe-n, chi nchaa ñáyiu na quìndáá iní ñáhá xii-í te ñihí-yu sá ná càcáⁿ-yu núú-í —càchí-gá xǎhaⁿ-gǎ xii-dé.

²⁴ Te tátá tǎe cuechi-ǎⁿ ñihì ní cáháⁿ-dé xǎhaⁿ-dě xii-gá:

—Sàndáá iní ñáhà-í xii-n, dico chindee ñaha xii-í cuendá ná quìndáá iní ñáhá-gǎ-í xii-n —càchí-dé xǎhaⁿ-dě xii-gá.

²⁵ Te Jèsús ndéhé-gǎ sá ïo vǎi ñáyiu ta tàcá núú ndécú-gǎ-áⁿ. Te ní tenàá-gá espíritú cúndìhì yucu ñávǎha-áⁿ, te xǎhaⁿ-gǎ xii-xi:

—Yòhó espíritú cúndìhì yucu ñávǎha, ní quide ñihí-n nǐ quide doho-n tǎe-a, dico vitna yúhú càchí-í sá quée-n yìqui cuñú-dé te vá ndìhu-gá-n —càchí-gá xǎhaⁿ-gǎ xii espíritú cúndìhì yucu ñávǎha-áⁿ.

²⁶ Te espíritú cúndìhì yucu ñávǎha-áⁿ nǐ dácáná sàa ñaha-xi xii téé-áⁿ, te ní sahani yìhì ñáhá tùcu-xi xii-dé, te dǎtnùnì ní quee ñaha-xi xii-dé cuáháⁿ-xi,

dico téé-áⁿ chi dacàa-ni ndíyí càu-dé cātùu-dé. Te nchaa ñáyíu xĩndecu xíáⁿ cächí-yu sá ñí xíhí-dé ní cùu.

²⁷ Te Jèsús ní tñii-gá ndaha-dé ní ndocani ñaha-gã xii-dé, te ní ndacóo-dé ní nucúnutñii-dé.

²⁸ Te Jèsús cuándihu-gá xití vehe ndihí cue téé xìca cuu ndihí-gá, te òré ndéhé-güedě ñá túú-gã ñáyíu, te ní xícáⁿ tñúhú-güedě núú-gã, te xãhaⁿ-güedě xii-gá:

—Cächí tñúhu xii-ndí ná cuendá ñá túú ní ndàcu-ndí queñuhu-ndí espíritú cündihí yucu ñávãha yíhi ñaha xii téé-ãⁿ —cächí-güedě xãhaⁿ-güedě xii-gá.

²⁹ Te Jèsús ní xãhaⁿ-gã xii-güedé:

—Na cächí tñúhu-í xii-ndo sã nõu òré cuñí-ndó queñuhu-ndo espíritú cündihí yucu ñávãha yíhi ñaha xii ñáyíu dàtná cúú espíritú cündihí-xi yíhi ñaha xii téé-ãⁿ ní cùu ña, te xìni ñuhu-xi sá ïo cãháⁿ ndihí-ndo Yã Ndiõxí te ñá túú tñàhí ná caxi-ndo cãháⁿ ndihí-ndo-gã, te ducaⁿ te ndacu-ndo queñuhu-ndo espíritú cündihí yucu ñávãha yíhi ñaha xii ñáyíu —cächí-gá xãhaⁿ-gã xii-güedé.

*Jèsús cãháⁿ tucu-gá sá cáhni ñaha-güedé xii-gá
(Mt. 17:22-23; Lc. 9:43-45)*

³⁰ Te Jèsús ní quee-gá núú ndécú-gã-áⁿ ndihí cue téé xìca cuu ndihí-gá cuáháⁿ-gã ndihí-güedé distritú Galileá, te cuñí-gá sá vã quini ñáyíu ndéé ichi cuáháⁿ-gá.

³¹ Te ducaⁿ ñí sani iní-gá, chi mee-gã sa naha-gá sá ndàá cada-xi nàcuáa xãhaⁿ-gã xii cue téé xìca cuu ndihí-gá, te duha xãhaⁿ-gã xii-güedé:

—Yúhú Tée cùu ñaní tnáhá-ndó nchàa-ndo sáá ìíⁿ nduu te cuáha cuendá ñáhá-güedě xii-í núú cuè téé cùu úhú iní ñáhá, te cahni ñaha-güedě xii-í, dico nduu úní sá cùú-í te ndoto-í —càchí-gá xăhaⁿ-gă xii-güedé.

³² Dico ñá túú tnàhí ni tècú tnùní-güedé nása ndùu tnúhu ní cáháⁿ-gá, te ni ñà túú ní cùyii-güedé cáciáⁿ tnúhú-güedě núú-gă.

Cue téé ndùcu tnúhu núú tnáhá nŭu ndédacàa-güedé ío-gá cúnùu
(Mt. 18:1-5; Lc. 9:46-48)

³³ Te Jèsús ní quexìo-gá ndihì cue téé xica cuu ndihì-gá ñúú Capèrnaúm, te òré sa ndècu-gá ìíⁿ vehe te ní xícáⁿ tnúhú-gă núú-güedě, te xăhaⁿ-gă xii-güedé:

—¿Nándi cùu tnúhu ta xítñàha-ndo véxi? —
càchí-gá xăhaⁿ-gă xii-güedé.

³⁴ Dico ñá túú tnàhí ni cáháⁿ-güedé cúñaha-güedě xii-gá nŭu ná tnúhu xítñàha-güedé òré ñúhú-güedě ichi. Te ducaⁿ ñí quide-güedé chi cuendá tá ndàtnúhu-güedé nŭu ndédacàa-güedé ío-gá cúnùu.

³⁵ Te Jèsús ní ngóo-gá, te ní xáhaⁿ-gă xii ndi ùxúú cue téé xica cuu ndihì-gá:

—Chí táquixi iha te cundedóho-ndo tnŭhu na càháⁿ-í-a. Te núu ìò dava-ndo cùníní-ndó cùnùu-ndo, te cada-ndo să cúú-ndó ñăyiu nchìcúⁿ cuìí-nă, te cunu cuechi-ndo nŭú tnàha ñáyiu-ndo —càchí-gá xăhaⁿ-gă xii-güedé.

³⁶ Te Jèsús ní sanutnii-gá ìíⁿ té líhli cuádava tnuú-güedé, te dàtnùní ní nguídèhé ñáhá-gă xii-dé, te xăhaⁿ-gă xii-güedé:

37 —Nchaa ñáyiú na quèheⁿ cuendá ìⁿ té lǐhli dàtná té lǐhli-a cuendá sá ñúhú ìní ñáhă-yu xii-í ñá, te cada iní-yu sá yǔhú ní queheⁿ cuendá-yu. Te nchaa ñáyiú na quèheⁿ cuendá ñáhá xii-í te ñá díú-ní mèe-í ní quèheⁿ cuendá-yu, chi tnàhá Tătà-í Dútú Ndiǒxí Yaá ní tendaha ñàha xii-í véxi-í ñuyíú-a ní queheⁿ cuendá-yu —càchí-gá xăhaⁿ-gă xii-güedé.

Nchaa ñáyiú ñá túú cùu úhú ìní ñáhá xii-o te cùndìhi ñáhá-yu

(Mt. 10:42; Lc. 9:49-50)

38 Te té Juàá diu-ni ìⁿ téé xìca cuu ndìhi-gá ní xáhaⁿ-dě xii-gá:

—Mèstrú, ní xiní-ndí ìⁿ téé càcunehe ñaha-dé xii-n, te quèñuhu-dé espíritú cùndìhi yucu ñávăha yìhi ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chi ñá túú xìca cuu ndìhi ñaha-dé xii-o —càchí-dé xăhaⁿ-dě xii-gá.

39 Te Jèsús ní xáhaⁿ-gă xii-güedé:

—Daña-ndo na càda nahi-dé ní cùu, chi ñá túú nì ìⁿ ñáyiú ndìhi ndìhi-ni ndacu cáháⁿ cuèhé cuendá-í te núu càcunehe ñahá-yu xii-í, te quidé-yu sá vă yǒo tnàhí ndàcu cada.

40 Te nchaa ñáyiú ñá túú cùu úhú ìní ñáhá xii-o te cùndìhi ñahá-yu.

41 Te na càchí tnúhu-í xii-ndo să cuè ñáyiú na tàxi ìⁿ yaxiⁿ ndute coho-ndo cuendá sá cúú-ndó cuè téé xìca cuu ndìhi-í, te ñáyiú-áⁿ sáá nduu te dacuèi sá ñihí-yu sá ndúú tăhǔ-yu —càchí-gá xăhaⁿ-gă xii-güedé.

Cada cuendá-ó vă cùndècu-o ichi cuehé ichi duha
(Mt. 18:6-9; Lc. 17:1-2)

42 Te xăhaⁿ tùcu Jesús xii-güedé:

—Te núu ìⁿ téé na dàcaháⁿ-dé cue ñáyiú sàndáá iní ñáhá xii-í cadá-yu nándi sá cuèhé sá dúhá, te váha-gá sá nŭu na dàcutu ndeé-güedé ìⁿ yúú yǒdó dŭcúⁿ-dě, te dàquée ñaha-güedě xii-dé xití ndute làmár, te ñá díú sǎ cùndècu-dé ducaⁿ càda-dé.

43 Te núu ìⁿ xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuěi na cuíta ìⁿ xio ndaha-ndo te ñá díú sǎ quihíⁿ-ndó ñihíí ní ndúú-ndó nŭú ùhú núú ndàhú núú dìcò sàá ndáhá itá ñuhú ni caa ni quihíⁿ.

44 Chi yàcáⁿ cúú-xí nŭú ñà túú tnàhí ndàhvá ñuhú, te ío ndoho-ndo cùndecu-ndo xíaⁿ ni caa ni quihíⁿ.

45 Te núu ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tàhú-ndó cuěi na cuíta ìⁿ xio sáhá-ndó, te ñá díú sǎ quihíⁿ-ndó ñihíí ní ndúú-ndó nŭú ùhú núú ndàhú núú dìcò sàá ndáhá itá ñuhú ni caa ni quihíⁿ.

46 Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíaⁿ ni caa ni quihíⁿ.

47 Te núu ìⁿ xio tinùu-ndo quide-xi quide-ndo nándi sá cuèhé sá dúhá, te tava-ndo cuíta-xi, chi váha-gá sá cùndècu-ndo núú ndécú Yǎ Ndiǒxí táxí tnùnì-gá cuěi na cuíta ìⁿ xio tinùu-ndo, te ñá díú sǎ ndì nduú xio núú-ndó quihíⁿ-ndó nŭú ùhú núú ndàhú.

48 Chi yàcáⁿ ñá túú tnàhí ndàhvá ñuhú, te ío ndoho-ndo cùndecu-ndo xíaⁿ ni caa ni quihíⁿ.

49 'Te dàtná quídé-güedě quitì sàhni-güedé chìhi-güedé cuñú-di ñí te dàquée-güedé núú ñùhú, ducaⁿ sàtnahá-xi ndoho cue ñáyiú chi ío ndohó-yu.

50 Te ñí chi ío váha nàndíhi-xi, dico núu na ndùu víxiⁿ-xi te ñá túú-gă nándíhi-xi te ni ñà túú-gă nása cada-o ndùu úhá tucu-xi. Te ío váha cada cuendá-ndó nàcuáa cundecu-ndo cuendá cuu-ndo ñáyiú váha, te ducaⁿ te cuu-ndo dàtná ñí sá ñà túú ndùu víxiⁿ, te ío váha cundecu ndíhi tnàha-ndo — cachí-gá xăhaⁿ-gă xii-güedé.

10

*Jèsús càháⁿ-gá cuendá cue ñáyiú dàña tnaha
(Mt. 19:1-12; Lc. 16:18)*

¹ Te Jèsús ní xica-gá cuáháⁿ-gá ní yáha-gá yucu distritú Jùdeá ní téhndé-gá ndàa ingá xio yúte Jòrdán. Te yàcáⁿ ndécú-gă ní tacá tucu cuéhé víhí ñáyiú, te ní ngúita-ni tucu-gá dánèhé ñáhá-gă xii-yu tnúhu-gá chi ducaⁿ tnàhí quède-gá.

² Te ní quèxio ñí úú cue téé cùu fariséú núú ndécú Jèsús xító ndèé ñáhá-güedě xii-gá nùu nása cunduu tnúhu cáháⁿ-gá, te xăhaⁿ-güedě xii-gá:

—Véxi-ndí xìcáⁿ tnúhú-ndí núú-n nùu cuu dañá ñí téé ñàdìhí-dé ãⁿ ñáhá —càchí-güedé xăhaⁿ-güedě xii-gá.

³ Te Jèsús ní xáhaⁿ-gă xii-güedé:

—Te nchòhó, ¿nása ní cachí ndíi Moisés cada-ndo-i? —càchí-gá xăhaⁿ-gă xii-güedé.

⁴ Te ní xáhaⁿ-güedě xii-gá:

—Ndíi Moisés ní cachí ndíi sá cúú dàña ñí téé ñàdìhí-dé dícó-ni sá cádüha-dé ñí tutú cuáñaha-dě, te núú tütú-áⁿ codo tnùnì sá ñí dáñá ñàha-dé,

te ducaⁿ te cuu dañá-dě ñadìhí-dé —càchí-güedé xăhaⁿ-güedě xii-gá.

⁵ Te Jèsús ní xăhaⁿ-gă xii-güedé:

—Te ducaⁿ ñí chídó tnùní ndíi Moisés cada-ndo cuendá sá ïo sàá iní-ndó.

⁶ Dico Yá Ndiõxí cútnàhá ní cadúha-gá ñuyíú ndihí nchaá sá ïó, chi tée ñadìhí ní cadúha-gá.

⁷ Te xíăⁿ nŭu nchaá cue tée na ñihí ñadìhí-xi, te dîiⁿ-ná cada-güedé tătá-güedě ndihí năná-güedě, chi mee-nă ñadìhí-güedé cuu cuu ndihí-güedé.

⁸ Te cue ñáyíu úú-áⁿ ñà túú-gă ndí dîiⁿ ndí dîiⁿ yìqui cuñú cúŭ-yu, chi cada iní-ndó să ïiⁿ-nă yìqui cùñú cúŭ-yu.

⁹ Te xíăⁿ nŭu ñá túú ndùu váha-xi dañá cuè tée ñadìhí-güedé, chi mee Yá Ndiõxí ní cachí-gá sá cúú ũú-yu cundecú-yu ndéé naa ndéé cuú-yu —càchí-gá xăhaⁿ-gă xii-güedé.

¹⁰ Te òré yíhí Jèsús ndihí cue tée xìca cuu ndihí-gá vehe, te ní xícáⁿ tnúhú-güedě núú-gă nása ndùu tnúhu ní cáháⁿ-gá cuendá cue ñáyíu dàña tnaha.

¹¹ Te Jèsús ní xăhaⁿ-gă xii-güedé:

—Te núu ïiⁿ tée na dàña-dé ñadìhí-dé te naqueheⁿ-dé ingá ñadìhí, te ío nèhé quidé-dě, te ïiⁿ-ni cuèchi cùu-xi ndihí cuèchi quide tée ndèca ñadìhí te càháⁿ ndihí-dé ingá ñadìhí.

¹² Te dîu-ni ducaⁿ săt nahá-xi cùu tucu ñáyíu dîhí te núu na dàná-yu yíi-yu te naquehéⁿ-yu ingá tée, chi ïiⁿ-ni cuèchi cùu-xi sá quidé-yu ndihí sá quidé cuè ñáyíu dîhí ndécú yìi-xi, te càháⁿ ndihí-yu ingá tée —càchí-gá xăhaⁿ-gă xii-yu.

*Jèsús xìcáⁿ táhú-gă núú Yă Ndiõxí cuëndá landú
(Mt. 19:13-15; Lc. 18:15-17)*

13 Te ìⁿ ùú ñáyíu ndècá-yu landú lǐhli cuáhán núú Jèsús, chi cuìní-yu sá téndàha ñaha-gá xii-güexi. Te cue téé xìca cuu ndìhi-gá ní ngüíta-güedé ténàá ñáhá-güedě xií-yu, te xáhaⁿ-güedě sá vă dúcáⁿ cádá-yu.

14 Te òré ní xiní-gá sá dúcáⁿ quìde-güedé, te ní cudééⁿ-gă núú-güedě, te xáhaⁿ-gă xii-güedé:

—Chí dáñá ná quìxi nahi cue landú lǐhli-áⁿ nǔù-í-a te vâ cādí-ndó ìchi-güexi, chi dàtná cúú vâha iní cue landú lǐhli-áⁿ ducaⁿ cùu vâha iní cue ñáyíu yìndaha Yá Ndiõxí.

15 Te na cächí tnúhu ndáá-í xii-ndo să nǔu vâ quìndáá iní ñáhá-ndó dàtná quídé cuè landú lǐhli sàndáá iní ñáhá xii-í, te vâ ndǐhu ndaha ñàha Yá Ndiõxí xii-ndo —cächí-gá xáhaⁿ-gă xii-güedé.

16 Te sátá dúcáⁿ nǐ xáhaⁿ-gă te ní nguídèhé-gá cue landú-áⁿ te ní tendaha ñàha-gá xii-güexi, te ní xìcáⁿ táhú-gă núú Yă Ndiõxí cuëndá-güexi.

*Ìⁿ téé cuica càháⁿ ndìhi-dé Jèsús
(Mt. 19:16-30; Lc. 18:18-30)*

17 Te òré sa ñùhu ichi Jèsús caca-gá quíhíⁿ-gá ìngá xichi ní cùu ní quexìo cunu ìⁿ téé ní ngüíñí xítí-dě núú-gă, te xáhaⁿ-dě xii-gá:

—Yòhó Mèstrú, cùu-n téé ío vâha iní-xi, te cuìní-í nǔu vâ cúndèe iní-n cächí tnúhu-n nă cúú să cádà-í cuëndá nduu táhù-í cundecu-í ndìhi Yá Ndiõxí ní caa ní quíhíⁿ —cächí-dé xáhaⁿ-dě xii-gá.

18 Te Jèsús ní xáhaⁿ-gă xii-dé:

—¿Te cùtnuní iní-n nàcuáa ndùu tnúhu càháⁿ-n sǎ yǔhú váha iní-ǎⁿ? Chi ñⁿdìi díi-ni Yá Ndiöxí ío váha iní-gá.

¹⁹ Te yòhó xìní-n nàcuáa ní cachí Yǎ Ndiöxí cada ñáyiu, te duha ní cachí-gá: “Nchòhó cue téé vá càháⁿ ndìhi-ndo ñàdìhí te núu ñá díú ñàdìhí-ndó cùú-yu, te ducaⁿ-ni nchòhó cue ñáyiu dìhí tucu vá càháⁿ ndìhi-ndo tée te núu ñá díú yè-ndo cuu-güedé, te vá cáhní-ndó tnàha ñáyiu-ndo, te ni vǎ dúhú-ndó sǎ ndécú ndìhí-yu, te ni vǎ dácàcu-ndo cuéchi neñúú sá cúú-xí tnàha ñáyiu-ndo, te ni vǎ dácuañdehnde-ndo, te canehe-ndo sǎ yíñùhu núú tǎtá-ndó ndìhi núú nǎná-ndó”, duha ní cachí Yǎ Ndiöxí cada ñáyiu —càchí-gá xǎhaⁿ-gǎ xii-dé.

²⁰ Te téé-áⁿ ñǎ xáhaⁿ-dě xii-gá:

—Mèstrú, nchaa xíǎⁿ ní ngüíta-í quidè-í ndéé cùtnàhá cúú làndú-í —càchí-dé xǎhaⁿ-dě xii-gá.

²¹ Te Jèsús ní xíndéhé ñàha váha-gá xii-dé, te ní cuu váha iní ñáhá-gǎ, te ní xáhaⁿ-gǎ xii-dé:

—Dico cùmání ìngá núú sǎ cádá-n. Vitna te quíhíⁿ-n te dico-n nchàa sá ndécú ndìhi-n, te díhúⁿ-n cuǎha táhú-n cuè ñáyiu ndàhú. Te ducaⁿ, te nduu táhú-n nùcúndecu váha-n nùú ndécú Yǎ Ndiöxí táxi tnùní-gá, te sǎtá ná yǎha ducaⁿ càda-n, te quixi-n chìtnahá ñáhá-n xii-í cuèi na ndòho-n datná ndoho-í —càchí-gá xǎhaⁿ-gǎ xii-dé.

²² Te sá dúcáⁿ ñǎ xáhaⁿ Jèsús xii-dé te ío ní cundìyí-dé chi ío cuica-dě, te ní xica-dé cuánuhú-dé.

²³ Te ní ndacoto-gá ni càndéé dǎñi-gá, te ní xáhaⁿ-gǎ xii cue téé xica cuu ndìhi-gá:

—Cue ñáyu cuica chi ío úhú quíndáá iní-yu Yá Ndiöxí cuendá ndíhu ndaha ñàha-gá xií-yu —càchí-gá xǎhaⁿ-gǎ xii-güedé.

24 Te cue téé xìca cuu ndìhi-gá-áⁿ ïo ní cuñúhu-güedé nàcuáa ní cáháⁿ-gá, te ní xáhaⁿ tucu-gá xii-güedé:

—Nchòhó cue téé xìca cuu ndìhi-í càchí tnúhu tucu-í xii-ndo sǎ ïo úhú quíndáá iní cue ñáyu cuica Yá Ndiöxí cuendá ndíhu ndaha ñàha-gá xií-yu, chi sàni iní-yu sá ncháá sǎ ndécú ndìhí-yu dàcácu ni-hnu ñaha-xi xií-yu núú ùhú núú ndàhú.

25 Te yáchí-gá yáha ìⁿ càméyu yaú ìⁿ yiqui tìcú dàcúúxí sǎ quíndáá iní ìⁿ ñáyu cuica Yá Ndiöxí cuendá ndíhu ndaha ñàha-gá xií-yu —càchí-gá xǎhaⁿ-gǎ xii-güedé.

26 Te cue téé xìca cuu ndìhi-gá ní cuñúhu vìhi-gá-güedé sá dúcáⁿ nǐ cáháⁿ-gá, te ní ngúíta-güedé xǐtnàha-güedé:

—¿Te yoo sa ndacu naníhí tàhú te núu ducaⁿ vàiⁿ? —càchí-güedé xǐtnàha-güedé.

27 Te Jèsús ní xíndéhé vǎha ñaha-gǎ xii-güedé, te ní xáhaⁿ-gǎ:

—Nchaa ñáyu ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiöxí xií-yu, dico mee-gǎ chi ndacu-gá ndíhu ndaha ñàha-gá xií-yu, chi nchaandi túhú sá vǎha ndàcu-gá quídé-gǎ —càchí-gá xǎhaⁿ-gǎ xii-güedé.

28 Te té Pèlú ní xáhaⁿ-dè xii-gá:

—Nchúhú ní dándõo-ndí nchaandi túhú sá ndécú ndìhi-ndí te ní tuha ñaha-ndǐ xii-n —càchí-dé xǎhaⁿ-dè xii-gá.

29 Te Jèsús ní xáhaⁿ-gǎ xii-dé:

—Na càchí tnúhu ndáá-í xii-ndo sǎ ncháá ñǎyiu na dándóo vehe-xi, àdi ñaní-xi, cúha-xi, tǎtá-xi, nǎná-xi, déhe-xi, àdi ñuhu-xi, te núu ducaⁿ na càdá-yu sá cuèndá-í ndihí sá cuèndá tnúhu-í,

30 te ío-gá cuéhé sǎ cuǎñaha Yǎ Ndiǒxí cundecu ndihí-yu, chi níhí-yu vehé-yu, ñuhú-yu, ñaní-yu, cúha-yu, nǎná-yu, déhe-yu, te ñá díú-ní sǎ nchàa xíǎⁿ níhí-yu cundecu ndihí-yu, chi tnàhá nduu tǎhǔ-yu cundecu ndihí ñàhá-yu xii-í ní caa ní quíhíⁿ ná sǎá nduu. Dico díhna-gǎ ndoho tnahá-yu núú ñuyíú-a sá cuèndá-í.

31 Te dava ñáyiu cùnūu ndecu ichi Yá Ndiǒxí vitna, ñáyiu-áⁿ sǎá nduu te vá ío-gá cunúú-yu dàtná cúnúú-yu vitna, te dava ñáyiu nchìcúⁿ ñá túú cùnūu vitna ñáyiu-áⁿ sǎá nduu te ío cunúú-yu — càchí-gǎ xáhaⁿ-gǎ xii-güedé.

Jèsús càháⁿ tucu-gǎ sá cáhni ñàha-güedé xii-gǎ

(Mt. 20:17-19; Lc. 18:31-34)

32 Te ñuhu Jesús ichi ndihí cue téé xìca cuu ndihí-gǎ cuásaá ndihí ñaha-gǎ xii-güedé ñuú Jerusàlén, te yòdo nuu-gǎ núú-güedé cuásaá. Te cue téé-áⁿ xícuñúhu-güedé sá dúcáⁿ cuǎháⁿ-gǎ ñuú Jerusàlén, te dava cue ñáyiu xínchícúⁿ xíyùhú-yu. Te ní taudìⁿ-gǎ ndi ùxúú cue téé xìca cuu ndihí-gǎ, te ní ngúíta-gǎ cání-gǎ cuèndú núú-güedé nchaa nàcuáa yáha-gǎ.

33 Te xáhaⁿ-gǎ xii-güedé:

—Vitna ñuhu-o ichi cuásaá-ó ñuú Jerusàlén, te yàcáⁿ cuáha cuèndá ñàhá-güedé xii yúhú Téé cùu ñaní tnahá-ndó nchàa-ndo núú cuè téé cùu dútú cúnūu, ndihí núú cuè téé dàcuaha ñaha xii ñáyiu

nchaa tnúhu ní chídó tnùní ndí Moisés. Te diu cue téé-áⁿ cññaha-güedě xii dava-gá cue téé sá cáhni ñàha-güedé xii-í, te cuáha cuèndá ñáhá-güedě xii-í núú cuè téé ñá túú cùu cue téé isràél.

³⁴ Te cue téé-áⁿ cudíquí ndeé ñáhá-güedě xii-í, te caniha-güedě ndihí ññ, te tiú díí ñáhá-güedě, te cahni ñaha-güedě xii-í dico nduu úní sá cùú-í te ndoto-í —càchí-gá xàhaⁿ-gã xii-güedé.

Té Jàcobó ndihí té Juàá càháⁿ ndàhú-güedé núú Jèsús sá cádá-gã ñⁿ sá cuìní-güedé
(Mt. 20:20-28)

³⁵ Te cue déhe té Zebèdeú té Jàcobó ndihí té Juàá ní quexìo-güedé núú Jèsús, te xàhaⁿ-güedě xii-gá:

—Mèstrú, véxi-ndí càháⁿ ndàhú-ndí núú-n nñu vá cùndèe iní-n càda-n ñⁿ sá cuìní-ndí —càchí-güedé xàhaⁿ-güedě xii-gá.

³⁶ Te Jèsús ní xícáⁿ tnúhú-gã núú-güedě, te xàhaⁿ-gã:

—¿Ná cùú sã cuìní-ndó càda-í-í? —càchí-gá xàhaⁿ-gã xii-güedé.

³⁷ Te ní xáhaⁿ-güedě xii-gá:

—Cuìní-ndí sá òré ná sàá nduu cùndecu-n núú táxí tnùní-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —cachí-güedé xàhaⁿ-güedě xii-gá.

³⁸ Te Jèsús ní xáhaⁿ-gã xii-güedé:

—Nchòhó, ñá túú cùtnuní iní-ndó nàcuáa ndùu sá xícáⁿ-ndó nñu-í. ¿Te náa cundee iní-ndó dândoho ñaha ñáyiu xii-ndo dàtná dandòho ñahá-yu xii-í, te cundee tùcu iní-ndó cahni ñahá-yu xii-ndo dàtná cahni ñahá-yu xii-í-ãⁿ? —càchí-gá xàhaⁿ-gã xii-güedé.

39 Te ní xáhaⁿ-güedě xii-gá:

—Cundee ìní-ndí yáha-ndí nchaa nàcuáa càháⁿ-n-ăⁿ —càchí-güedé xăhaⁿ-güedě xii-gá.

Te Jèsús ní xáhaⁿ-gă xii-güedé:

—Ndáá sá cündèe iní-ndó ndòho-ndo nchaa nacuáa ndoho-í, te cundee tùcu iní-ndó càhni ñahá-yu xii-ndo, chi yúhú cahni ñahá-yu xii-í.

40 Dico sá dúcáⁿ cuìní-ndó să ñⁿ-ndó cùnucóo-ndo xìo cuha-í te ñⁿ-ndo cùnucóo-ndo xìo datni-í, te xíăⁿ chi ñá díú yúhú tàú-í cachí-í te núu sá cúú cùnucóo-ndo àdi sá vă cúú cùnucóo-ndo, chi mee Tătà-í Dútú Ndiöxí cachí-gá te núu ná cúú ñăyiu nduu táhú cunucóo dîñi-í dàvá-áⁿ —càchí-gá xăhaⁿ-gă xii-güedé.

41 Te òré ní níhí ùxí-gá cue tée xìca cuu ndihi-gá tnúhu nàcuáa ndùu sá cuìní té Jàcobó ndihi ñaní-dé té Juáá, te ní cudééⁿ-güedě núú cuè tée úú-áⁿ.

42 Te Jèsús ní cana-gá nchaa cue tée xìca cuu ndihi-gá-áⁿ, te ní xáhaⁿ-gă xii-güedé:

—Nchòhó xìní-ndó să cuè tée yìndaha ñⁿ nacióⁿ quìde-güedé sá ïo cùnucóo-güedé, te nchaa dava-gá cue tée cùndihi-güedé tnàhá-güedé quídé-güedé sá ïo cùnucóo-güedé.

43 Dico nchòhó chi vá dúcáⁿ càda-ndo. Chi núu dava-ndo cuìní-ndó cùnucóo-ndo te xìni ñuhu-xì cunu cuechi núú tnàhá-ndó te vá cádá-ndó să cùnucóo-ndo.

44 Te núu dava-ndo cuìní-ndó quène cáva-ndo, te cuu-ndo dàtná cue ñăyiu ñá túú tnàhí dàñá quee núú chíúⁿ pàtróoⁿ-xi cunu cuechi núú tnàhá-ndó.

45 Te yúhú Tée cùu ñaní tnàhá-ndó nchàa-ndo, chi ñá túú vèxi-í sá cúnú cuèchi ñăyiu núú-í, chi véxi-í sá cúnú cuèchi-í núú-yu. Te cuú-í ñuyíú-a cuèndá

vàí-yu cácu nihnu núú ùhú núú ndàhú —càchí-gá xăhaⁿ-gă xii-güedé.

*Jèsús quidé tătna-gá ìⁿ téé cuàá nání-dě Bartimeú
(Mt. 20:29-34; Lc. 18:35-43)*

⁴⁶ Te Jèsús ní quexìo-gá ñuú Jericó ndihi cue téé xìca cuu ndihi-gá, te ní yáha-gá ndihi-güedé ichi xití ñuú-áⁿ, te ío cuéhé ñăyiu nchìcúⁿ ñáhá xii-gá cuáháⁿ te ìⁿ xio yuhu ìchi sá ñí quee xití ñuú-áⁿ núcõo ìⁿ téé cuàá nání-dě Bartimeú, te tătá-dě nání-dě Tìmeú, te téé-áⁿ núcõo-dé yuhu ìchi-áⁿ xìcáⁿ ndàhú-dé.

⁴⁷ Te téé-áⁿ ñí cutnùní iní-dé sá Jèsús téé ñuú Nazàrét ñùhú-dě ichi, te ní ngúíta-dé níhi càháⁿ-dé, te xăhaⁿ-dě xii-gá:

—Jèsús, ñaní tnáhá ndíi Dàvíí, cundàhú iní ñáhá xii-í! —càchí-dé xăhaⁿ-dě xii-gá.

⁴⁸ Te vâi ñăyiu tènaá ñáhă-yu xii-dé, te xăhăⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xăhaⁿ-dě xii-gá:

—Jèsús, ñaní tnáhá ndíi Dàvíí cundàhú iní ñáhá xii-í! —càchí-dé xăhaⁿ-dě xii-gá.

⁴⁹ Te Jèsús ní ngúíñí-gá te ní xáhaⁿ-gă xii cue téé ndihi-gá:

—Chí cuănguaca téé cuàá-ăⁿ candeca-ndo-dě quixi iha —càchí-gá xăhaⁿ-gă.

Te cue téé-áⁿ ñí xica-güedé cuănguaca-güedé téé cuàá-áⁿ, te òré ní quexìo-güedé núú-dě te ní xáhaⁿ-güedě xii-dé:

—Ndacuíñí te vá ndihú-gá iní-n, na quèhíⁿ-ó chi càna ñaha Jesús xii-n —càchí-güedé xăhaⁿ-güedě xii-dé.

⁵⁰ Te téé-áⁿ ñí xócání-dě dóó ndíxí-dě, te ndíhi-ni ní ndacuíñí-dé te ní xica-dé cuáháⁿ-dé núú Jèsús.

51 Te òré ní quexìo-dé te ní xícaⁿ tnúhú-gă nùú-dě, te xăhaⁿ-gă xii-dé:

—¿Ná cuìní-n càda ñaha-í xii-n-i? —càchí-gă xăhaⁿ-gă xii-dé.

Te tée cuàá-áⁿ nǐ xăhaⁿ-dě xii-gá:

—Mèstrú, cuìní-í cada tátna-n nǔú-í cuèndá cundehe-í —càchí-dé xăhaⁿ-dě xii-gá.

52 Te Jèsús ní xăhaⁿ-gă xii-dé:

—Cuanùhú vitna, chi sa ní ndúha núú-n chi ní sándáá iní-n Yă Ndiǒxí —càchí-gă xăhaⁿ-gă xii-dé.

Te òré-ni-áⁿ nǐ ndúha núú-dě te nchìcúⁿ-dé Jèsús cuáháⁿ.

11

Jèsús cuánguihu-gă ñuú Jerusàlén

(Mt. 21:1-11; Lc. 19:28-40; Jn. 12:12-19)

1 Te Jèsús ní cuyatni-gă ndihì cue tée xìca cuu ndihì-gă ñuú Bètaniá, ndihì ñuú Bètfaqé, te xíaⁿ cáá yùcu nani Olívú, te yatni vií-nă xíaⁿ cáá ñuú Jerusàlén. Te Jèsús ní cana-gă úú-ni tnàhá cue tée xìca cuu ndihì-gă.

2 Te ní xăhaⁿ-gă xii-güedé:

—Chí cuàháⁿ ñuú cáá yàtni yacáⁿ, te òré quexìo-ndo yacáⁿ te naníhí-ndó ìⁿ búrru ndètníi-di, te vátá yǒo ìⁿ-gă codo ñàha xii-di, te nandaxi-ndo-di te candeca-ndo-di quixi.

3 Te núu yoo na càcáⁿ tnúhú nǔú-ndó nă cuèndá nándàxi-ndo-di, te cúñaha-ndo sǎ yǔhú Yaá xíca cùu ndihì-ndo xini ñuhu-í-di, te na yăha canehe chiuⁿ-í-di te ndǐhì-ni natendaha-í-di, duha cúñaha-ndo —càchí-gă xăhaⁿ-gă xii-güedé.

4 Te cue téé-áⁿ nǐ xica-güedé cuáháⁿ-güedé, te òré ní quexìo-güedé ñuú-áⁿ te ní naníhí-güedé ñⁿ bǔrru ndètníi-di ñⁿ yutnu ñihnu yatni ñⁿ yuyehe vehe caa yatni yuhu ichi, te ní ngüíta-güedé nándàxi-güedé-di.

5 Te mei òré nándàxi-güedé-di ní quexìo ñáyiu xǎhǎⁿ-yu xii-güedé:

—¿Ná cuendá nándàxi-ndo búrru-áⁿ-i? —càchí-yu xǎhǎⁿ-yu xii-güedé.

6 Te cue téé-áⁿ nǐ xáhaⁿ-güedé xii-yu nàcuáa ní xáhaⁿ Jèsús cúñaha-güedé. Te sátá dúcáⁿ te ní dáñǎ-yu ndèca-güedé búrru-áⁿ cuáháⁿ núú ndécú Jèsús.

7 Te òré ní quexìo-güedé ndihí-di núú ndécú-gǎ, te ní sacáⁿ ndodo-güedé dóo-güedé sátá-di, ní ngódó ñàha Jesús xii-di.

8 Te ío cuéhé ñáyiu ta sàcáⁿ-yu dóo-yu ichi cuáháⁿ-gá cuendá núú dǒo-yu-áⁿ yǎha-gá ndihí quiti yòdo-gá, te davá-yu xèhndé-yu ndaha yutnu ta sacáⁿ-yu cuáháⁿ.

9 Te nchaa ñáyiu yòdo nuu núú-gǎ ndihí nchaa ñáyiu nchicúⁿ ndàa sátá-gǎ ní ngüíta-yu níhi càháⁿ-yu, te càchí-yu:

—¡Ío càhnu cuu Yaá-a! ¡Te Yá Ndiöxí ná chindee ñaha-gá, chi diu-gá cúu-gǎ Yaá ní tendaha-gǎ véxi quide núú-gǎ!

10 ¡Te diu-ni Yaá-á cúu-gǎ Yaá véxi quindaha ñàha xii-o datná ní xóo cada ndíi Dàvíi! ¡Te ndéé nchaa sá ío andíu na càchí-xi sá ío càhnu cuu-gǎ! —duha càchí-yu.

11 Te Jèsús ní quexìo-gá ñuú Jerusalén, te cuánguihu-gá xití veñúhu càhnu sá ío cùnuu, te

ní xíndéhé vǎha-gá nchaa sá ndécú xítí veñúhu-án. Te sátá dúcáⁿ te ní ndee-gá cuáhán-gá ñuú Bètaniá ndihí ndi ùxúú cue téé xica cuu ndihí-gá chi sa ní cuaa.

Jèsús xǎhaⁿ-gǎ xii yutnu ngǔxí sá vǎ cúúⁿ-gǎ sávídí-xi
(Mt. 21:18-19)

¹² Te nduu tněé-án nǐ quee Jèsús ñuú Bètaniá ndihí cue téé xica cuu ndihí-gá, te ichi ñúhu-gá ní xíhí-gá docó.

¹³ Te xica nǐ xiní-gá nútnǐ ñⁿ yutnu ngǔxí, te ní xica-gá cuándéhé-gá ñú ndèé sávídí-xi te ñá túú nǎ ndèé, chi mee-ni ndàha-xi ndeé chi ñá díú yóó sácǔndeé sávídí-xi.

¹⁴ Te Jèsús ní xáhaⁿ-gǎ xii yutnu ngǔxí-án:

—Vitna te vǎ yóo ñⁿ-gá caxi sávídí-n, chi vǎ cúúⁿ-gǎ —càchí-gǎ xǎhaⁿ-gǎ xii yutnu ngǔxí-án.

Te cue téé xica cuu ndihí-gá ní tecú dóho-güedé nàcuáa ní xáhaⁿ-gǎ xii yutnu ngǔxí-án.

Jèsús ñá túú tnàhá iní-gá nàcuáa quide ñáyiu xítí veñúhu
(Mt. 21:12-17; Lc. 19:45-48; Jn. 2:13-22)

¹⁵ Te Jèsús ní quexìo tucu-gá ndihí cue téé xica cuu ndihí-gá ñuú Jerusàlén, te cuánguìhu tucu-gá xítí veñúhu càhnu sá ïo cùnuu, te xítí veñúhu-án xíndecu cue ñáyiu quide ndáhú nádìcò-yu, ndihí cue ñáyiu xísaaⁿ. Te nchaá-yu ní queñuhu ñaha Jèsús xii-yu quehé, te ní dándüá-gá mèsá cue ñáyiu dàma díhúⁿ, ndihí nchaa xilé sácóo nchihí cue ñáyiu dìco lómá xíndecu xítí veñúhu-án.

¹⁶ Te ñá túú tnàhí-gá ní dàña-gá yáha cue ñáyiu ndihí nchaa sá nchídǒ-yu ichi xítí veñúhu-án.

17 Te ní xáhaⁿ-gă xií-yu:

—Núú tütú Yă Ndiöxí cãháⁿ-xi nàcuáa ní cãháⁿ-gá, te ní cachí-gá: “Vehe-í cúú-xí vèhe núú tàcá ñáyiú ñihí ñuyú cãháⁿ ndihí ñàhá-yu xii-í”, duha ní cãháⁿ-gá cãchí-xi núú tütú-gá. Dico nchòhó quidé-ndó vèhe-gá vehe ñadúhú —cãchí-gá xãhaⁿ-gă xií-yu.

18 Te nchaa dütú cúnùu, ndihí nchaa cue téé dàcuaha ñaha xii-yu nchaa tnúhu ní chídó tnùní ndíi Moisés ní tecú dóho-güedé nàcuáa ní cãháⁿ-gá te ní ngüíta-güedé ndúcú-güedé nàcuáa cada-güedé cahni ñaha-güedé xii-gá, chi yùhú-güedé sá ïo cunuu-gă, te ducaⁿ chi nchaa ñáyiú ïo cùñúhu-yu nchaa tnúhu cãháⁿ-gá.

19 Te òré sa ní cuaa cuií-nă, te ní quee tucu Jèsús ndihí cue téé xìca cuu ndihí-gá ñuú Jerusalén cuáháⁿ-gá ndihí-güedé ingá xichi.

Ní yíchí yutnu ngüxí
(Mt. 21:20-22)

20 Te nduu tnéé nehé-ni ní yáha tucu Jèsús ndihí cue téé xìca cuu ndihí-gá núú níhnú yùtnu ngüxí, te ní xiní-güedé sa ní yíchí ñihí ndéé yóho-xi.

21 Te té Pèlú ní ndacu iní-dé nàcuáa ní xáhaⁿ Jèsús xii yutnu ngüxí-áⁿ, te ní xáhaⁿ-dë xii-gá:

—Mèstrú, cundehe nă ní yíchí yutnu ngüxí sá ñí xáhaⁿ-n sã vă cúúⁿ-gă sávidí-xi —cãchí-dé xãhaⁿ-dë xii-gá.

22 Te Jèsús ní xáhaⁿ-gă xii-güedé:

—Quindáá ndisa iní-ndó Yă Ndiöxí.

23 Te na cãchí tnúhu ndáá-í xii-ndo sã ñuu nchòhó cùñaha-ndo xii tñdúú-a xocuñí-xi núú ndécú-xí, te quíhíⁿ-xi quée-xi xití làmár. Te diu ducaⁿ càda-xi

te núu nchòhó vá cání ìⁿ cani úú iní-ndó, te quíndáá iní-ndó sǎ dúcáⁿ càda-xi.

²⁴ Te xǎⁿ núu cǎchí tnúhu-í xii-ndo sǎ nchàa sá ná cǎcáⁿ-ndó núú Yǎ Ndiǒxí òré cǎháⁿ ndìhi-ndo-gǎ, te taxi-gá te núu nchòhó sàndáá ndisa iní-ndó sǎ táxi-gǎ sá xìcáⁿ-ndó núú-gǎ.

²⁵ Te òré cǎháⁿ ndìhi-ndo Yǎ Ndiǒxí te dandàcu iní-ndó te núu ndècu ñáyíu ñà túú cùu váha iní ñáhá xii-ndo, te cada cǎhnu iní-ndǒ-yu cuendá ducaⁿ càda cahnu iní ñáhá Tǎtá-ndó Dǔtú Ndiǒxí Yaá ndécú àndíu xii-ndo cuendá nchaa sá ñà túú vǎha quíde-ndo.

²⁶ Dico núu nchòhó vá cǎdá cǎhnu iní-ndó sǎ quíde ñàha tnaaha ñáyíu-ndo xii-ndo, te ní Tǎtá-ndó Dǔtú Ndiǒxí vá cǎdá cǎhnu iní ñáhá-gǎ xii-ndo cuendá nchaa sá ñà túú vǎha quíde-ndo —cachí-gá xǎhaⁿ-gǎ xii-güedé.

*Jèsús ndécú ndìhi-gá tnúhu ndee ìní
(Mt. 21:23-27; Lc. 20:1-8)*

²⁷ Te Jèsús ní ndexìo tucu-gá ñúú Jerusàlén ndìhi cue téé xìca cuu ndìhi-gá, te cuánguìhu tucu-gá xití veñúhu cǎhnu sá ìo cùnūu ndìhi-güedé. Te xití veñúhu-áⁿ yíhí-gǎ ní quexìo cue dútú cùnūu ndìhi cue téé dàcuaha ñaha xii ñáyíu nchaa tnúhu ní chídó tñùní ndíi Moisés, ndìhi cue téé cùu sacuéhé núú ñáyíu isràél.

²⁸ Te xǎhaⁿ-güedě xii-gá:

—Cuíní-ndí cachí tnúhu-n xii-ndí nása ndùu tnúhu ndee ìní ndécú ndìhi-n núu quíde-n nándí sá quíde-n, ¿te yoo ducaⁿ ní taxi tnúhu ndee ìní-áⁿ xii-n-i? —cǎchí-güedé xǎhaⁿ-güedě xii-gá.

²⁹ Te Jèsús ní xǎhaⁿ-gǎ xii-güedé:

—Yúhú tnàhá-í cuení-í cácaⁿ tnúhu-í ìⁿ sá càcáⁿ tnúhu-í núú-ndó te núu na càchí tnúhu-ndo, te cachí tnúhu-í xii-ndo yò ní taxi tnúhu ndee ìní xii-í duha quide-í.

³⁰ Te chí càchí tnúhu xii-í yoo ní táúchíúⁿ ñí dácúándùte ndí Juàá ñáyiú, ¿Yá Ndiòxí àⁿ cuè téé ñuyíú-a ní táúchíúⁿ dùcaⁿ ní quide ndí? Te chí càchí tnúhu —càchí-gá xàhaⁿ-gă xii-güedé.

³¹ Te ní ngüita-güedé xítnàha-güedé:

—¿Nása cúñaha-o? Chi núu na cúñaha-o sã Yă Ndiòxí ní táúchíúⁿ dùcaⁿ ní quide ndí Juàá ñá, te quesaha-dě: “¿Ná cuèndá ñá túú ní sàndáá ìní-ndó tnúhu ní cáháⁿ ndí vèiⁿ?”, quesaha-dě.

³² Te ni vă cúú cúñaha-o sã cuè ñáyiú ñuyíú-a ní táúchíúⁿ dùcaⁿ ní quide ndí Juàá —càchí-güedé xítnàha-güedé.

Te ducaⁿ ñí xítnàha-güedé chi ñá túú ní cùtnuní ìní-güedé nása cúñaha-güedě xii-gá, chi xiyùhú-güedé cue ñáyiú chi nchaa ñáyiú-áⁿ ñí cutnùní ndáá ìní-yu sá Yă Ndiòxí ní táúchíúⁿ-gă ducaⁿ ñí quide ndí Juàá.

³³ Te ní xáhaⁿ-güedě xii Jèsús:

—Ñá túú xìní-ndí yoo ní táúchíúⁿ dùcaⁿ ní dácúándùte ndí Juàá ñáyiú —càchí-güedé xàhaⁿ-güedě xii-gá.

Te Jèsús ní xáhaⁿ-gă xii-güedé:

—Te núu ducaⁿ te ni yùhú vá càchí tnúhu-í xii-ndo yò ní taxi tnúhu ndee ìní duha quide-í —càchí-gá xàhaⁿ-gă xii-güedé.

12

*Cuèndá cue téé cuihna ìní-xi
(Mt. 21:33-46; Lc. 20:9-19)*

1 Te Jèsús ní ngüíta-gá cání-gă ïⁿ cuëndú núú ñăyiu nàcuáa tecú tnùní-yu tnúhu-gá, te xăhaⁿ-gă xii-yu:

—Ïⁿ téé ní nacúxi-dé mee-ni yòho yaha stilé núú ñúhú-dě, te ní chidoco-dě cuëndá sá vă cúú dàñú, te ní cadúha-dé núú quíhí-dě ndéhé yoho yàha stilé-áⁿ òré ná cùu, te ní cadúha-dé ïⁿ xító dùcúⁿ núú cáúndòdo cue téé coto yoho yàha stilé-áⁿ.

Te ní sáá ïⁿ nduu quèe-dé quíngaca cuu xica-dě vài nduu, te ní dándõo ndaha-dě sá ñ xitu-dé-áⁿ xii ïⁿ úú cue téé càháⁿ ndíhi-dé cuëndá cada chiuⁿ-güedé, te ní ndatnúhu-güedé sá òré ná cúú te cuu cuëndá dava-güedé te ducaⁿ te ní quee-dé cuáháⁿ-dé.

2 Te sáta ñ sáá nduu ñ cuu ndéhé yoho yàha stilé sá ñ xitu-dé-áⁿ, te ní xáhaⁿ-dě xii ïⁿ téé xínu cuechi núú-dě: “Cuáháⁿ cácaⁿ-n să cúú cuëndá-í núú cuè téé ní dándõo ndàha-í nchaa yoho yàha stilé sá ñ xitu-í-áⁿ”, càchí-dé xăhaⁿ-dě. Te téé xínu cuechi-áⁿ ñ xica-dé cuáháⁿ-dé.

3 Te cue téé-áⁿ ñ tñii-güedé téé xínu cuechi-áⁿ, te ní caniha-güedě xii-dé, te dătnùní ní nacuícúⁿ ñáhá-güedě, te ñá túú tnàhí ná ní săñaha-güedě.

4 Te téé cùu xítóhó yoho yàha stilé-áⁿ ñ tendaha tùcu-dé ingá téé xínu cuechi núú-dě cuáháⁿ-dé. Te òré ní quexìo téé xínu cuechi-áⁿ te cue téé-áⁿ ñ sáha ñaha-güedě yúu xii-dé, te ní táhú-güedě díquí-dě, te ní xícuèhé ñáhá-güedě xii-dé.

5 Te téé cùu xítóhó nchaa yoho yàha stilé-áⁿ ñ tendaha tùcu-dé ingá téé xínu cuechi núú-dě cuáháⁿ-dé núú cuè téé-áⁿ, dico téé-áⁿ òré ní quexìo-dé te ní sahní ñaha-güedě xii-dé. Te téé cùu xítóhó nchaa yoho yàha stilé-áⁿ ñ ten-

daha-dě vùi-gá cue téé xìnu cuechi núú-dě cuáháⁿ ngácáⁿ-güedé sá cúú cuendá-dé ní cùu dico diu-ni ducaⁿ nĩ quide ñaha tùcu cue téé ndèé nchaa yoho yàha stilé-áⁿ xii-güedé, chi dava-güedé ní caniha-güedě te dava-güedé ní sahani ñaha-güedě.

⁶ Te téé cùu xítohó nchaa yoho yàha stilé-áⁿ ndécú ñⁿdii-ná téé tendaha-dě quíhíⁿ núú cuè téé ní dándõo ndaha-dě sá nĩ xitu-dé-áⁿ, te téé tendaha-dě-áⁿ cúú-dě déhe ducuⁿ-dé, te ío cùu iní ñáhá-dě. Te ní sani iní-dé: “Váha-gá nõu tendaha-ĩ déhe-í-a núhú-dé, chi òré quini ñáhá-güedě xii-dé te cànehe-güedé sá yíñùhu núú-dě”, duha ní sani iní-dé. Te ducaⁿ te ní xáhaⁿ-dě xii déhe-dé-áⁿ sã núhú-dé, te téé-áⁿ cuãnuhú-dé cuáháⁿ ngácáⁿ-dé sá cúú cuendá tãtá-dě núú cuè téé-áⁿ.

⁷ Dico òré ní xiní cue téé quide chiuⁿ-áⁿ děhe téé cùu xítohó nchaa yoho yàha stilé-áⁿ, te ní xítñaha-güedé: “Téé-ãⁿ téé véxi nduu táhú ñuhu-a ndihí sá cáá nõú-xi, dico cahni-o-dě te mee-o nduu táhú-ó sã ndúú tãhú-dě”, duha ní xítñaha-güedé.

⁸ Te ní tñi-güedé téé-áⁿ, te ní sahani ñaha-güedě, te ní dáquéné-güedě yiqui cùñú-dé ñⁿ xio yuhu ñuhu núú cáá yòho yaha stilé-áⁿ –duha cuáháⁿ cuendú ní cani Jèsús núú-yu.

⁹ Te Jèsús ní xáhaⁿ tùcu-gá xií-yu:

–¿Te nchòhó sa cùtnuní iní-ndó nàcuáa cada xítohó ñuhu-áⁿ ãⁿ? Chi núhú-dé te cahni-dé cue téé-áⁿ te dándõo ndaha-dě ñuhu-dé xii cue téé cùtnuní iní-dé cada ndáá –càchí-gá xãhaⁿ-gã xií-yu.

¹⁰ Te xãhaⁿ tùcu-gá xií-yu:

–Te nchòhó, náa ñá túú dàcuaha-ndo núú tütú Yã Ndiõxí núú càchí-xi:

Yúú sã nĩ dáquée tihú cue téé dàcaa vehe,

ní cuu-xi yúú cúnùu vitna.

11 Chi mee Yă Ndiöxí ducaⁿ ñĩ cachí-gá cunduu, te cùu-xi ñⁿ sá ïo cùñúhu-o vitna. Duha cächí-xi núú tütú-gá —cächí Jèsús xăhaⁿ-gă xii-yu.

12 Te cue tée ní xíndedóho nàcuáa ndùu tnúhu ní cáháⁿ-gá ní cuíní-güedé tñi ñaha-güedě xii-gá ní cùu, chi ní cutnùní iní-güedé sá cuendá-güedé ní cáháⁿ-gá, dico ní yùhú-güedé tñi ñaha-güedě xii-gá cuendá sá ïo vâi ñáyiu, te ná íó ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

13 Te sátá ñĩ xica-güedé cuáháⁿ-güedé, te ní tenda-güedě ñⁿ úú cue tée cùu fariséú, ndihí ñⁿ úú cue tée cùndihí té Hèrodés cuáháⁿ-güedé núú ndécú Jèsús ndúcú-güedě nàcuáa cada-güedé datícánuu ñaha-güedě xii-gá núú tnúhu càháⁿ-gá.

14 Te cue tée-áⁿ ñĩ quexìo-güedé núú Jèsús, te xăhaⁿ-güedě xii-gá:

—Mèstrú, cùtnuní iní-ndí sá ïo ndáá càháⁿ-n, te ñá túú quide cuendá-n nàcuáa càháⁿ ñáyiu, te cuëi ndëdani càá-yu ñⁿ-ni càháⁿ-n ndihí-yu chi ñá túú quide cuendá-n cuëi ná ñáyiu cùú-yu, te càháⁿ ndáá-n nàcuáa càháⁿ Yă Ndiöxí cundecu-o ñùyíú-a. Te cachí tnúhu xii-ndí nũu váha-ni quide-ndí sá chăhu-ndí té Cèsár tée ío cùnuu cuendá impuèstú ãⁿ ñáhá —cächí-güedé xăhaⁿ-güedě xii-gá.

15 Dico Jèsús ní cutnùní iní-gá sá xító ndèé ñáhá-güedě xii-gá, núu ní xáhaⁿ-gă xii-güedé:

—¿Ná cuendá ducaⁿ xito ndeé ñáhá-ndó xii-í? Chí dánèhé ñáhá xii-í ìⁿ díhúⁿ sã chãhu-ndo cuendá impuèstú te núu nása cãa —cachí-gá xãhaⁿ-gã xii-güedé.

¹⁶ Te cue téé-áⁿ ñí dánèhé ñáhá-güedé xii-gá ìⁿ díhúⁿ sã chãhu-güedé cuendá impuèstú. Te Jèsús ní xáhaⁿ-gã xii-güedé:

—Chí cãchí tnúhu xii-í nõu yoo núú-xi ndèé ndìhi yoo dïu-xi ndeé —cãchí-gá xãhaⁿ-gã xii-güedé.

Te ní xáhaⁿ-güedé xii-gá:

—Núú tẽ Cèsár ndèé ndìhi dïu-dé —cãchí-güedé xãhaⁿ-güedé xii-gá.

¹⁷ Te Jèsús ní xáhaⁿ-gã xii-güedé:

—Te núu ducaⁿ te chí nácuãha té Cèsár sá cúú cuendá-dé, te sá cúú cuendá méé Yã Ndióxí te xíáⁿ nacuãha-ndo-gã —cãchí-gá xãhaⁿ-gã xii-güedé.

Te cue téé-áⁿ ïo ní cuñúhu-güedé sá dúcáⁿ ñí cáháⁿ-gá.

Cuendá cue ñáyiú ndoto

(Mt. 22:23-33; Lc. 20:27-40)

¹⁸ Te sátá dúcáⁿ te ní quexìo ìⁿ úú cue téé cùu saducéú núú ndécú Jèsús, te cue téé-áⁿ ñã túú sàndáá iní-güedé sá ndótó cuè ñáyiú ní xíhí, te ní xáhaⁿ-güedé xii-gá:

¹⁹ —Mèstrú, ndíi Moisés cãchí ndíi núú tütú ndíi ndècu vitna sá nõu ìⁿ téé na cùú-dé te quendóo ñadìhí-dé, te núu ñã túú ní xõo déhe-dé ndìhi ñadìhí-dé-áⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndìhi-aⁿ cuendá téé ní xíhí-áⁿ.

²⁰ Te ní xíndecu úsá tnàhá cue téé mee-ni ndí ñaní-güedé. Te téé díhna ní níhí ñadìhí-dé, te ñã

túú ní cùdí-dé cundecu-dé chi ní xíhí-dé, te ni ìⁿ déhe-dé ñá túú ní xõ ndihí ñadìhí-dé.

²¹ Te téé cùu uú ní naqueheⁿ-dé ñaha ní quendóo quèé-áⁿ, dico ní xíhí tucu-dé, te ni ìⁿ tucu déhe-dé ñá túú ní xõ ndihí ñaha-áⁿ. Te diu-ni ducaⁿ ñí xíhí téé cùu uní.

²² Te ní xínu ndi ùsá-güedé ní cándeca ñaha-güedě xii ñaha-áⁿ, dico ni ìⁿ-güedé ñá túú ní xõ déhe-güedé ndihí-aⁿ, te ní ndihí-güedé ní xíhí te ndéé núú ñí ndihí-ná ní xíhí tnàhá ñadìhí-áⁿ.

²³ Te na sàá nduu ndòto-güedé ndihí ñaha-áⁿ, ¿te ndědacàa-güedé ñadìhí-güedé cuu-aⁿ-i? Chi ndi ùsá-güedé ní cándeca ñaha-güedě xii-aⁿ — càchí-güedé xãhaⁿ-güedě xii-gá.

²⁴ Te Jèsús ní xáhaⁿ-gã xii-güedé:

—Ní xíta nchòhó tnúhu càháⁿ-ndó, chi ñá túú xíní-ndó nàcuáa càháⁿ Yã Ndiõxí núú tütú-gá, te ni ñà túú xíní-ndó sã díú-gã ndácú-gã quidé-gã nchaandi túhú sá vãha.

²⁵ Te na càchí tnúhu-í xii-ndo sã òré ná sàá nduu ndòto nchaa ñáyíu ní xíhí, te dàvá-áⁿ vã yõ-gá dasaⁿ dēhe yoco-xi chi vá yõ-gá candeca tnàha, chi na ndótó-yu te cuu-ná-yu dàtná cue espíritú xínú cuèchi núú Yã Ndiõxí.

²⁶ Te núu nchòhó cuíní-ndó cãháⁿ-ndó cuendá nchaa ñáyíu ndoto, te díhna-gá dacuàha-ndo nacuáa ní chídó tnùní ndíi Moisés núú tütú ndíi ni cùu. Chi diu núú tütú ndíi càháⁿ-xi nàcuáa ní xáhaⁿ Yã Ndiõxí xii ndíi cútnàhá ní cãháⁿ ndihí ñaha-gã ìⁿ xichi núú ñíhnú tnùtaú nchicúⁿ ñuhú. Te duha ní xáhaⁿ-gã xii ndíi: “Yúhú cùu-í Ndiõxí tẽ Àbrahám, ndihí té Isàác, ndihí té Jàcób”, duha ní xáhaⁿ Yã Ndiõxí xii ndíi càchí-xi núú tütú ndíi.

27 Te Yá Ndiöxí ñá túú cùu-gá Ndiöxí cue ñáyiú ní xíhí, chi cùu-gá Ndiöxí cue ñáyiú xĩndecu vívú, núu xíáⁿ nchòhó ío xĩta-ndo tnũhu càháⁿ-ndó. Te sá dúcáⁿ ñí càháⁿ-gá cuèndá cue téé-áⁿ, te xíáⁿ cútnùní sá cuèi ní xíhí-güedé sá cúú-xí tnàha ñáyiú-güedé, dico ndècu vívú-güedé sá cúú-xí-gã — càhí-gá xãhaⁿ-gã xii-güedé.

Tnúhu sá ïo-gá cúnùu
(Mt. 22:34-40)

28 Te tnàhá ìⁿ téé dàcuaha ñaha xii ñáyiú nchaa tnúhu ní chídó tnùní ndíi Moisés ndèdóho-dé nchaa tnúhu càháⁿ Jèsús ndihí cue téé cùu sàducéú-áⁿ, te ndèdóho-dé sá sũúní vãha ñihí-gá tnúhu nãdanchocáva-gá. Te ní sãndehe yatni-dé núú-gã, te xãhaⁿ-dè xii-gá:

—Cachí tnúhu xii-í ndèdacàa tnúhu sá ñí càháⁿ Yã Ndiöxí ío-gá cúnùu cuu díhna —càhí-dé xãhaⁿ-dè xii-gá.

29 Te Jèsús ní xáhaⁿ-gã xii-dé:

—Duha càháⁿ tnúhu sá ïo-gá cúnùu: “Nchòhó ñáyiú isràél ío vãha chí cùndèdóho tnúhu-a. Ìⁿdíi díi-ni Yá Ndiöxí ndécú, te ñiu-ni-gá cúú-gã Ndiöxí-ó.

30 Te cuu iní-ndó Dütú Ndiöxí Yaá cúú Ndiöxí-ndó ñí yuhu ñí iní-ndó, te caní iní-ndó càda-ndo datná cuení mée-gã, te mee-ni tnũhu vãha caní iní-ndó cuèndá cuu vii cuu vãha-ndo núú-gã, te coo iní-ndó càda-ndo nacúaa cuu vãha iní-gã”, duha càháⁿ tnúhu sá ïo-gá cúnùu.

31 Te duha càháⁿ tucu ìngá tnúhu cùu uú sá ïo cùnùu: “Cuu iní-ndó tnàha ñáyiú-ndo datná cúú iní-ndó mèe-ndo”, duha càháⁿ tnúhu cùu uú-áⁿ. Te

úú duha-ni tnúhu-a cùu-xi tnúhu sá ïo-gá cúnùu — cachí-gá xǎhaⁿ-gǎ xii-dé.

³² Te téé dàcuaha ñaha xii ñáyiú nchaa tnúhu ní chídó tnùní ndíi Moisés ní xáhaⁿ-dě xii-gá:

—Mèstrú, váha-ni càháⁿ-n chi ndáá sá ìⁿdii-ni Yá Ndiöxí ndécú, te ñá túú-gǎ ndèé ndécú ìngá ndiöxí.

³³ Te dàtná ní cachí-n sǎ ñi yuhu ñi iní-ó cùu iní-ó Yá Ndiöxí, te cani iní-ó càda-o nacúáa cuu vii cuu váha iní-gá te ío vii ío váha cuu iní-ó dàtná cuení méé-gǎ, te coo iní-ó càda-o nacúáa cuu váha iní-gá, te cuu iní-ó cuè tnaha ñáyiú-o dàtná cúú iní-ó mèe-o. Te nchaa xǎⁿ ío-gá xíní ñùhu-xi cada-o dacúúxí sǎ cuǎñaha-o quítì cahni-güedé te cáyú-di nduu táhú ñáhá Yá Ndiöxí, ndíi dàcúúxí nchàa dava-gá sá sǎñaha-o ndùu táhú-gǎ —càchí-dé xǎhaⁿ-dě xii-gá.

³⁴ Te sá dúcáⁿ ïo váha ndùu tnúhu ní cáháⁿ téé-áⁿ, núu ní xáhaⁿ Jèsús xii-dé:

—Luha-ná cúmǎní xii-ñ te ndíhu ndaha ñàha Yá Ndiöxí —càchí-gá xǎhaⁿ-gǎ xii-dé.

Te sá dúcáⁿ ñi xáhaⁿ-gǎ xii téé-áⁿ, núu vá yõo ìⁿ-gá ní cùyìi nágá tnúhu nducu tnùhu-yu núú-gǎ.

Yoo cùu Xítóhó Jesucrìstú
(Mt. 22:41-46; Lc. 20:41-44)

³⁵ Te Jèsús yíhí-gǎ xití veñúhu càhnu sá ïo cùnùu danehé-gá ñáyiú, te xǎhaⁿ-gǎ xií-yu:

—Cue téé dàcuaha ñaha xii ñáyiú nchaa tnúhu ní chídó tnùní ndíi Moisés càchí-güedé sá Crìstú Yaá tendaha Yá Ndiöxí quixi ñuyíú-a cùu-gá déhe ndíi Dàvíí, te ndíi-áⁿ ñi cunaha vìhi ní xíhí ndíi. ¿Te ná cuèndá ducaⁿ càháⁿ-güedé?

36 Te mee ndii Dàvií-áⁿ nĩ dácáhú ìní ñáhá Espíritú Yá Ndiöxí xii ndii nàcuáa cáháⁿ ndii, te duha ní cachí ndii:

Dútú Ndiöxí ní xáhaⁿ-gã xii Yaá cúú Xĩtohó-í:

“Ngóo xio cùha-í,

te yúhú cada-í te nchaa sá cúú ùhú ìní ñáhá xii-n
canehe-xi sá yíñùhu núú-n.”

Duha ní xáhaⁿ Dútú Ndiöxí xii Yaá cúú Xĩtohó-í.

Duha ní cachí ndii.

37 ¿Te nása cùu Cristú déhe ndii Dàvií, te mee ndii ní cachí ndii sá cúú-gã Xĩtohó ndii? —càchí Jèsús xáhaⁿ-gã xií-yu.

Te ío cuéhé ñáyiú ní xíndedóho nchaa tnúhu ní cáháⁿ-gá, te ío ní cudíí ìní-yu ní xíndedóho ñáhá-yu xii-gá.

Jèsús càháⁿ-gá cuendá cue tée dàcuaha ñaha xii ñáyiú nchaa tnúhu ní chídó tnùní ndii Moisés

(Mt. 23:1-36; Lc. 11:37-54; 20:45-47)

38 Te òré dánèhé ñáhá Jèsús xii cue ñáyiú, te xáhaⁿ-gã xií-yu:

—Cada cuendá-ndó vã cádá-ndó dàtná quidé cuè tée dàcuaha ñaha xii ñáyiú nchaa tnúhu ní chídó tnùní ndii Moisés, chi cue tée-áⁿ tnàhá ìní-güedé cuihnu-güedé dóó nání sã sácuĩhnu cue tée cùnuu-gá te cuíní-güedé sá méé-ní ndihi tnúhu yíñùhu cáháⁿ ndihi ñaha ñáyiú xii-güedé nchaa núú xicá cùu-güedé.

39 Te nàcáxi-güedé xilé sácõo nchihi cue tée cùnuu-gá xití veñúhu sácõo nchihi-güedé. Te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ìⁿ vico, chi mee-ni núú sácõo cue tée cùnuu cuíní-güedé coo-güedé.

⁴⁰ Te quèndeé-güedé vehe nchaa ñáyi quèé, te ío naha càháⁿ ndìhi-güedé Yă Ndiöxí dândahú-güedé méé-güedé sá ío quède ndáá-güedé cuèndá sá cuìní-güedé càháⁿ váha ñáyi cuèndá-güedé. Te sá dúcáⁿ quède-güedé te ío-gá ndoho-güedé núú ùhú núú ndàhú dácúxí dáva-gá ñáyi —càchí-gá xăhaⁿ-gă xií-yu.

Díhúⁿ nduu táhú Yă Ndiöxí ní dáquëe ìⁿ ñaha ndàhú ñaha quèé
(Lc. 21:1-4)

⁴¹ Te núcóo Jèsús xití veñúhu yatni núú ndécú àlcançiá te ndèhe-gá xídáquëe ñáyi díhúⁿ xití alcançiá-áⁿ, te tnàhá cue ñáyi cuica xídáquëe-yu vài díhúⁿ.

⁴² Te ní quexìo ìⁿ ñaha ndahú ñaha quèé, te ndèhe-gá ní dáquëe-aⁿ úú tnàhá díhúⁿ còbrí xití alcançiá, te díhúⁿ-ăⁿ ío sacú yáhu-xi.

⁴³ Te Jèsús ní cana-gá cue téé xìca cuu ndìhi-gá, te ní xáhaⁿ-gă xii-güedé:

—Na càchí tnúhu ndáá-í xii-ndo să ñàha ndahú ñaha quèé-a ío-gá nándìhi díhúⁿ nì dáquëe-aⁿ xití alcançiá dácúxí díhúⁿ nì dáquëe dáva-gá-yu.

⁴⁴ Chi nchaa ñáyi-áⁿ nì dáquëe-yu mee-nă díhúⁿ să nì quendóo-ná, dico ñaha quèé-a cuèi ndàhú-aⁿ dico ní dáquëe-aⁿ nihí díhúⁿ să cuááⁿ să cáxí-áⁿ ní cùu —cachí-gá xăhaⁿ-gă xii-güedé.

13

Jèsús càchí-gá sá ngóyó veñúhu
(Mt. 24:1-2; Lc. 21:5-6)

¹ Te òré ní ndee Jèsús xití veñúhu càhnu sá ío cùnuu, te ìⁿ téé xìca cuu ndìhi-gá ní xáhaⁿ-dë xii-gá:

—jMèstrú, cundehe nă ío vii ní sáá veñúhu-aⁿ ndihi nchaa vehe nèhe tnaha ndihi-xi, te ío vii ndăa nchaa yúú yíhí! —càchí-dé xăhaⁿ-dĕ xii-gá.

² Te Jèsús ní xáhaⁿ-gă xii-dé:

—Nchaa năcuáa càa nchaa vehe sá cúñúhu-n-a vîtna sáá nduu te vă cúndúu-gá-xi dâtná cáá-xí vîtna, chi ni ñⁿ-gá yúú vă kódó nchìhi tnaha-xi, chi ndihi ngoyo —càchí-gá xăhaⁿ-gă xii-dé.

*Năcuáa cada-xi nduu ta cùyatni naa ñuyúú
(Mt. 24:3-28; Lc. 21:7-24; 17:22-24)*

³ Te Jèsús ní xica-gá ndihi cue tée xica cuu ndihi-gá cuáháⁿ ndihi ñaha-gă xii-güedé yucu nàni Olívú, te yucu Òlívú-áⁿ tŭu ndáá núú cáá veñúhu càhnu sá ío cùnuu. Te Jèsús ní quexìo-gá ndihi-güedé yucu Òlívú-áⁿ, te xíaⁿ ñí ngóo-gá te núú núcõo-gá-áⁿ ñí sáháⁿ té Pèlú ndihi té Jàcobó ndihi té Juáá ndihi té Ndrìxí, te dayuhu ñí xáhaⁿ-güedĕ xii-gá:

⁴ —Cuìní-ndí cachí tnúhu-n nă nduu dùcaⁿ cada-xi ngoyo veñúhu càhnu sá ío cùnuu, àdi nándi cùu sá cádá-xí cuendá cutnùnì iní-ndí sá sà ta cuyatni nduu ducaⁿ cada-xi —cachí-güedé xăhaⁿ-güedĕ xii-gá.

⁵ Te Jèsús ní xáhaⁿ-gă xii-güedé:

—Ío quihì iní-ndó cùndecu-ndo cuendá sá vă yõo dandàhú ñáhá xii-ndo.

⁶ Chi ío cuéhé cue tée coo ñuyúú te danàni-güedé méé-güedĕ dâtná nánì-í, te cachí-güedé: “Yúhú cúu-í Crìstú Yaá ní tendaha Yă Ndiõxí véxi ñuyúú-a”, duha cachí-güedé. Te sá dúcáⁿ cáháⁿ-güedé te ío vâi ñáyiu dandàhú-güedé.

7 Te òré ná nìhí-ndó tnùhu sá nàá-güedé nděni ní cuu, te vá yùhú-ndó chi dacuítí sǎ dúcáⁿ càda-xi, dico vátá sàá-gá nduu nàa ñuyíú òré ducaⁿ càda-xi.

8 Chi cue téé ìⁿ nàcióⁿ nàá-güedé ndihì cue téé ingá nàcióⁿ, te titní ñuú ngüíta-güedé nàá-güedé, te titní xichi ñuyíú ñihì vìhi tnáa, te titní tucu xichi ñuyíú coo tnamá, te ío-gá cuéhé sǎ yǎha ñáyiu. Te nchaa sá dúcáⁿ càda-xi-áⁿ cúú-xí tnùndòho sá vítná vǎha vǎha quèsaha-xí sácúú-xí cué ñáyiu ndècu ñuyíú-a.

9 'Dico nchòhó ío quihì iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuèndá ñáhǎ-yu xii dava-ndo nùú cuè téé cùchiuⁿ, te candeca ñaha-güedě xii-ndo quǐhíⁿ xití veñúhu-güedé, te yàcáⁿ caniha-güedě xii-ndo. Te quǐhíⁿ-ndó nùú cuè téé yìndaha nacióⁿ àdi núú dàva-gá cue téé cùnuu sá cuèndá-í, te nchòhó nìhí-ndó nàcuáa cada-ndo cǎháⁿ váha-ndo cuèndá-í núú-güedě.

10 Te cùmání-gǎ sáá nduu nàa ñuyíú-a te sa cuténuu tnúhu-í ñi càa xico ñuyíú-a, te tnúhu-áⁿ cǎháⁿ-xi nàcuáa naníhí tǎhú ñáyiu.

11 Te òré ná càndeca ñaha ñáyiu xii-ndo quǐhíⁿ núú cuè téé cùchiuⁿ cuáha cuèndá ñáhǎ-yu, te òré vátá sàá-gá-ndó nùú-güedě te vá cání iní-ndó nùu nása cunduu tnúhu cúñaha-ndo xii-güedé. Chi òré-nǎ te Yá Ndiòxí dacàhu iní ñáhá-gǎ xii-ndo nǎsa cunduu tnúhu cúñaha-ndo xii-güedé, te ñu-ni tnúhu sá dácàhu iní ñáhá-gǎ-áⁿ cǔñaha-ndo xii-güedé. Te ñǎ díú mèe-ndo cǎháⁿ-ndó chi Espiritú Yǎ Ndiòxí cǎháⁿ-xi yuhu-ndo.

12 Te dava cue téé cuáha cuèndá-güedé

ñaní-güedé núú cuè téè cùchiuⁿ cuendá cahni ñaha-güedě. Te dava cue téè cùu tátá ðiu-ni ducaⁿ càda-güedé cuáha cuendá-güedé déhe-güedé núú cuè téè cùchiuⁿ. Te dava cue téè cùu déhe cuu úhú iní-güedé tátá-güedé ndihí ñaná-güedé, te cuáha cuendá ñáhá-güedě xií-yu núú cuè téè cùchiuⁿ cuendá cahni ñaha-güedě xií-yu.

13 Te ío cuéhé ñáiyu cuu úhú iní ñáhă-yu xii-ndo sã cuendá-í, dico nchaa nchòhó ñáiyu na càda ndee-ni iní canchicúⁿ nihnu ñaha-ni xií-í te naníhí tãhú-ndó.

14 "Te ndíi Dániél téè ní xóo cáháⁿ tnúhu Yá Ndiõxí ndéé sanaha ñí chídó tnùní ndíi núú tütú ndíi cuendá ìⁿ sá dáquèè tihú Yă Ndiõxí cundecu ìⁿ xichi núú ñà túú tàú-xi cundecu-xi, te xiăⁿ cada-xi sá vă cündècu-gá ni ìⁿ ñáiyu xiáⁿ. Te cada cuendá váha-ndo nàcuáa ní cáháⁿ ndíi, chi nduu na quíní-ndó xiăⁿ cundecu-xi ìⁿ xichi núú ñà túú tàú-xi cundecu-xi, te dàvá-áⁿ nchaa ñáiyu xĩndecu ðistrítú Jùdeá xíní ñùhu-xi cunú-yu quíhíⁿ-yu xití yucu.

15 Te nchaa ñáiyu ndáa ndódó ðiquí véhé-xí vă ndĩhu-gá-yu vehé-yu quehéⁿ-yu ìⁿ ndachíuⁿ-yu canehé-yu quíhíⁿ.

16 Te nchaa ñáiyu cuáháⁿ yucu ni vă nùhú-gá-yu vehé-yu cúnúquehéⁿ-yu dóõ-yu.

17 ¡Te ndàhú ní cuu nchaa ñáiyu ðihí ñùhú ðéhe-xi, ndihí cue ñáiyu ðihí xĩndeca déhe vitna sàdi na saá nduu ðucaⁿ cada-xi!

18 Te nchòhó ío chí càcáⁿ táhú nùú Yă Ndiõxí cuendá sá vă dúcáⁿ ndòho-ndo yóó quidé víxiⁿ-xi.

19 Chi dàvá-áⁿ coo tnúndòho cahnu vihi ñuyíú, te vátá ìⁿ ndùu-gá coo tnúndòho cahnu vihi-áⁿ

nděe cútnàhá ní cadúha Yá Ndiǒxí ñuyíú, chi diu-ni dàvá-áⁿ coo tnúndòho cahnu vihi-áⁿ, te ni núú cuàháⁿ núú vëxi vá cóó-gǎ tnúndòho-áⁿ.

²⁰ Te Yá Ndiǒxí cǎchí-gǎ sá vǎ ïo vǎi nduu coo tnúndòho cahnu vihi-áⁿ ñuyíú sǎ cuendá nchaa ñáyiu ní cǎháⁿ-gǎ cundecu ndihí-gǎ. Te núú vǎi nduu na coo tnúndòho-áⁿ, te vá yǒo cǎcu nihnu.

²¹ Te dàvá-áⁿ cǔñaha ñáyiu xii-ndo: “Chí cúndèhe iha, chi iha ní quexìo Cristú Yaá ní tendaha Yǎ Ndiǒxí véxi ñuyíú-a”, duha cúñàhá-yu xii-ndo. Àdi quesahá-yu: “Chí cúndèhe yacáⁿ chi yàcáⁿ ndécú-gǎ”, quesàhá-yu. Te vá quìndáá iní-ndó tnǔhu cǎháⁿ-yu.

²² Te coo cue tée danàni-güedé mée-güedé dàtná nánì-í te cachí-güedé sá cúú-güedé Yaá ní tendaha Yǎ Ndiǒxí véxi ñuyíú-a. Te dava-güedé cachí-güedé sá cúú-güedé cue tée cǎháⁿ tnúhu Yá Ndiǒxí dico ñǎ ndáá sá cúú-güedé cue tée cǎháⁿ tnúhu-gǎ, te cada-güedé titní núú sǎ vǎ yǒo tnàhí ndàcu cada cuendá dandàhú-güedé ñáyiu, te cani iní-güedé dandàhú-güedé ndée cue ñáyiu ní cǎháⁿ Yǎ Ndiǒxí cundecu ndihí-gǎ.

²³ Te vitna ío váha cuáha-ndo cuendá, te quihí iní-ndó cùndecu-ndo, chi nchaa sa ní dátùha ñaha-í xii-ndo.

Nàcuáa cada-xi òré quixi tucu Tée cùu ñaní tnáhá nchàa ñáyiu

(Mt. 24:29-35,42-44; Lc. 21:25-36)

²⁴ Te nà yáha-ni coo tnúndòho cahnu vihi-áⁿ, te vá dáyèhé-gǎ nchíanchii te ni vǎ dáyèhé-gǎ yóó.

²⁵ Te ngoyo nchaa chódíní ndée andiù, te quidi-xi andiù.

26 Te dàvã-áⁿ quini ñáhá nchàa ñáyiú xii yúhú Tée cùu ñaní tnáhã-yu ncháá-yu quee-í andiu quìxi-í ichi xití vícò, te quini-yu sá ïo càhnu cuu-í, te quide-í nchaa sá vãha.

27 Te tendaha-ï cue espíritú xínú cuèchi núu-í quíhíⁿ-xi nadatàcá-xi nchaa ñáyiú ní cáháⁿ-í chitnahá ñáhá xii-í xĩndecu ñi càa xico ñuyúú.

28 Te cundehe-ndo nàcuáa quide yutnu ngúxí, chi yutnu-áⁿ ndúú yùte núú dìté-xi te nàtahú ndaha-xi, te òré ducaⁿ quide-xi te càchí-ndó sã sã ní cuyatni nuu cahni.

29 Te ducaⁿ sãtnahá-xi cada-xi òré ná quini-ndó càda-xi nchaa nacuáa ní cáháⁿ-í, te cutnùní iní-ndó sã sã ní cuyatni vií-nã nduu nàa ñuyúú.

30 Te na càchí tnúhu ndáá-í xii-ndo sã òré vátá cùú-gã cue ñáyiú xĩndecu ñuyúú-a vitna, te cada-xi nchaa nàcuáa ní cáháⁿ-í.

31 Te andiu ndíhi ñuyúú-a chi ndíhi nihnu-xi, dico tnúhu-í chi vá ndíhí nihnu-xi chi cùu-xi tnúhu ndáá.

32 Dico ñá túú cùtnuní ná nduu quìxi tucu-í, te ni ñà túú cùtnuní ná òré chi vá yõ xìní, te ni cuè espíritú xínú cuèchi núú Yã Ndiõxí ñá túú xìní-xi ná nduu quìxi-í, te ni mée yúhú tée cùu Déhe Dútú Ndiõxí ñá túú xìní-í ná nduu quìxi tucu-í, chi ñndì díí-ni mee Tãtà-í Dútú Ndiõxí xìní-gã ñuu ná nduu quìxi-í.

33 Te nchòhó xíní ñùhu-xi sá ïo quíhi iní-ndó cùndecu-ndo, te cáháⁿ ndíhi-ndo Yã Ndiõxí, chi ñá túú xìní-ndó ñã nduu quìxi tucu-í.

34 Te na càchí tnúhu-í xii-ndo cuèndá ñⁿ tée cuèní quíngaca cuu xica. Te tée-áⁿ cùmání-gã quee-dé vehe-dé te ní xáhaⁿ-dẽ xii cue tée xinu cuechi núú-dẽ sá ná cádá cuèndá-güedé vehe-dé. Te

ní sãhaha-dě xii-güedé ndí dǐíⁿ nǔú-güedě chiúⁿ cada-güedé. Te ní xáhaⁿ-dě xii téé ndéé yuyèhe sá ná cùndecu túha-ni-dé yuyèhe ndéé nàsáá-dé.

³⁵ Te duha ndùu tnúhu càháⁿ-í cuendá nchòhó cundecu túha-ndo, chi ñá túú xini-ndó nã nduu te ni ñà túú xini-ndó nã òré quixi tucu yúhú Yaá cúú Xítohó-ndó, núu òré sa ní cundiquíⁿ, àdi dava niú, àdi oré sa ní cana uuⁿ líhi, àdi oré sa ta cùditó cuáháⁿ, núu xiǎⁿ ío chí cùndècu túha.

³⁶ Te duha càháⁿ-í chi na cuáháⁿ òré ñá túú nã yíhí iní-ndó quèxio-í, te ñá túú ndècu túha-ndo.

³⁷ Te dàtná-ni xãhaⁿ-í xii nchòhó sá cùndècu túha-ndo, te ñiu-ni ducaⁿ xãhaⁿ-í xii nchaa dava-gá ñáyiú sá cùndècu túha-yu —càchí-gá xãhaⁿ-gã xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání ũú-gá nduu te quesaha vico pascuá, vico xèxi ñáyiú pàá sá ñà túú yíhi levadurá. Te cue dútú cùnùu, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedě nàcuáa cada-güedé dandàhú-güedé Jèsús cuendá tñi ñaha-güedě xii-gá te cahni ñaha-güedě.

² Te ní xítñaha-güedé:

—Váha-gá sá vã tñí-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —càchí-güedé xítñaha-güedé.

*Ëⁿ ñadìhí chíhí-áⁿ àcití díquí Jèsús
(Mt. 26:6-13; Jn. 12:1-8)*

³ Te Jèsús ndécú-gã ñuú Bètaniá vehe ìⁿ téé nàni Xímú, téé ní tnahá cuéhé sã dátèhyú nihnu-xi yiqui cùñú-ó. Te yìhì Jèsús mèsá xéxí-gã ní quexìo ìⁿ ñadìhí néhé-áⁿ ìⁿ sá ñí cuáha yúú vãha yúú nání àlabastrú, te xití xíãⁿ ñúhú àcití sàháⁿ tnámí sã nání nãrdú sá ïo ndèyáhu, te ní táhú-áⁿ xíãⁿ te acití ñúhú xití-xi-áⁿ ñí sódó-aⁿ díquí Jèsús.

⁴ Te ìⁿ úú cue téé xíndecu-áⁿ ñí cudééⁿ-güedé sá dúcáⁿ ñí quide-aⁿ, te ní xítnàha-güedé:

—Ñá túú quide váha ñaha-ãⁿ dàcáⁿ quidé-áⁿ, chí íí ñí dácuíta-aⁿ acití váha-ãⁿ.

⁵ Chí váha-gá ñúu cuyáhu acití-ãⁿ sá ùní ciëndú díhúⁿ denàriú, te díhúⁿ sã cuyáhu acití-ãⁿ cuu cuendá ñáyíu ndàhú ní cùu —cachí-güedé xítnàha-güedé.

Te ní tenáá-güedé ñaha-áⁿ sã dúcáⁿ ñí quide-aⁿ.

⁶ Te Jèsús ní xáhaⁿ-gã xii-güedé:

—Chí dáñá, vá dásatú-ndó ìní ñadìhí-a, chí sá ñí quide ñaha-aⁿ xì-í cúú-xí ìⁿ sá vãha.

⁷ Chí cue ñáyíu ndàhú ducaⁿ-ni cùtnahá ñáyíu-áⁿ tnuú-ndó, te nání òré càchí iní-ndó te chindee-ndó-yu. Dico yúhú chí vá ncháá ndùu cundecu ndìhì ñaha-í xii-ndo ñùyíú-a.

⁸ Te ñadìhí-a ní quide-aⁿ ìⁿ sá vãha ndèé není ní ndacu-aⁿ, chí sá dúhá ñí quide ñaha-aⁿ xì-í ní chíhì ñaha-aⁿ àcití, te xíãⁿ cada iní-ndó sã sà quide túha-aⁿ yiqui cùñú-í cuendá quíndúxi-xi.

⁹ Te na càchí tnúhu ndáá-í xii-ndo sã ndèni ní cuu ñìhì ñuyíú ná càháⁿ ñáyíu tnúhu-í, te cáháⁿ-yu

tnàhá cuèndá ñadìhí-a cuèndá quíní nchaa ñáyiú nàcuáa ní quide-aⁿ, te ducaⁿ vǎ nácuànaá-yu — càchí-gá xǎhaⁿ-gǎ xii-güedé.

Té Jùdás ndúcú-dě nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá (Mt. 26:14-16; Lc. 22:3-6)

¹⁰ Te té Jùdás Iscàrioté ní sáháⁿ-dé ní ndatnúhu-dé ndìhì cue téé cùu dútú cúnùu sá cuáha cuèndá-dé Jèsús núú-güedé, te núú tnàhá té Jùdás-áⁿ cúú ùxúú tnàhá cue téé xìca cuu ndìhì-gá ní cùu.

¹¹ Te òré ducaⁿ nǐ ndatnúhu-dé ndìhì-güedé, te ío ní cudíí iní-güedé, te ní xáhaⁿ-güedé xii-dé sá cuáñaha-güedé díhúⁿ xii-dé. Te té Jùdás-áⁿ nǐ ngúíta-dé ndúcú-dě nàcuáa cada-dé cuáha cuèndá-dé Jèsús núú-güedé.

Cùdini Jesús ndìhì cue téé xìca cuu ndìhì-gá (Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáá nduu nǐ quesaha vico pascuá, vico ñá túú xèxi ñáyiú pàá sá ñà túú yìhì levadurá, te ḍi-u-ni nduu-ǎⁿ sáhní-güedé ìⁿ mbéé líhli xèxí-yu nduu vico pascuá-áⁿ. Te cue téé xìca cuu ndìhì Jesús ní xícaⁿ tnúhú-güedé núú-gǎ, te xǎhaⁿ-güedé xii-gá:

—Mèstrú, véxi-ndí xícaⁿ tnúhú-ndí núú-n nǔu ndèé cáá vèhe cuíní-n càda túha-ndí sá cùdini-o sacuaa nduu vico pascuá —càchí-güedé xǎhaⁿ-güedé xii-gá.

¹³ Te Jèsús ní xáhaⁿ-gǎ xii úú-ni tnàhá cue téé xìca cuu ndìhì-gá:

—Chí cuàháⁿ xití ñuú-ǎⁿ, te yàcáⁿ naníhí-ndó ìⁿ té tènehe yóó ndute, te té-áⁿ cándëndaha-ndo-dě quíhíⁿ.

14 Te núu ndëdacàa vehe na ndíhu-dé te xíáⁿ quíhu-ndo. Te cúñaha-ndo xì xítóhó vehe-áⁿ: “Yaá cúú Mèstrú càchí-gá sá nǔu ndëdacàa xichi xití vehe-n cuáñaha nùu-n xii-gá cudìni-gá ndihì cue téé xìca cuu ndihì-gá sacuaa nduu páscaá”, duha cúñaha-ndo.

15 Te dǎtnùní danèhé ñáhá-dě xii-ndo ìⁿ quartú cáhnú càa núú nǐnu, chí vehe yòdo tnaha cuu-xì, te sa ní quide túha-dé nchaa sá nándihì, te nchòhó dícó-nǎ comidá cada túha-ndo cùdini-o —cachí-gá xǎhaⁿ-gǎ xii-güedé.

16 Te cue té-áⁿ nǐ xica-güedé cuáháⁿ-güedé xití ñuú-áⁿ, te nchaa-ni nàcuáa ní xáhaⁿ Jèsús ní cuu. Te ní quide túha-güedé sá cùdini-güedé ndihì-gá sacuaa nduu vico páscaá-áⁿ.

17 Te sátá nǐ cundiⁿquì te ní quexìo Jèsús ndihì ndi ùxúú cue téé xìca cuu ndihì-gá.

18 Te cuánguìhu-gá mèsá ndihì-güedé cuendá cudìni ndihì ñaha-gá xii-güedé, te òré yíhí-gǎ mèsá ndihì-güedé, te xǎhaⁿ-gǎ xii-güedé:

—Na càchí tnúhu ndáá-í xii-ndo sǎ ìⁿ nchohó cue téé xèxi ndihì ñaha xii-í cuáha cuendá ñáhá-ndó nǔú cuè téé cùu úhú iní ñáhá xii-í —càchí-gá xǎhaⁿ-gǎ xii-güedé.

19 Te sá dúcáⁿ nǐ xáhaⁿ-gǎ xii-güedé, te nchaa-güedé ní ngüíta-güedé cùndiyí-güedé. Te da ìⁿ da ìⁿ-güedé ní ngüíta-güedé xìcáⁿ tnúhú-güedé núú-gǎ, te xǎhaⁿ-güedé xii-gá:

—¿Ñá díú yǎhú ducaⁿ sàni iní-n càda-í-u? —
càchí-güedé xǎhaⁿ-güedě xii-gá.

²⁰ Te Jèsús ní xáhaⁿ-gǎ xii-güedé:

—Diu-ni ìⁿ nchòhó cue téé úxúú xíca cùu ndiⁿi-í,
téé na dàquëndaha còhó òré daquëndaha-ì, téé-áⁿ
cuǎha cuëndá ñáhá-dě xii-í núú cuè téé cùu úhú iní
ñáhá.

²¹ Te yúhú Téé cùu ñaní tnáhá-ndó nchàa-ndo
ñuhu ichi-í cuáháⁿ-í ndoho-í nàcuáa càháⁿ-xi núú
tùtú Yǎ Ndiǒxí. Dico ndàhú ní cuu téé ducaⁿ na
cuǎha cuëndá ñáhá xii-í núú cuè téé cùu úhú iní
ñáhá, chí váha-gá sá vǎ cǎcú téé-áⁿ cundecu-dé ní
cùu, te ñá díú sǎ ñí cacu-dé te ducaⁿ càda-dé —
càchí-gá xǎhaⁿ-gǎ xii-güedé.

²² Te nini cùdini cue téé xíca cuu ndiⁿi Jesús
ní queheⁿ-gá pàá, te ní ndacáⁿ táhú-gǎ núú Yǎ
Ndiǒxí, te dàtnùní ní táhú cuèchi-gá, te ní ngüíta-gá
dácǎhñu ñaha-gǎ xii-güedé, te xǎhaⁿ-gǎ:

—Chí quéhéⁿ pàá-a caxi-ndo, te cada iní-ndó
sǎ cúú-xí dàtná yiqui cùñú-í —càchí-gá xǎhaⁿ-gǎ
xii-güedé.

²³ Te ní queheⁿ-gá vàsú ñúhú ndùdí ndéhé
yoho yàha stilé, te ní ndacáⁿ táhú-gǎ núú Yǎ
Ndiǒxí, te dàtnùní ní ngüíta-gá sǎñaha-gǎ xii-güedé
cuëndá coho-güedé luha luha sá ñúhú xití-xi, te
nchaa-güedé ní xihí.

²⁴ Te ní xáhaⁿ-gǎ xii-güedé:

—Ndudí ndéhé yoho yàha stilé-a cada iní-ndó
sǎ cúú-xí dàtná níñi-í sá cǎtí òré cahni ñaha-güedě
xii-í. Te sá dúcáⁿ cǎtí níñi-í xǎⁿ cutnùní ndáá sá Yǎ
Ndiǒxí cada-gá ingá núú sǎ vǎha sá cúú-xí vǎi ñáyiu
dàtná ní cachí-gá cada-gá.

25 Te na cächí tnúhu ndáá-í xii-ndo sã vítná-nã duha xihi-í ndudí ndéhé yoho yàha stilé-a te vá cóhó-gã-í, dico na sàá nduu cùndecu-í núú ndécú Yã Ndiõxí táxí tnùnì-gá, te dàvã-áⁿ cada iní-í sá dàtná sá cóhó tùcu-í chi ío cudíí ìní-í –cächí-gá xãhaⁿ-gã xii-güedé.

Jèsús cãháⁿ-gá sá tẽ Pèlú cúñaha-dẽ xii ñáyiu sá ñà túú xìní ñáhã-dẽ xii-gá

(Mt. 26:30-35; Lc. 22:31-34; Jn. 13:36-38)

26 Te Jèsús ní xita-gá ìⁿ ndudú ndihi cue tée xica cuu ndihi-gá, te dàtnùnì ní xica-gá cuáhãⁿ-gá ndihi-güedé yucu Òlívú.

27 Te yacãⁿ ní xáhaⁿ-gã xii-güedé:

—Na cächí tnúhu-í xii-ndo sã ncháã-ndó dàña nihnu ñaha-ndo xii-í niú vitna, chi quee ndáá-xi nãcuáa cãháⁿ-xi núú tùtú Yã Ndiõxí núú cächí-xi: “Yúhú cuáha-í tnúhu cahni-güedé tée cùu toli, te nchaa mběé-dẽ ndihi-güedé cuténuu”, duha cächí-xi núú tùtú-gá.

28 Dico na cùú-í te ndoto-í te codonùu-í núú-ndó quíhíⁿ distritú Galileá –cächí-gá xãhaⁿ-gã xii-güedé.

29 Te té Pèlú ní xáhaⁿ-dẽ xii-gá:

—Te cuëi nchaa-güedé ná dàndóo ñaha-güedé xii-n, dico yúhú chi vá dándõo ñaha-í xii-n –cächí-dé xãhaⁿ-dẽ xii-gá.

30 Te Jèsús ní xáhaⁿ-gã xii-dé:

—Na cächí tnúhu ndáá-í xii-n sã niú vitna cùmání-gã cana líhi úú xito, te únì xito cáháⁿ-n núú ñáyiu sá ñà túú xìní ñáhã-n xì-í –cächí-gá xãhaⁿ-gã xii-dé.

31 Dico té Pèlú ní cáháⁿ ñíí-dé, te xãhaⁿ-dẽ xii-gá:

—Cuëi na cùú ndihi ñaha-ĩ xii-n dico vá càháⁿ-í núú ñäyiu sá ñà túú xini ñáhà-í xii-n —càchí-dé xähaⁿ-dë xii-gá.

Te nchaa ðava-gá cue téé xica cuu ndihi-gá ðiu-ni ducaⁿ ní xáhaⁿ-güedë xii-gá.

Jèsús càháⁿ ndihi-gá Yă Ndiöxí #ⁿ xichi núú nání Gëtsemaní

(Mt. 26:36-46; Lc. 22:39-46)

³² Te Jèsús cuáháⁿ-gá ndihi cue téé xica cuu ndihi-gá #ⁿ xichi núú nání Gëtsemaní. Te òré ní quexìo-gá ndihi-güedé xíaⁿ, te ní xáhaⁿ-gă xii-güedé:

—Chí cúnúçõ iha cundetu-ndo na quihíⁿ-í yàcáⁿ cáháⁿ ndihi-í Yă Ndiöxí —càchí-gá xähaⁿ-gă xii-güedé.

³³ Te ndëca-gá té Pèlú, ndihi té Jàcobó, ndihi té Juàá cuáháⁿ, te ñá túú tnàhí-gá cúú vâha iní-gá te ní ngüita-xi súúni ndihú iní-gá.

³⁴ Te ní xáhaⁿ-gă xii cue téé úní-áⁿ:

—Súúni ndihú iní-í dàtná sá cùú-í, te chí quëndõo iha te vá cùdú-ndó —càchí-gá xähaⁿ-gă xii-güedé.

³⁵ Te sa ñùnchií luha ní xica ndehe Jèsús núú ndécú-güedë, te ní ngáundeyi-gá ndéé ñuhu càháⁿ ndihi-gá Tătá-gă Dútú Ndiöxí sá nõu vá cündèe iní-gá taunihnu ñaha-gă xii-gá cuëndá nchaa nàcuáa yáha-gá.

³⁶ Te òré càháⁿ ndihi Jèsús Tătá-gă Dútú Ndiöxí, te xähaⁿ-gă:

—Yòhó tătá mée-í, nchaandi túhú sá vâha ndàcu-n quide-n, te càháⁿ ndàhú-í núú-n nõu vá cündèe iní-n tàunihnu ñaha-n xii-í cuëndá sá vă ndòhò-í ná sàà òré, dico vá cádá-n nàcuáa càchí

iní mée-í chi cada-n nàcuáa càchí mee-n –càchí-gá xáhaⁿ-gã xii Tătá-gã Dútú Ndiöxí.

37 Te sátá nĩ yáha ní cáháⁿ ndihí-gá Tătá-gã Dútú Ndiöxí, te cuánuhú-gá núú nĩ dándöo-gá cue téé úní-áⁿ, te xixídí-güedé òré ní nasáá-gá, te ní xáhaⁿ-gã xii té Pèlú:

–Xímú, ¿náa sama xidí-n? ¿Náa ñá cündèe tnahi núú-n vã cùdú-ni-n cuèdicó ìⁿ òré-ãⁿ? –càchí-gá xáhaⁿ-gã xii-dé.

Te ní xáhaⁿ tucu-gá xii-güedé:

38 –Te chí quéndöo tucu, te cuhuⁿ iní-ndó vã cùdú-ndó, te cáháⁿ ndihí-ndo Yã Ndiöxí cuendá sá vã dácàháⁿ ñáhá yùcu ñávãha xii-ndo càda-ndo sá ñã túú tàú-ndó càda-ndo. Te na càchí tnúhu ndáá-í xii-ndo sã nchöhó cuini-ndó càda-ndo nchaa nacuáa càháⁿ-í dícó-ni sá ñà túú ñihí ndéé-ndó –càchí-gá xáhaⁿ-gã xii-güedé.

39 Te Jèsús ní xica tucu-gá cuáháⁿ-gá cáháⁿ ndihí-gá Tătá-gã Dútú Ndiöxí, te diu-ni nàcuáa ní xáhaⁿ-gã díhna xáhaⁿ tucu-gá.

40 Te òré ní yáha ní cáháⁿ ndihí-gá Tătá-gã Dútú Ndiöxí, te cuánuhú tucu-gá núú xíndecu cue téé úní xicá cùu ndihí-gá-áⁿ, te xidí-ni tucu-güedé òré ní nasáá-gá, te ducaⁿ nĩ quide-güedé chi súúni ñùhu saní núú-güedé, te ñá ní ñihí-güedé tnúhu cúñaha-güedé xii-gá òré ní nasáá-gá.

41 Te ní sáháⁿ tucu-gá xito cùu úní ní cáháⁿ ndihí-gá Tătá-gã Dútú Ndiöxí, te òré ní nasáá tucu-gá núú xíndecu-güedé, te xáhaⁿ-gã xii-güedé:

–¿Te náa xidí-ni tucu-ndo?, te vitna vã cùdú-gá-ndó chi sa ní sáá òré cuáha cuendá ñáhá-güedé xii yúhú Téé cùu ñaní tnáhá-ndó

nchàa-ndo núú cuè téé ndècu ichi cuehé ichi duha.

⁴² Te vitna chí ndácõo na quíhíⁿ-ó chi sa véxi téé cuáha cuèndá ñáhá xì-í núú cuè téé cùu úhú iní ñáhá —càchí-gá xǎhaⁿ-gǎ xii-güedé.

Ní tñi-güedé Jèsús ndécá ñàha-güedé xii-gá cuáháⁿ (Mt. 26:47-56; Lc. 22:47-53; Jn. 18:2-11)

⁴³ Te càháⁿ dúcáⁿ-ní Jèsús ní quexìo té Jùdás. Te núú tnàhá téé-áⁿ cúú ùxúú tnàhá cue téé xica cuu ndíhi-gá. Te ndíhi-dé vài cue téé ní quexìo, te dava-güedé xǎnehe-güedé machití te dava-güedé xǎnehe-güedé carrutí. Te cue téé-áⁿ nǐ tendaha ñàha cue dútú cúnùu ndíhi cue téé dàcuaha ñàha xii ñáyiu nchaa tnúhu ní chídó tnùní ndíi Moisés, ndíhi cue téé cùu sacuéhé núú ñáyiu isràél.

⁴⁴ Te té Jùdás téé cuáha cuèndá ñáhá xìi Jèsús sa ní xítñǎhu-dé cue téé-áⁿ nàcuáa cada-dé cuáha cuèndá ñáhá-dé xii Jèsús núú-güedé. Te duha ní xáhaⁿ-dǎ xii-güedé:

—Cundehe-ndo tǎe na tǎyuhu-í, te téé-áⁿ tñi-ndo-dǎ chi téé-áⁿ cúú-dǎ téé ndéé iní-ndó, te ío quíhi iní-ndó càndeca-ndo-dé quíhíⁿ —duha ní xáhaⁿ-dǎ xii-güedé.

⁴⁵ Te òré ní quexìo té Jùdás ndíhi cue téé-áⁿ núú ndécú Jèsús, te ní xáhaⁿ-dǎ xii-gá:

—Mèstrú —càchí-dé xǎhaⁿ-dǎ xii-gá.

Te ní teyuhu ñàha-dé.

⁴⁶ Te nchaa cue téé ndíhi-dé-áⁿ nǐ tñi-güedé Jèsús cuèndá candeca ñàha-güedé xii-gá quíhíⁿ.

⁴⁷ Te ñⁿ cue téé cùndíhi Jèsús ní tava-dé machití-dé, te ní xehndé-ni-dé ñⁿ xio lóho ñⁿ téé xìnu cuechi núú dǎtú cúnùu, te ní quendéé duuⁿ lóho téé-áⁿ.

48 Te Jèsús ní xáhaⁿ-gǎ xii cue téé ní tñi ñaha xii-gá-áⁿ:

—Nchòhó, nèhe-ná-ndó màchití, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ñⁿ ñadúhú quidé ñàha-ndo xii-í.

49 Te nchaa-ni nduu ní xiní-ndó ñí xíndecu-í xití veñúhu càhnu sǎ ìo cùnuu ní xóo danèhé-í ñàyiú, te ñǎ túú ní tñi ñaha-ndo xii-í. Dico dàcuítí sǎ dúhá yáha-í cuèndá quee ndáá-xi nàcuáa càháⁿ-xi núú tütú Yǎ Ndiǒxí —càchí-gá xǎhaⁿ-gǎ xii-güedé.

50 Te nchaa cue téé xica cuu ndihí-gá ní xinu-güedé ní dándõ ñaha-güedě xii-gá.

Íⁿ téé cuechi ñí xinu-dé

51 Te ñⁿ téé cuechi ndëndaha-dě Jèsús cuáháⁿ, te lavichi-dě, ñⁿ-ni dóó yádí yídúcúⁿ nuu-dé ñihùí-dé, te ní tñi ñaha-güedě xii-dé,

52 dico ní ndacu-dé ní quenuñi-dě te ní dándõ-dé dóó yídúcúⁿ nuu-dé-áⁿ ñí xinu-dé.

Jèsús ndécú-gǎ jùndá

(Mt. 26:57-68; Lc. 22:54-55, 63-71; Jn. 18:12-14, 19-24)

53 Te cue téé ní tñi ñaha xii Jesús ndécá ñàha-güedé xii-gá cuáháⁿ núú tǎe cùu dútú cùnù-gá. Te xíaⁿ ñí tacá nchaa dava-gá cue téé cùu dútú cùnù, ndihí cue téé cùu sacuéhé núú ñàyiú isràél, ndihí cue téé dàcuaha ñaha xii-yu nchaa tñúhu ní chídó tñuní ndíi Moisés cuèndá cada-güedé jùndá.

54 Te té Pèlú xica xica-ni nchicúⁿ ñáhá-dě xii-gá cuáháⁿ ní sáá-dé ndéé quehé vehe núú ndécú tǎe cùu dútú cùnù-gá-áⁿ, te xíaⁿ ñí ngóo teté-dé yuhu nùhú ndihí cue téé cùu poleciá.

55 Te cue tée cùu dútú cùnùu ndihì nchaa dava-gá cue tée xĩndecu jùndá ndúcú-güedě ñáyiú dacàa ìⁿ cuéchi díquí Jèsús cuèndá ducaⁿ ñhí-güedě nàcuáa cada-güedé cahni ñaha-güedě xii-gá, dico ñá túú ní ndàcu-güedé.

56 Te cuēi vai ñáyiú dàcaá-yu cuéchi díquí-gă dico mee-ni sã ñi cahu iní mée-yu ní cáháⁿ-yu, chi tucu càháⁿ ìⁿ tucu càháⁿ ìⁿ-yu.

57 Te davá-yu ní ndacuĩñi-yu te ní ngüíta-yu dàcaá-yu ìⁿ cuéchi neñùú díquí-gă, te xăhăⁿ-yu xii nchaa cue tée cùnùu:

58 —Nchúhú ní tecú dóho-ndí cächí-dé sá dąngòyo-dé veñúhu cąhnu sá ìo cùnùu sá ñi dácáa cuè tée ñuyíú-a, te dandàa tucu-dé ingá veñúhu saa, diu-ni núú cáa tnahí veñúhu-áⁿ te xití úní-ni nduu sa nadaxĩnu-dé, te vá cúú-gă-xi veñúhu sá ñi dácáa cuè tée ñuyíú-a, duha cächí-dé ní tecú dóho-ndí —cächí-yu xăhăⁿ-yu xii-güedé.

59 Dico ni dùcaⁿ ñá túú ní cùu ìⁿnuú-yu nchaa tnúhu ní cáháⁿ-yu.

60 Te tée cùu dútú cùnùu-gá ní ndacuĩñi-dé tnuú nchaa ñáyiú, te xăhaⁿ-dě xii Jèsús:

—¿Ná cuèndá duha ndùu tnúhu càháⁿ ñáyiú-a cuèndá-n? Te cáháⁿ ñùu nása ndùu tnúhu cáháⁿ-n —cächí-dé xăhaⁿ-dě xii-gá.

61 Dico Jèsús ñá túú tnahí ni cąháⁿ-gá. Te tée cùu dútú cùnùu-gá-áⁿ ñi xáhaⁿ tùcu-dé xii-gá:

—Cuíní-í cachí tnúhu-n xì-ndí ñùu sá díú Crìstú Déhe Yá Ndiõxí Yaá ní tendaha-gă véxi ñuyíú-a cùu-n. Te diu Yá Ndiõxí cúú-gă Yaá quidé cąhnu-ndí —cächí-dé xăhaⁿ-dě xii-gá.

62 Te Jèsús ní xáhaⁿ-gă xii-dé:

—Diu Yaa-án cùu-í, te na càchí tnúhu-í xii-ndo sã sàá nduu te quini-ndó yǔhú Tée cùu ñaní tnáhá-ndó nchàa-ndo cunucóo-í xio cùha Dútú Ndiǒxí Yaa ndácú quide nchaandi túhú sá vǎha. Te dàvá-án quini ñáhá-ndó xii-í quee-í andiu quixi-í ichi xití vícò —càchí-gá xǎhaⁿ-gǎ xii-dé.

⁶³ Te dútú cùnùu-gá-án ñí ndátá-dě dóó cání ñìhnu-dé cuendá sá ñà túú ní tnáhá iní-dé nàcuáa ní cáháⁿ Jèsús, te ní xǎhaⁿ-dě xii nchaa cue tée xǐndecu jùndá:

—Ñá túú-gǎ xíní ñùhu-xi cue tée cáháⁿ nǔu ndáá sá ndècuéchi-dé àdi ñá túú ndècuéchi-dé.

⁶⁴ Chi sa ní xǐndedóho-o nàcuáa ndùu tnúhu ní cáháⁿ-dé ní cáháⁿ úhú-dé cuendá Yá Ndiǒxí, te nchaa-ndo chí cáháⁿ vitna núu nása sàni iní-ndó cùnduu cuendá tée-a —càchí-dé xǎhaⁿ-dě xii-í-güedé.

Te nchaa-güedé ní cachí-güedé sá ná cùú-dé.

⁶⁵ Te dava-güedé ní ngüíta-güedé ní tiú dí ñáhá-güedé xii-gá, te ní dádáhu-güedé núú-gǎ, te ní ngüíta-güedé caniha-güedé xii-gá, te xǎhaⁿ-güedé:

—¡Cáháⁿ ná cótó ñá cùú tée ní caniha xii-n! —cachí-güedé xǎhaⁿ-güedé xii-gá.

Te cue tée cùu poleciá ní cani-güedé núú-gǎ.

Té Pèlú càháⁿ-dé núú ñǎyiu sá ñà túú xini-dé Jèsús (Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe càa núú ñìnu quide-güedé jùndá, chi vehe yòdo tnaha cuu-xi, te té Pèlú núcõo-dé quehé vehe-án. Te ñí xíchí xínú cuèchi núú dútú cùnùu-án ñí quexìo-xi núú núcõo té Pèlú.

⁶⁷ Te òré ní xini ñáhá-xi xii-dé núcõo teté-dé yuhu ñùhú, te ní xíndéhé ñàha váha-xi xii-dé, te xǎhaⁿ-xi:

—Yòhó tnàhá-n cùu-n téé xica cuu ndihi Jèsús téé ñúú Nazàrét —càchí-xi xáhaⁿ-xi xii-dé.

⁶⁸ Te té Pèlú ní xáhaⁿ-dě xii-xi:

—Yúhú ñá túú xìní-í téé-ǎⁿ, te ni ñà túú cùtnuní iní-í nása ndùu tnúhu càháⁿ-n —càchí-dé xáhaⁿ-dě xii-xi.

Te té Pèlú ní xica-dé cuáháⁿ-dé ndàa nacuáa nchii yuyèhe vehe-áⁿ, te ní cana ìⁿ líhi.

⁶⁹ Te xíchí xínú cuèchi-áⁿ ñí xìní ñáhá tùcu-xi xii-dé, te xáhaⁿ-xi xii nchaa ñáyiú xĩndecu-áⁿ:

—Diu téé-ǎⁿ tnàhá-dé xícá cùu-dé ndihi téé ndèca-güedé cuánguihu-a —càchí-xi xáhaⁿ-xi xii-yu.

⁷⁰ Dico té Pèlú ñá túú ní ñũnuu tucu-dé sá xícá cùu-dé ndihi Jèsús. Te tna tnaa-ni ní cuu sá dúcáⁿ ñí xáhaⁿ xíchí-ǎⁿ xii-dé, te ní xáhaⁿ tùcu dava cue ñáyiú xĩndecu-áⁿ xii-dé:

—Ndáá sá tnàhá-n cùu-n téé xica cuu ndihi téé ndèca-güedé cuánguihu-ǎⁿ chí cùu-n téé distritú Galiléá, te càháⁿ-n dàtná càháⁿ-güedé —càchí-yu xáhǎⁿ-yu xii-dé.

⁷¹ Te té Pèlú ní xáhaⁿ-dě xii-yu:

—Nchàcuiti Yá Ndiõxí sá yúhú càháⁿ ndáá-í sá ñà túú xìní-í téé càcunehe-ndo-áⁿ —càchí-dé xáhaⁿ-dě xii-yu.

⁷² Te òré-ni-áⁿ ñí cana tucu líhi xito cùu úú, te òré-áⁿ ñí ndacu iní té Pèlú nàcuáa ní xáhaⁿ Jèsús xii-dé sá cùmání-gǎ cana ìⁿ líhi úú xito te úní xito cáháⁿ-dé núú ñáyiú sá ñà túú xìní ñáhá-dě xii-gá. Te òré ducaⁿ ñí ndacu iní-dé nàcuáa ní xáhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gǎ núú tǎ Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sátá nǐ túndaá te cue tée cùu dútú cúnùu, ndihì cue tée cùu sacuéhé nǔú ñǎyiu isràél, ndihì cue tée dàcuaha ñaha xii ñáyiu nchaa tnúhu ní chídó tnùnì ndí Moisés, ndihì nchaa dava-gá cue tée cùnùu ní xíndecu jùndá ní natacá-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tǎ Pilatú.

² Te té Pilatú ní xícáⁿ tnúhú-dě núú Jèsús, te xǎhaⁿ-dě xii-gá:

—¿Ndáá sá díú-n cùu-n tée yíndaha ñaha xii ñáyiu isràél-ǎⁿ? —càchí-dé xǎhaⁿ-dě xii-gá.

Te Jèsús ní xáhaⁿ-gǎ xii-dé:

—Dìu-í yíndàha-í-yu —càchí-gá xǎhaⁿ-gǎ xii-dé.

³ Te cue tée cùu dútú cúnùu dacao-güedé vǎi cuéchi díquí-gǎ.

⁴ Te té Pilatú ní xícáⁿ tnúhú tùcu-dé núú-gǎ, te xǎhaⁿ-dě xii-gá:

—Cáháⁿ, ná cuendá ñá càháⁿ-n te cundehe nǎ ndéé duha titní cuéchi dàcaa díquí ñáhá cuè tée-a xii-n —càchí-dé xǎhaⁿ-dě xii-gá.

⁵ Dico Jèsús ñá túú tnàhí ní cǎháⁿ-gá te té Pilatú ío ní cuñúhu-dé sá dúcáⁿ ñà túú tnàhí ní cǎháⁿ-gá.

*Cue ñáyiu xǎhǎⁿ-yu xii té Pilatú sá cáhni-dě Jèsús
(Mt. 27:15-31; Lc. 23:13-25; Jn. 18:38-19:16)*

⁶ Te ndì tnahá nduu vico pascuá dácǎcu té Pilatú ìⁿ tée yìhì vecaá chi ducaⁿ tnàhí quide-dé, te mee ñáyiu càháⁿ-yu te núu ndédacàa tée yìhì vecaá-áⁿ cǎcu-dé, te tée-áⁿ dácǎcu-dé.

⁷ Te yìhì ìⁿ tée nàni Barrabás vecaá ndihì dava-gá cue tée cùndihì-dé. Te té Barrabás-áⁿ nǐ sanu ichi-dé ñáyiu ñuú ingá ichi, te ní ngúíta-yu ndihì-dé

ní cuu úhú iní-yu cue tée cùchiuⁿ, te ní sahani-dé ndíyí núu xǎⁿ ní chihi ñaha-güedě vecaá xii-dé.

⁸ Te nchaa ñáyiú ní sáháⁿ-yu núú tě Pìlatú, te càháⁿ ndàhú-yu núú-dě sá ná cádá nàhi-ni-dé dàtná quidé-dě.

⁹ Te té Pìlatú ní xáhaⁿ-dě xií-yu:

—¿Cuìní-ndó sǎ dácăcu-í tée yìndaha ñaha xii ñáyiú isràél-ǎ? —càchí-dé xǎhaⁿ-dě xií-yu.

¹⁰ Te ducaⁿ ñí cáháⁿ té Pìlatú, chi ní cutnúní iní-dé sá dícó sá cuèdú iní cuè dútú cúnùu núu xǎⁿ ducaⁿ ñí quide-güedé ní sáha cuèndá ñáhá-güedé xii Jèsús núú-dě.

¹¹ Te cue dútú cúnùu ní xáhaⁿ-güedě xii nchaa ñáyiú sá ná cùñàhá-yu xii té Pìlatú dácăcu-dé té Barrábás, te ní quidé-yu nàcuáa ní xáhaⁿ-güedě.

¹² Te té Pìlatú ní xícáⁿ tnúhú-dě núú-yu, te xǎhaⁿ-dě xií-yu:

—¿Ná cuìní-ndó càda-í tée càchí-ndó yìndaha ñaha xii ñáyiú isràél-i? —càchí-dé xǎhaⁿ-dě xií-yu.

¹³ Te nchaá-yu níhi ní cáháⁿ-yu, te xǎhǎⁿ-yu xii-dé:

—¿Cata caa-dé núú cùrúxí! —càchí-yu xǎhǎⁿ-yu xii-dé.

¹⁴ Te té Pìlatú ní xáhaⁿ-dě xií-yu:

—¿Te ná cúu cuèchi ní quide-dé te núu ducaⁿ cuìní-ndó càda-í-dé-i? —càchí-dé xǎhaⁿ-dě xií-yu.

Dico nchaá-yu uuⁿ-gá níhi ní cáháⁿ-yu, te xǎhǎⁿ-yu xii-dé:

—¿Cata caa-dé núú cùrúxí! —càchí-yu xǎhǎⁿ-yu xii-dé.

¹⁵ Te té Pìlatú ní quide-dé nàcuáa ní xáhǎⁿ-yu xii-dé cuèndá sá cúdù-dé núú-yu, te ní dácăcu-dé té Barrábás, te ní táúchíúⁿ-dě ní cani-güedé Jèsús

ndihì ñihì. Te sátá dúcáⁿ ñi quide ñaha-güedě xii-gá, te ní táuchíúⁿ-dě candeca ñaha-güedě quíhíⁿ cata caa ñaha-güedě xii-gá núú cùrúxí.

16 Te cue tée cùu sandadú ndécá ñaha-güedé xii-gá cuáháⁿ vechìuⁿ, te ñiu-ni xíaⁿ cúú vèhe tée cùu gobiernú. Te xíaⁿ ñi tacá nchaa dava-gá cue tée cùu sandadú.

17 Te xíaⁿ ñi dácuíhnú ñaha-güedé xii-gá ñⁿ dóo tǐcuèhé víhí, te ní cadúha-güedé ñⁿ coróná iñu ní chihì-güedé díquí-gă.

18 Te ní ngüíta-güedé níhi càháⁿ-güedé cúdíquí ndeé ñáhá-güedě xii-gá, te xăhaⁿ-güedě:

—¡Ío càhnu cuu yohó tée yindaha ñaha xii ñáyiú israél! —càchí-güedé xăhaⁿ-güedě xii-gá.

19 Te càni-güedé díquí-gă ndihì ñⁿ carrutí, te tìú díí ñáhá-güedě xii-gá, te ngüiñí xítí-güedě núú-gă quídé-güedě sá néhé-güedě sá yíñùhu núú-gă dico ñá ndàá chi dícó cúdíquí ndeé ñáhá-güedě xii-gá.

20 Te sátá dúcáⁿ ñi cudíquí ndeé ñáhá-güedě xii-gá, te ní nataunuu ñaha-güedě xii-gá dóo tǐcuèhé víhí să ñi dácuíhnú ñaha-güedé, te ní dándíúnuu ñaha-güedě xii-gá dóo méé-gă. Te dătnùnì ndécá ñaha-güedé cuáháⁿ núú catá caa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mt. 27:32-44; Lc. 23:26-43; Jn. 19:17-27)

21 Te ichi cuáháⁿ-güedé ndihì Jèsús ní naníhí-güedě ñⁿ tée ñuú Cirené nání-dě Xímú, te déhe-dé cúú ñⁿ tée nàni Lijandrú, ndihì ñngá tée nàni Rúfú. Te té Xímú-áⁿ ñúhú-dě ichi

duha cuándixi-dé ní sáháⁿ-dé yucu, te ní quide yica-güedě ní xido-dé cùrúxí sá nchídó Jèsús.

22 Te ndèca-güedé Jèsús cuáháⁿ ñⁿ xichi núú nání Gõlgotá, te tnúhu-áⁿ quée-xí: ñⁿ xichi núú nání yìqui díquí ndǎyí, duha quèe-xi tnúhu-áⁿ.

23 Te ní sáñaha-güedě xii-gá ndudí sá ñǎ quée yúcú nání mǐrrá coho-gá ní cùu dico ñá túú ní xìhi-gá.

24 Te ní sata caa ñaha-güedě xii-gá núú cùrúxí. Te sátá dúcáⁿ te cue tée cùu sandadú-áⁿ ñǎ xito ndeé-güedé ñúu ndédacàa-güedé cuu cuendá-güedé dóó-gá.

25 Te cùu-xi caá ñⁿ dátneé òré ní sata caa ñaha-güedě xii-gá núú cùrúxí.

26 Te ní taxi ndecu-güedé ñⁿ sá ndèè lètrá núú táca-gá. Te lètrá-áⁿ càháⁿ-xi ná cuendá ducaⁿ ñǎ quide ñaha-güedě xii-gá. Te duha càháⁿ lètrá-áⁿ: “Tée yìndaha ñaha xii ñáyíu isràél”, duha càchí-xi.

27 Te tnàhá úú cue tée cùu ñadúhú ñǎ sata caa-güedé ñúu-ni núú cùrúxí tucu. Te ñⁿ-dé ní sata caa-güedé xio cùha-gá, te ñngá-dé ní sata caa-güedé xio dátñi-gá.

28 Te ducaⁿ ñǎ cuu chi ní quee ndáá-xi nàcuáa càháⁿ-xi núú tütú Yă Ndiõxí núú càchí-xi: “Ñⁿ-ni ñǎ quide ñaha-güedě xii-gá ndihí cue tée ndècu cuéchi-xi”, duha càchí-xi núú tütú-gá.

29 Te nchaa ñáyíu yăha yatni núú táca-gá dácuìcò-yu díquǎ-yu te xǐcuèhé ñáhă-yu xii-gá, te xăhăⁿ-yu:

—Te ná cuendá ducaⁿ càa-n tacaa-n xíaⁿ, te càchí-n sǎ dàngoyo-n veñúhu càhnu sá ño cùnuu te

dandàa-n ingá veñúhu saa, te xítí úní-ni nduu sa nadaxĩnu-n càchí-n.

³⁰ Te vitna tañùu núú cùrúxí-áⁿ dàcácu-n mèe-n —cachí-yu xǎhǎⁿ-yu xii-gá.

³¹ Te ñiu-ni ducaⁿ ñǎ quide cue tée cùu dútú cúnùu, ndihi cue tée dàcuaha ñaha xii ñáyiu nchaa tnúhu ní chídó tnùní ndíi Moisés, chi ní cudíquí ndeé ñáhá-güedě xii-gá, te ní xítñàha-güedě:

—Tée-a ní ndacu-dé ní dácácu nihnu-dé ñáyiu, ¿te ná cuendá ñá ndácú-dě dácácu nihnu-dé méé-dě-i?

³² Te núu ndáá sá díú-dě cúú-dě Crístú Yaa ní tendaha Yá Ndiõxí véxi ñuyíú-a quindaha ñaha xii ñáyiu isràél, te na cundehe-o nuu-dé núú cùrúxí, cuendá quíndáá iní-ó-dě —càchí-güedě xítñàha-güedě.

Te ndeé tnàhá cue tée tàcaa xio xio diñi-gá xĩcuèhè ñáhá-güedě xii-gá.

Ní xihí Jèsús

(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava nduu, te ní cunee ñihí ñuyíú, te ducaⁿ-ni càa ní cuu ndeé caá úní sacuaa.

³⁴ Te ñiu-ni òré caá úní sacuaa-áⁿ ñihí ní cáháⁿ Jèsús, te xǎhaⁿ-gǎ xii Tǎtá-gǎ Dútú Ndiõxí:

—Elói, Elói, láma sabàctaní —càchí-gá xǎhaⁿ-gǎ.

Te tnúhu-áⁿ quée-xí: Ndiõxí méè-í, Ndiõxí méè-í, ná cuendá ní dáñá ñaha-n xii-í, duha quèe-xi tnúhu-áⁿ.

³⁵ Te dava cue tée xĩndecu yatni núú táca-gá-áⁿ ñǎ tecú dóho-güedě nàcuáa ní cáháⁿ-gá, te ní xítñàha-güedě:

—Chí cùndèdóho chi càna-dé té Èliás —càchí-güedě xítñàha-güedě.

36 Te ñⁿ cue tée xĩndecu-áⁿ xínú-dě ní sáháⁿ ní chindóyo-dé luha cáchí xítí ndudí íá, te ní chinenu-dé díquí ñⁿ yutnu càni te ní ndocani-dé chíhí-dě yuhu-gá cuèndá coho-gá. Te ní xáhaⁿ cuè tée xĩndecu-áⁿ xii tée-áⁿ:

—Cundetú tnaa na cùndehe-o nacoto núu quixi té Èliás nunehe ñaha-dě xii-dé núu cùrúxí — cáchí-güedé xáhaⁿ-güedě xii-dé.

37 Te Jèsús níhi ní canasaa-gá te ní xíhí-ni-gá.

38 Te sátá dúcáⁿ te ní ndátá dǒo cúu còrtiná xítí veñúhu càhnu sá ño cùnuu ní quée dava ndáá, te ndàa núu ññu ní ngüíta-xi ní ndátá.

39 Te tée cùu capitáⁿ nútnñi-dé ndàa núu Jèsús, te ndèhe-dé nàcuáa ní quide-gá òré ní xíhí-gá, te ní cachí-dé:

—Sá ndáá ndisa sá díú tée-a cùu-dé Déhe Yá Ndiǒxí ní cùu —duha ní cachí-dé.

40 Te xica xĩnutnñi ñⁿ úú ñáyiú ñíhí ndéhě-yu nchaa nàcuáa ní quide ñaha-güedě xii Jèsús, te tnàhá tá Màriá Magdalèná, ndihí tá Salómé, ndihí tá Màriá náná tē Chéé ndihí té Jàcobó tée cáchí-güedé cúu lĩhli-gá.

41 Te cue ñáyiú ñíhí-áⁿ ñi xica cuú-yu ndihí Jèsús distritú Galileá ní xinu cuèchí-yu núu-gá. Te cue ñáyiú ñíhí-áⁿ nchícúⁿ ñáhă-yu xii-gá ní quexiò ndéé ñuú Jerusàlén ndihí dava-gá ñáyiú ñíhí nchícúⁿ ñáhá xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

42 Te cùu-xi nduu vispré nduu ndètátú ñáyiú. Te nduu-áⁿ xĩquide túha-yu sá cúu ñngá nduu nduu ndètátú-yu-áⁿ, te diu-ni nduu-ă sa ní cuaa vìhi,

43 te ñⁿ tée nàni Cheé tée ñuú Arimàteá ní cuyi-dě ní sáháⁿ-dè núú tē Pilatú, te ní xáhaⁿ-dē sá ñuu vá cùndèe iní-dé dañá-dě chindúxi-dé yiqui cùñú Jèsús. Te tnháá té Chèé-áⁿ cúú-dě ñⁿ tée cùnūu cundihí-dé cue tée quide jundá, te tnháá-dé ndétú-dě sáá nduu ndíhu ndaha ñàha Yá Ndiòxí xii-dé ndihí cue ñáyiu.

44 Te té Pilatú ío ní cuñúhu-dé sá dúcáⁿ ño ndíhi ní xihí Jèsús, te ní cana-dé tée cùu capitáⁿ ní xicáⁿ tnhúhú-dě núú-dě ñuu ndisa sá sà ní xihí-gá.

45 Te tée cùu capitáⁿ-áⁿ ñí xáhaⁿ-dē xii té Pilatú sá ndàá ní xihí Jèsús, núu xíáⁿ té Pilatú-áⁿ ñí sáha-dé tnhúhu chindúxi té Chèé-áⁿ yiqui cùñú-gá.

46 Te té Chèé-áⁿ ñí saaⁿ-dè ñⁿ dóó vǎha, te ní sáháⁿ-dè ní nunehe-dé yiqui cùñú Jèsús núu cùrúxí, te ní chidúcúⁿnuu-dé yiqui cùñú-gá dóó vǎha sá ñí saaⁿ-dè-áⁿ, te dǎtnùní néhé-dé yiqui cùñú-gá cuáháⁿ ní chihí-dé ñⁿ yaú nchii yiqui naha càva, te ní sadí-dé yuhu yàú-áⁿ ndihí ñⁿ yúú quèhéⁿ.

47 Te tá Màriá Magdalèná, ndihí tá Màriá nǎná tē Chèé ní xiní-yu núú ñí chihí-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sáta ñí cundiquiⁿ nduu ndètatú ñáyiu, te tá Màriá Magdalèná, ndihí tá Salómé, ndihí tá Màriá nǎná tē Jàcobó ní saáⁿ-yu acití sáháⁿ tnámí cuendá canehé-yu quíhíⁿ chihí-yu yiqui cùñú Jèsús.

² Te ndumìngú nehé-ni òré vitna váha váha ní xínu coto núú nchĩcanchii ní quexió-yu núú nchii yaú yíhí yiqui cùñú Jèsús.

³ Te ní xítñàhá-yu:

—Yoo cúñaha-o xòcani yúú ndèdí yuhu yàú-a, chi vá yõo tnàhí ndècu iha —cachí-yu xítñàhá-yu.

⁴ Te òré ní xíndéhé vǎha-yu te ní xiní-yu sá yǔú cáhnú ndèdí yuhu yàú-áⁿ ìⁿ xio-ná ndécú.

⁵ Te cuánguìhú-yu xítí yaú-áⁿ, te ní xiní-yu nùcòo ìⁿ espíritú xínú cuèchi núú Yǎ Ndiǒxí ndàa xio cuhá-yu, te càa-xi datná cáá ìⁿ tée cuechi, te nìhnu-xi ìⁿ dóó cuìxíⁿ dóó cání, te ní yùhú-yu òré ní xiní-yu espíritú-áⁿ.

⁶ Te espíritú-áⁿ nǐ xáhaⁿ-xi xìi-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nànducu-ndo yìquì cuñú Jèsús tée ñúú Nazàrét tée ní sahani-güedé núú cùrúxí, dico ñá túú-gǎ yìquì cùñú-dé ndécú iha chi sa ní ndoto-dé, te chí cùndèhe núú nǐ sacáⁿ-güedé yìquì cùñú-dé te quiní-ndó nǎ ñá túú-gǎ-dé.

⁷ Te chí cuàháⁿ núú ndécú tǎ Pèlú ndìhi dava-gá cue tée ní xica cuu ndìhi-dé, te duha cúñaha-ndo xìi-güedé: “Jèsús codonùu-gá núú-ndó quǐhíⁿ distrítú Galileá, te yàcáⁿ quiní-ndó-gǎ dàtná ní cachí-gá xii-ndo”, duha cúñaha-ndo xìi-güedé —càchí espíritú-áⁿ xǎhaⁿ-xi xìi-yu.

⁸ Te cue ñáyiú dǐhí-áⁿ ìo ní yùhú-yu, te ní quene cunú-yu cuánuhú-yu, te quǐdì ñaha-ná-xi xií-yu sá ìo ní yùhú-yu, te ñá túú tnàhí ná tnúhu ni xǎhǎⁿ-yu xii cue ñáyiú ní naníhǐ-yu ichi cuèndá sá ìo ní yùhú-yu.

*Tá Màriá Magdalèná ní xiní-xi Jèsús
(Jn. 20:11-18)*

9 Te sátá dúcáⁿ nǐ ndoto Jèsús ndumìngú nehé-ni-áⁿ, te díhna nuu-gǎ tá Màriá Magdalená ní quee túu-gá núú-xi, te ñiu tá Màriá-áⁿ cúú-xí xíchí nǐ xíhi ñaha úsá espíritú cúndìhi yucu ñávãha ní cùu, te Jèsús ní queñuhu-gá nchaa espíritú-áⁿ yiqui cùñú-xi.

10 Te xíchí-ǎⁿ nǐ sáháⁿ-xi ní xítñuhu-xi cue téé ní xica cuu ndìhi Jèsús nàcuáa ní cuu, te xíndáhí-güedé sá ndìhú iní-güedé òré ní quexìo-xi núú ndécú-güedé.

11 Te òré ní xáhaⁿ tă Màriá xii-güedé sá nǐ ndoto Jèsús ndìhi sá nǐ xiní ñáhá-xí xii-gá, te ñá túú ní sàndáá iní-güedé.

Jèsús ní quee túu-gá núú úú cue téé ní xica cuu ndìhi-gá

(Lc. 24:13-35)

12 Te úú tnàhá cue téé ní xica cuu ndìhi Jèsús ñúhú-güedé ichi cuáháⁿ-güedé yucu, te uuⁿⁱ ní quee túu-gá núú-güedé, te ní dácótó ñàha-xi xii-güedé sá ñà túú-gǎ cáá-gǎ dàtná cáá-gǎ.

13 Te cue téé úú-áⁿ nǐ xica-güedé cuáháⁿ-güedé ní xítñuhu-güedé nchaa dava-gá cue téé ní xica cuu ndìhi-gá sá nǐ xiní ñáhá-güedé xii-gá, dico ñiu-ni ñucaⁿ ñà túú ní sàndáá iní cue téé-áⁿ tnùhu ní cáháⁿ-güedé.

Jèsús xǎhaⁿ-gǎ xii cue téé ní xica cuu ndìhi-gá nàcuáa ndiù chiúⁿ cada-güedé

(Mt. 28:16-20; Lc. 24:36-49; Jn. 20:19-23)

14 Te ndi ùxí ñⁿ cue téé ní xica cuu ndìhi Jèsús yíhí-güedé mèsá xéxí-güedé, te ní quee túu-gá núú-güedé te ní tenàà ñáhá-gǎ xii-güedé cuèndá sá ïo sàá iní-güedé ñá túú sàndáá iní ñáhá vǎha-güedé

xii-gá, chi ñá túú ní cuení-güedé quíndáá iní-güedé nàcuáa ní xáhaⁿ ñáyiú ní xiní ñáhá xì-gá sáta ñ yáha ní ndoto-gá.

15 Te ní xáhaⁿ-gã xii-güedé:

—Quíhíⁿ-ndó ñihí ñuyú cãháⁿ-ndó nùú nchaa ñáyiú tnúhu váha tnúhu sá cãháⁿ nàcuáa naníhí tàhú-yu.

16 Te nchaa ñáyiú na quíndáá iní tnúhu-áⁿ te cuanduté-yu, te naníhí tàhú-yu, dico nchaa ñáyiú vá quíndáá iní tnúhu-áⁿ te cuíta nihnú-yu.

17 Te nchaa ñáyiú na quíndáá iní ñáhá xì-í te cadá-yu sá vã yõo tnàhí ndàcu cada, te cacunehe ñáhá-yu xii-í, te queñuhú-yu nchaa espíritú cündìhi yucu ñávãha yìhi ñaha xii ñáyiú. Te uuⁿi ndacú-yu cãháⁿ-yu íngá núú tnúhu sá vátá dácuàha-gá-yu.

18 Te cuèi na tníⁿ-yu cóo dèéⁿ dico ñá túú ñã cada ñaha-dì xii-yu, te cuèi venènú ná cáxí-yu dico ñá túú ñã tnahá-yu, te tendàhá-yu cue ñáyiú cùhú te ndúha-yu —càchí-gá xãhaⁿ-gã xii-güedé.

Jèsús cuándaa-gá andiú

(Lc. 24:50-53)

19 Te sáta ñ yáha ducaⁿ ñ xáhaⁿ Jèsús xii cue téé ní xica cuu ndìhi-gá, te ní ndanchita-gá cuándaa-gá andiú te ní ngóo-gá xio cùha Dútú Ndiõxí.

20 Te cue téé-áⁿ ñ xica-güedé cuáháⁿ-güedé, te ní ngüíta-güedé cãháⁿ-güedé tnúhu Xítóhó Jesu-crístú nchaa xichi. Te mee-gã ní chindee ñaha-gá xii-güedé ní quide-güedé nchaa sá vã yõo tnàhí ndàcu cada cuendá cutnùní iní ñáyiú sá ndàá cãháⁿ-güedé tnúhu-gá. Duha ní cuu dává-áⁿ.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

872f7754-0986-5ecd-a059-925a708a6939